

মায়ে মায়াইনি কেয়াঙ কথমা

উপেন্দ্র দেববর্মা

কমথিঙনাই

ড. নিতাই আচার্য



Tribal Research and Cultural Institute
Govt. of Tripura, Agartala

মারে মারাইনি কেৰাঙ কথমা

উপেন্দ্ৰ দেববৰ্মা

কমথিঙনাই
ড. নিতাই আচাৰ্য



Tribal Research & Cultural Institute
Government of Tripura

*a Kokborok folk tale, Mare Maraini Kerang Kothoma written by
Upendra Debbarma and edited by Dr. Nitai Acharjee*

© Tribal Research & Cultural Institute
Government of Tripura

First edition :
21st August, 2020

Cover Design : Shabdachitra, Agartala

Type Setting : Shabdachitra, Agartala

Printed by : Kalika Press Pvt. Ltd., Kolkata

Published by :
Tribal Research & Cultural Institute
Government of Tripura.

ISBN : 978-93-86707-39-0

Price : ₹100/-

মারে মারাইনি কেৰাঙ কথমা।

কমথিঙনাইনি কক

আগিঅ নানা দুবুরাসঙনি থানি মারে মারাইনি কেৰাঙ কথমা আঙ কিসা খীনামানি তঙগ। অ ককন আব জতত সাঁইসুগাঁই মানলিয়া তে-ব জে মুইতু মানমানিন উানসুগাঁইন সায়খা। সায়মানি ফান মিলিয়া জাগাঅ মিলিৰিঅই মা রিখা। কিসা কুসু জাগাঅ জতত সায়মানি চায়া ফান উঙগই তঙগই মান', চায়াখাই সীনামই তীলাঙদি ব জাগাঅ বুবতাই ককন রিনানি। চিনি মারে মারাই কেৰাঙ কথমানি মুকুমুন নারীকনানি বাগই-ন, আঙ আগি খীনামানিন সাঁইজাখা। আঙ আসা খাইয়, নরগনি থানি অনুমোদন মানানী হিনই।

অনুমোদন মানখাই আনি সাঁইমানি সার্থক উঙগানী আনি আসীক-ন কক। চুবাই সানজাঅ জত-ন, খলুমবাইখা।

তাং ২০১৭ ইং, ১৬ই আগস্ট
বাং ১৪২৪, ৩০শে শ্রাবণ, বুধবার


য়াগজুর
উপেন্দ্র দেববর্মা

ককসীকাঙ

ট্ৰাইবেল ৱিসাৰ্চ এন্ড কালচাৰেল ইনস্টিটিউটনি তায় চাঙ বিসি বুরুম বুরুমন' হাশ্বেনি যন্ত দফানি লাইবুমা, তাঙমুঙ-তাইমুঙ, কেৰেংকথমা, ককলপ বিজাপৰগ কাৰিঅ, অব' চিনি সামুঙ বীতাঙগ' খবজাক। চিনি দফানি সীহকাৰীঙ সিনাই - নুকনাইৰগ তাইব' আব' হায় দাল বিদাল বিজাপ সীহথানি সাকথারমুঙ নাথুঙ হিনয় চাঙ মীচাং শ্ৰী উপেন্দ্ৰ দেববৰ্মাবায় সীহজাক “মাৰে মাৰাইনি কেৰাঙ কথমা” বিজাবন' কাৰিনা বাৰ্গাই সাকথারখা।

বিনি অ পালকতিনি কেৰাঙ কথমানি বিসিংতাই চিনি দফানি সিরিসিতিনি সিমি ফাইমা তাংৰাইদা হুকুম, মুকুমুনি মাৰিন' খবাই উানসুকমা ফেহেলাই তিসামা নুগজাগ'। অ বিজাব জতনি থানি হামজাকমুঙ মানানী খাখীলাইঅ।

আং শ্ৰী উপেন্দ্ৰ দেববৰ্মা তাই কমথীংনাই ড. নিতাই আচাৰ্যন' অ “মাৰে মাৰাইনি কেৰাঙ কথমা” সীহথানি সাকথারমানি বাৰ্গাই বেলাইখে হামবাই য়াফাৰ'।



(ধনঞ্জয় দেববৰ্মা)

দাগিফাঙ

আগুলি,
১ সেপ্টেম্বৰ, ২০২০

ট্ৰাইবেল ৱিসাৰ্চ এন্ড কালচাৰেল ইনস্টিটিউট
ত্ৰিপুৱা হাফাঙ

কমথিঙনাইনি কক

খোয়াইনি লাথা কলকনি তাখুক অকরা মীচাঙ উপেন্দ্র দেববর্মা ককবরক ককরীবাই তেই হুকুমনি আখুকিরি কীচাঙ কলসা। বিনি কেৰাঙকথমানি বিজাপ কাঙসা তেই জাদু কলিজানি রীচাবমুঙ বিজাপ কাঙসান-ব সীকাঙগ-ন ত্ৰিপুৰা হাফাঙনি সঙদুক নাইফিল তাই হুকুমু তাঙখর বাই সাপগাই কাৰিজাগখা। রীচাবমুঙ-মীসামুঙ বাই ব বীসীক গীদালজাক আবন আঙ বাইথাঙনি মকল বাই নাইনানি সেপ মানখা রবীন্দ্রনাথ ঠাকুরনি ফিল ১২৫ আচাইমা সালন রীগীই ত্ৰিপুৰা হাফাঙনি ককথুম হুকুমু তাই বেরাইখিরি তাঙখর বাই লুডাজিজাক তেই আগরতলানি বেসিক ট্ৰেনিং কলেজ' সঙচাজাক ককবরক বাই রবীন্দ্ররীচাবমুঙ তেই মীসামুঙনি মেইল'। আফুৰু ব-ন আ মেইলনি জতনি অকরা ককবরক বাই রবীন্দ্ররীচাবমুঙ রীচাবনাই তেই মীসানাই।

আঙ মীচাঙ উপেন্দ্র দেববর্মানি যাক বাই সীয়জাক কেৰাঙকথমা থাইবান মা পৰিখা। আবরগ আংখা — ১. হজলাইতিনি কেৰাঙকথমা, ২. তকসা রাঙগিয়ানি কেৰাঙকথমা, ৩. যঙলা আবুমনি কেৰাঙকথমা, ৪. মারে মারাইনি কেৰাঙকথমা তেই ৫. তকথু হাজারিনি কেৰাঙ কথমা। সীয়নাইনি ককন সীয়থানি ব সাখা, ব বিনি নানা-দাবুরাসঙনি থানি খীনামানি কেৰাঙকথমারগন মুয়তু খীলাই খীলায়ীই উনসুগীই ব আবরগন সীয়খাফন। বিনি অ কেৰাঙকথমারগন পৰিউই আঙ অবরগন থাঙনুক হাইসে মা তঙখা। অবরগন কেৰাঙকথমা রীগীই সীয়জাক থাঙনুক হিনাই সাখাই-ন চাকুগনাই হিনাই আঙ খা খীলায়'। তেই থাইসা কক অবরগ বীসীক জরাতাই ককবরক কেৰাঙকথমানি গীৰীঙ বাই গীদালজাক অ সীঙমুঙ-ব ফায়'। পৰিনাইরগ-ন অ ককরগন উনসুগীই নাইলাইজাথুন। ফিয়াবা অবলে মানাই কীতাল মুঙসা, অ ককনলে জত-ন গসিনাই হিনাই খা খীলাইজাগ'।

পাইথাগ' আঙ সানা মুচুঙগ, কেৰাঙকথমা ফান' হিনদি এৰা কেৰাঙকথমা ৰীগাঁই
সীয়জাক থাঁঙনুক ফান' হিনদি অৱৰগ জত-ন অাঁংখা সীয়কীৰীঙ তেই কককীৰীঙ
তাখুক অকৰা মীচাঙ উপেন্দ্ৰ দেববৰ্মানি ককবৰক ককৰীবাই ৰীগজাক সামুঙনি
বাঁথাইৰগ। আঙ খা বাই খুক বাই-ন পুইতু চাঅ বিনি “মাৰে মাৰাইনি কেৰাঙ
কথমা” ককবৰক ককৰীবাইন তেই-ব গীনাঙ খাৰিনাই তেই তেই-ব কুচুগ'
তিসাথানি-ব চুবানাই।

আগৰতলা
১৪/০৮/২০২০

খলুমবাইখা
ড. নিতাই আচাৰ্য

মারে মারাইনি কেরাঙ কথমানি বীরাই বাই টলারগ

- | | |
|---|------------------------------------|
| ১। বিরিগু (দলিত বুবাগ্রানি মুঙ) | ১৭। বাদারাই |
| ২। মনপতি (দলিত বুবাগ্রানি বিহিক) | ১৮। উদিরাম |
| ৩। বুবাগ্রা কুসু | ১৯। রাঙগিয়া (উদিরামনি বীসীলা) |
| ৪। কইনাতি (বুবাগ্রা কুসুনি বিহিক) | হাতাঙ কামিঙনি |
| ৫। সেঙ বুবাগ্রা | ২০। মালতি (বীরাই সিকিলা) |
| ৬। সরদার | ২১। রঙগতি (বীরাই সিকিলা) |
| ৭। বলনতিয়ার | ২২। উদিরাম |
| ৮। হরিজয় | ২৩। জাঙগিয়া (উদিরামনি বীসীলা) |
| ৯। কানতিরায় | ২৪। চিনতাপতি (হরিজয়নি বিহিক) |
| ১০। সুবুরাই | ২৫। জানকি (হরিজয়নি বীসাজীক) |
| ১১। বুদুরাই | বলঙ হাথেনি |
| ১২। বারিয়া | ২৬। বরজু (বলঙ বুবাগ্রানি মুঙ) |
| ১৩। কানতিয়া | ২৭। বানুকতি (বলঙ বুবাগ্রানি বিহিক) |
| ১৪। চাকতি (বীরাই রানদি) | ২৮। বুবাগ্রা কুসু |
| ১৫। মাদুমি (চাকতি বীরাই
রানদিনি বীসাজীক) | ২৯। সেঙবুবাগ্রা। |
| দঙগর কামিঙনি | ৩০। ককতুনতি (ককতুন তুননাই) |
| ১৬। সমতিয়া | ৩১। বলাই (বরক রমনাই মুইসিরি) |
| | ৩২। সলাই (বরক রমনাই মুইসিরি) |

মারে মারাইনি কেৰাঙ কথমা

পুইলানি কক

দলিতনি বুবাগ্ৰা বাই বলঙ বুবাগ্ৰানি কক। দলিত বুবাগ্ৰানি মুঙ হিনকাই বিরিগু তাই বলঙনি বুবাগ্ৰানি মুঙ হিনকাই বরজু। আগিঅ বুবাগ্ৰা হাশ্বে কাইসানি বুবাগ্ৰা বাই তাই কাইসা হাশ্বেনি বুবাগ্ৰা নাইসিকলায়ই মানয়া, তামঙগই হিনবা হাশ্বে ন সেকলাইমানি বাগই সাব ন সা-ব চেনরিঅই হাশ্বে ন সেগই নাহারই মান। বিনি হাশ্বেন ব সেকনানি বিনি হাশ্বে ন-ব ব সেগই নাহারনানি সমা নে-ন নাইয়ই তঙলাইয়। কাইসানি হাশ্বে ন তাই কাইসা বুবাগ্ৰা সেগই জুধ খাইলাই ফুৰু হিনকাই যাঙনি বুবাগ্ৰা বাই আয়াঙ তাই কাইসা বুবাগ্ৰানি প্রজারক কাহাম খাই থাইলাইয়। সুদু থায়ই-ন সিমি থাংয়া, বাকসাৰা খৰা কমপা উঙগই বলঙ গীনাঙগই-ব রথারথি কীলাইয়ই থাঙলাইয় কেবন কে খেয়াল খাইলাইয়া উঙগই। কাইসা বুবাগ্ৰা তাই কাইসা বুবাগ্ৰান চেনরিঅই কীপীলাই উঙগই থাংকা হিনকাই কীপীলাই উঙগই থানাই বুবাগ্ৰা তাই কাইসা বুবাগ্ৰা চেনই থানাইন বুথারই খিব'। উলখাই অ কেচেন বুবাগ্ৰানি বিহিগ বীসান বিনি তলা তনিঅই আরনি প্রজারকন য়াগ খায়ই জে উঙতাই সাতকপিতক খায়ই বিনি অদিন' তনিঅই বিনি নিজেনি ইচ্ছা আইনন খায়ই খিব'। উল হিনকাই আরনি প্রজারক অ কীপীলাই বুবাগ্ৰানি ককতাই খাইয়ই-ন মা তঙগ। তাবুক দলিত বুবাগ্ৰা বাই বলঙ বুবাগ্ৰানি কেৰেঙ কথমান কিসা সাউনৌ। সালসা দলিতনি বুবাগ্ৰা পানদা কাইসা কবকখা হিনতা। অ পানদাঅ বুবাগ্ৰা কুসু, সেঙ বুবাগ্ৰা, খানদল, সরদার, বলনতিয়ার তাই প্রজারকন-ব রিঙখা, রিঙজাগবায়ই জত-ন ফাইবাইখা ফায়ই জত-ন আচুকলাইবাইখা।

দলিত বুবাগ্ৰা বাই বুবাগ্ৰাজীক ফাইকা।

বুবাগ্ৰা কুসুসঙ জত-ন বুবাগ্ৰানি জয় বুবাগ্ৰানি জয় হিনবাইখা।

- বুবাগ্রা : বুবাগ্রা কুসু আঙ কক সীঙনানি ।
- বুবাগ্রা কুসু : আইগা বুবাগ্রা নীঙ আন তাম ককন সীঙনানি সীঙদি ।
- বুবাগ্রা : আনি হাশ্তেঅ জে তঙনাই আনি প্রজারক তাবুক জরাতাই কাহামকীরীঙ-ন তঙবাইনাবীলা মীচায়া মানুঙয়াদে কাইসাসীকদে তঙ, তঙখাইবা আন সাদি ব তামঙ মীচায়া মানুঙয়া উঙগই তঙ ?
- বুবাগ্রা কুসু : আইগা বুবাগ্রা নিনি প্রজারকন আঙ তাবুক-ব আবতাই মীচায়া মানুঙয়া নুগয়া খ তাবুক-ব চালাই নুঙলাই কীচাঙ কীচাঙ খাই-ন তঙলাইয়, তাবুক জরাতাই কাইসা-ন ফান মা নুঙয়া মীচায়াই তঙমানি আঙ নুগয়া খ ।
- বুবাগ্রা : বুবাগ্রা কুসু নীঙ আন সাদি আনি হাশ্তেঅ কাইসা সীকদে মীচায়া মানীঙয়া তঙখাই বরগন জত-ন চুবাচুরুঅই রিলাইদি আন-ব সাফাইদি আঙ-ব চুবা চুরুঅই রিনাই তে-ব আনি প্রজারকন মীচায়া মানুঙয়া খাইয়া । আনি প্রজারক মাই মীচায়া তাই মা নুঙয়া উঙগই থীয়ই থাংকাকাই আনি দুরনাম উঙগানী । আঙ হাশ্তেনি বররকন কেন-ব মীচায়া মা নুঙয়া খায়ই বুথারনানি মচুঙয়া ।
- বুবাগ্রা কুসু : বুবাগ্রা চিনি হাশ্তেঅ দনিয়া হিনই হিনজাগনাই বরক কাইসা মীচায়া মানীঙয়া উঙগই থীঅই থানানি নাইয়ই তঙমানিন চীঙ জত-ন পাল খায়ই চুবা চুরুই রিখাই ব থীইলিয়া থাঙগই থাংকা ।
- বুবাগ্রা : বা ! বুবাগ্রা কুসু-বা ! আঙ আবতাই কক কাহামন-ন খীনানানি মুচুঙগই তঙগ, নিনি খুগ' আবতাই ককন খীনাঅই আঙ নন হামবাই রিঅ । তাই আনি প্রজারকন-ব আঙ হামবাই রিঅ ।
- সেঙবুবাগ্রা : বুবাগ্রা নন খুলুম', আঙ ই পানদাঅ কক থাইচা সানানি মুচুঙগ চিনি বুবাগ্রান । বুবাগ্রা আজ্ঞা রিখাই আঙ সাতাই মান' ।

- বুবাগ্ৰা : সাদি সেঙ বুবাগ্ৰা নীঙ অর কেন-ব তা কিরিদি তা লাচিদি বীখান খালাখুলা খাই-ন সাদি।
- সেঙ বুবাগ্ৰা : তানখীলাই কতকনি থাই নুগানী বুখীলাই ফিকুঙ যামফীরা চানী আঙ জে খীনামানি কক হিনকাই বলঙনি বুবাগ্ৰাসে ফায়ই চিনি হাঙ্গে ন সেক ফাইনানি হিনই খীনাঅ।
- বুবাগ্ৰা : আব কুবুইদে হিন সেঙ বুবাগ্ৰা ?
- সেঙ বুবাগ্ৰা : কুবুই কক-ন হিনই আঙ খীনাঅ বুবাগ্ৰা।
- বুবাগ্ৰা : আহাই খাই তিনিনি সিমি-ন আনি জে তঙমানি সিপাইসমত্রিরক চিনি হাঙ্গেনি জে লামা তঙমানি জে বলঙ তঙমানি জে তীয় তঙমানি জ-ত জাগাঅ-ন পাহারা মা রিনাই কাসঅই। অ কাসমানি লামাতাই চিবুক সিনদীরাই তাই মুই সুৰুম্ন ফান তা লাইরিদি নুগখাই-ন বুথারই খিবদি তা লাইরিদি অ লামাতাই।
- বুবাগ্ৰাজীক : নরগ আনি প্রজায়া নরগ জত-ন আনি বীসাসে বলঙ বুবাগ্ৰা বাই জুধ্ধ রিলাই চীঙ জদি পাইয়া উঙগই থাংকাখাই চীঙ বীসীক উৰুই পুৰুই উঙগই থাংলাইন সাঅইদে মান। চিনি পানদাঅ সরদার বলনতিয়ার তঙগ নরগ জত-ন নাইচমসুগই তঙনানি নাঙগানী। তিনিনি সিমি চিনি হাঙ্গেনি বররক জত-ন বীরাই ফান উঙথন চীলা ফান উঙথন জত-ন জুধ্ধ খাইনানি বাগই তাম খাই জুধ্ধ খাইনানি নাঙ জুধ্ধ খাইনানি সীরাঙনানি নাঙগানী।
- সরদার : আউ চিনি বুবাগ্ৰাজীক চীঙন কক সাঅই খীনারিমানি হিনকাই থিক-ন তঙগ, চীঙ তিনিনি সিমি-ন জত-ন নখরই জুধ্ধ খাইনানি সীরাঙনানি নাঙনাই।
- বলনতিয়াররক : চীঙ-ব সীরাঙনাই জুধ্ধ খাইনানি।

- বুবাগ্রা : বুবাগ্রা কুসু সেঙ বুবাগ্রা চাঁঙত তিনি অ পানদা কাইসা খায়ই ককন চাবলাইখা নরগ-ব জত-ন কক বাকসা খুক বাকসা খায়ই তিনিনি সিমি-ন মা তঙলাইনাই। ফাইদি জত-ন বাঁচলাইদি আঙ অর-ন তিনিনি বাগই পানদা মাঁথাগই রিখা।
- বুবাগ্রা-কুসু : জয় বুবাগ্রানি জয়।
- জত-ন : জয় বুবাগ্রানি জয়।

বুবাগ্রা, বুবাগ্রাজীক, সেঙবুবাগ্রা, বুবাগ্রা কুসুসঙ জত-ন থাংকা।
সুবরাই বাই, বুদুরাই ফাইকা।

- বুদুরাই : দা সুবরাই তাম কিসা কিসা খীনামানি চিনি হাঙ্গেনি দলিতনসে বলঙ বুবাগ্রাসঙ জুন্দ্ব খায়ই সেগই নাহারই চিনি হাঙ্গেনি ব-ন বুবাগ্রা উঙগই আচুক ফাইনানি কক হিনবেলে আবতাই হিনই আঙ কিসা খীনাঅ নীঙ খাই খীদে খীনাকা?
- সুবরাই : আঙ-ব কিসা কিসা খীনাকা বলঙনি বুবাগ্রা ফাইকাই-ন হাম' চিনি ই হাঙ্গেনি। বলঙ বুবাগ্রা হিনকাই চিনি দলিত হাঙ্গেনি বুবাগ্রানি সীলাই বেলাই কাহাম বুবাগীরা হিনবেলে, চাঁঙ তাবুক অ বলঙ বুবাগ্রান চিনি দলিত হাঙ্গেনি হাবরিঅই মানখাই কাহাম উঙনাই। চাঁঙ মীতাই ককন বিসিঙতাইসে বরকন মা বুজকনাই চিনি বুবাগ্রানি সীলাই অ বলঙ বুবাগ্রাসে বেলাই কাহাম হিনই।
- বুদুরাই : আহাই খাই চাঁঙ তিনিনি সিমি-ন খরকসা খরকনাই খরকসা খরকনাই খাই বিসিঙ বিসিঙ আউই খাইমানিসে হাম' নীঙ বাই আঙ বুই খীনায়া জাত সেরেক সেরেক খায়ই।
- সুবরাই : সাবদান বুদুরাই খরকসা খরকনাইন মালাই-খাই-ন ম ককন আস্থে আস্থে খাই পেপীলায়ই

রিদি তবে খুব সাবদান খাই রিহরদি কেবন তা
সাদি হিনই, চীঙ আবতীই খাই জতন খায়ই
মানখাই-ন বলঙ বুবাগ্রান নাহারই চীঙ সুক সানতি
খায়ই তঙগই মানানী।

- বুদুরাই : আউ চিনি দলিত হান্তেনি বুবাগ্রান বদলগই
খিবমানি-ন কাহাম।
- সুবরাই : অঙখা তাই তা সালাইসিদি খীনানি সিমি-ন
কউসল খাইলাইসিদি, নীঙ বাই আঙ থিক খাই
তঙখাই জ-ত দলিত বররক-ন চিনি য়াফাঅ
কীলাইবাইনাই তা উনাদি নীঙ।

সুবুরাই বাই, বুদুরাই থাংকা।
বুবাগ্রা কুসু বাই, সেঙ বুবাগ্রা ফাইকা।

- বুবাগ্রা কুসু : উসীকাঙগ চিনি পানদাঅ নীঙ সাঅই খীনামানি
চিনি দলিত হান্তেন বলঙ বুবাগ্রা জুশ্ব খায়ই সেগই
তীলাঙগই থানানি হিনই খীনামানি আব বুবতীই
খবর মানখা, নীঙ তাবুক বাবতীই খীনাকা?
- সেঙ বুবাগ্রা : সেকফাইনানি-ন হিনই খীনাঅ আঙ। তাবুক চীঙ
আগিনি সীলাই তে-ব বিসি খাই রাগলায়ই গাতেরে
গাত তে-ব বিসিখাই জুইত খাই পাহারা-ন মা
রিলাইনাই। পাহারা রিমানি হেলেঙ বেলেঙ
হিনকাই চীঙ পাইয়া উঙগই বুথারই
খিবজাগবাইনাই।
- বুবাগ্রা কুসু : ফাইদি সেঙ বুবাগ্রা চীঙ নীঙ বাই কীনাই সদদ বেস
নাঅই পাহারা তঙনাইরকন নাইচমলাই- মানি হা-ম,
পাহারা তঙনাইরক বুবতীই খাই তঙলাই পাহারান',
হিমদি তিনিনি সিমি-ন নাইচমলাইমানি হাম'।
- সেঙ বুবাগ্রা : বুবাগ্রাকুসু নীঙ মীতীই কক-ন সামানি কুবুই-ন
চাঅ।

- বুবাগ্রা কুসু : তাম খাইলাইয়ই চাঁও নাইচমলাইনানি সীলাই বুদ্ধি
কাইসা তিখীলাইদি।
- সেঙ বুবাগ্রা : বুদ্ধি হিনখাই সেঙকারি সীনামই, অ
সেঙকারি-খচাইন বুখুগ' থেপাঅই সইনাসি
হাইকাই থাংলাইয়ানুতা। আবতাই খাই চাঁও
থাঙলাইখাই বুই চাঁওন সিনিঅই মাননিয়া চাঁওন
সইনাসিসে হিনই তঙগানী। আফুরু খাই চাঁও বুই
তাম সালাই বুজিলাই মানানী।
- বুবাগ্রা কুসু : আহাইখাই সেঙ বুবাগ্রা চাঁও তিনিনি সিমি-ন
সইনাসিনি বুপ নাহারই সইনাসি উঙলাই
থাংচিনানিতা না?
- সেঙ বুবাগ্রা : আউ তিনিনি সিমি-ন চাঁও সইনাসি উঙলাই- খাতা।

বুবাগ্রা কুসু বাই, সেঙ বুবাগ্রা থাংকা।

মনপতি বাই, কুইনাতি ফাইকা।

- কুইনাতি : নীঙলে বুবাগ্রানি বিহিগবা চিনি হাঙ্কেঅ ফায়ই জুধ
খায়ই বলঙ বুবাগ্রা ফায়ই হাপপাইখাই নীঙলে
খারই থানানি জাগা তঙনাই, আঙলে বুবাগ্রা কুসুনি
বিহিক-বা আঙলে খারই থানানি জাগা কারীই।
- মনপতি : আঙ বুবাগ্রানি বিহিগ হিনই বর খারই থানানি জাগা
তঙবা, থাইনানি হিনকাই আর-ন মা
থাইলাইসিনাই তাই তাম খাইনানি-বা।
- কুইনাতি : থাইনানি হিন-ব আহাইনলে থায়ই চায়া, ফাইদি
চাঁও বীরীই হিন-ব সৈন মাসানলে বুথারই খিবই
মাননাই। নীঙ-ব বুবাগ্রানি বিহিক আঙ-ব বুবাগ্রা
কুসুনি বিহিক উঙগই তামঙগই চাঁও হিনই জুধ
খায়ই মানয়া উঙনানি-বা।
- মনপতি : আউ নিনি কক-ব থিক-ন, ফাইদি চাঁও নখরলাইদি
চিনি হাঙ্কেনি বীরীইরক ন ম কক ন সাঅই জত-ন

- থাংচা খায়ইদে মান-ন নাইলাইগীরানা ফাইদি। চাঁও
জতন-ন ম ককন সাঅই বুজগই রিনাই।
- কুইনাতি** : ম ককন সাঅই জতন বুজকসীগই রিঅই মান-
খাই চিনি হাশ্বেন চাঁও নারীক খিবনানি বাগই বিসি
কক বাঙয়া।
- মনপাতি** : চাঁও জ-ত বীরীইন বুজগই কক থানচা খায়ই মানয়া
হিনকাইলে চিনি হাশ্বে ন চাঁও নারীগই মাননিয়া
বলঙ বুবাগ্রা-ন চিনি হাশ্বে ন তীলাঙগই ব-ন
অরনি বুবাগ্রা উঙগই থাংচিনাই উলখাই-ন জে
হিনমানি আবন-ন চাঁও খাই মানেঅই মা তঙসিনাই
তাই কুসতাম সানানি কক কীরীই।
- কুইনাতি** : আউ নিনি কক হিনকাই কুবুই-ন।

মনপতি বাই, কুইনাতি থাংকা।

সুবুরাই বাই, বুদুরাই ফাইকা।

- বুদুরাই** : দা সুবুরাই চাঁও নীঙ বাই সালাইমানি খবর তাম
উঙখা নীঙ বীসীক জরাতীই তাম খাইখা।
- সুবুরাই** : আঙ নীঙ বাই সালাইমানি উল' আঙ বিসিঙ বিসিঙ
জ-ত বরক বাই-ন চানাইঅই নাইখা চিনি দলিত
বুবাগ্রানি ফাইসিঙগ বরক বিসি কীরীইখা আঙ
খগই বিসিঙ বিসিঙ বরগ বাই পানদান আচুক
আচুগই তাতাল ককন মা সাকাতা, তাম হিনই আঙ
বরগন তাতাল ককন মা সাকা বলঙনি বুবাগ্রা বরক
কাহামব ফাইকাই জাগানি খাজনা কমেরিনানি
জতন-ন নগ হুগ তাঙগই রিনানি, দলিত বুবাগ্রা
কইনা খাঙগই তীলাঙ গই থাঙমানি-ব আবতীই
খাই তীলাঙগই থাংয়া ফন। ব হাই বরক কাহাম
তাই বুবাগ্রান নরগ তাই মানগীলাক হিনই তাতাল
কক-ন মা সাখাতা।

- বুদুরাই : আঙ-ব আবতাই খাই-ন তাতাল ককন ফলগই মা সাখাতা। আবতাই তাতাল ককন কিসা সাপুলই সাঅই খীনারিখাই কিসাকাই আন হামজাগলিয়াগাঁজা, যাফা খরবইসে আন হামবাই রিসিঅ।
- সুবুরাই : তাতাল ককন হিনকাই বরক বিসাস থাংগ নিয়াদা, কুবুই ককন হিনকাই বরক বিসাস থাংয়া তামঙগই আব বরক উঙগই খতেঅই নাইয়া বব কুবুই বব তাতাল আব বাইসে বরক তাতালন বিসাস থাংগ।
- বুদুরাই : কুবুই চাচা-ন দলিত বুবাগ্রা বাই বলঙ বুবাগ্রা জুধ্ব রিলাইখাই দলিত বুবাগ্রা পাইয়া নাই তঙদি।
- সুবুরাই : নিনি কক খাই নাঙনাই-ন বুদুরাই।

সুবুরাই বাই, বুদুরাই থাংকা।

বুবাগ্রা, বুবাগ্রা কুসু, সেঙ বুবাগ্রা, সরদার তাই, বলনতিয়া ফাইকা।

- বুবাগ্রা : তিনি আঙ নরগন রিঙমানি হিনকাই আহাই সে, আনি দলিত হাঙ্গে ন বলঙ বুবাগ্রা জুধ্ব খায়ই সেগই তীলাঙ থাংপাইনানি হিনই খীনামানি আব কুবুইদা অ ককন সাব সাচুগই মান সাদি তাবুক অ চিনি পানদাঅ। আব-ন নরগ বাই সালাইনানি হিনই-ন নরগন সিমি নীঙগ আনি প্রজারক-ন রিঙয়া কারই। নরগ তাবুক বাঁখান খুলগই সাদি কাইসা কাইসা খায়ই।
- বুবাগ্রা কুসু : নরগ জত-ন চিনি বুবাগ্রানি ককন খীনাবাই- খীনা বুবাগ্রা তাম ককনবা চীঙন সাঅই খীনারিখা।
- সেঙ বুবাগ্রা : তানখীলাই কতকনি থীইন নুগানী, বুখীলাই ফিকুঙনি যামফীরা চানু আঙ জতন-ন আনি খা কাহাম যাফারই চুবাই খাই নরগন আঙ জে খীনামানি হিনকাই বলঙ বুবাগ্রা চিনি ম দলিত হান

ব জেসা খাই ফা-ন জুন্ধ খায়ই সেগই তীলাঙ ফাইনানি কক। বলঙ বুবাগ্রা-ব তিনি ফাইয়া ফান খীনাঅ ফাইনাই খীনাঅ ফাইয়া ফান সনিঅ ফাইনাই তেই ব ফাইয়ই সেকপাইনাই-ন সেকপাইনাই আঙ মীতাই ককন নরগন খগই তনিয়া আঙ।

- সরদার : কুকুবুই চাচা-ন চিনি ম দলিত হান সেকনানি হিনই বলঙ বুবাগ্রা ফাইকাই বন উইসা বাই-ন বখরগ' ফুঙসা রিঅই বুথারই খিবি রিউনৌ, চাঙ-ব চিনি দলিত হানি বরকনি খমতান সাঅইসে মানয়াখ, চাঙ অরঅ বীসীক খমতান তাঁইলাই তঙ।
- বুবাগ্রা কুসু : আবতাই বরাই ককন তা সাদিখ বলঙ বুবাগ্রান হিনই ফান কম হিনই তা হিনদি, বব খরকসা বুবাগ্রা-ন নিয়াদা, জদিবা ফাইয়ানি ফাইকাই কম খাই তা তঙলাইদি চাঙ থীয়ই ফা-ন থাংতন হিনই মা রিলাইনাই।
- বলনতিয়া : বুবাগ্রা নীঙ চিনি বলনতিয়ারকন ব জন' কঙসা খায়ই সেঙন মা রিনাই, চাঙ-ব বিসি জুন্ধ খায়ই মানয়া ফানসে চাঙ-ব কিসা বরক জুন্ধ খাইনানি হিনই ফাইমানিন আতকগই রিঅই মাননাই বীখা চিকন তা উঙবাইদি বলঙ বুবাগ্রানি জুন্ধ চাঙ-ন কীপীলাই উঙনাই। বলঙ বুবাগ্রা চাঙ-ন পাইয়া নায়ই তঙদি।

বুবাগ্রা, বুবাগ্রা কুসু, সেঙ বুবাগ্রা, সরদার তাই, বলনতিয়া থাঙকা।

সদদবেসি রমই বুবাগ্রা কুসু বাই সেঙ বুবাগ্রা ফাইকা।

- সদদবেসি বুবাগ্রা : অঙ নম সিবাইঅ, অঙ নম সিবাইঅ।
- সদদবেসি সেঙ বুবাগ্রা : অঙ নম সিবাইঅ, অঙ নম সিবাইঅ।

বলমতিয়াররক ফাইকা।

- বলনতিয়াৰ : নৱগ বৱনি সইনাসিৱক-ব উঙখা ।
- সইনাসি : চীঙ সৱগ সাকানি সইনাসিসে চীঙ নৱগনি হান নাইনানি হিনই চীঙ নৱগনি অৱ ফাইঅ ।
- তাই কাইসা সইনাসি : নৱগনি অৱ বৱঅ দলিতনি বুবাথ্ৰা বাই বলঙ বুবাথ্ৰা জুধ নাঙনানি নাইলাই তঙখা হিনবা আব কুবুইদে ?
- বলনতিয়া : আউ আব কুবুই-ন বলঙ বুবাথ্ৰা জুধ খায়ই চিনি ম দলিত হান সেগই তীলাঙগই থাং পাইনানি ফন ।
- সইনাসি : আবতীই ককন নৱগ খীনাই তঙখাই নৱগনি অৱনি সিপাই সমত্ৰিৱক লামা লামাঅ পাহাৱাৱক ৱিলাইয়া দেবা ?
- বলনতিয়া : পাহাৱা ৱিলাইঅ পাহাৱাবা তামঙ ৱিলাইয়া উঙনানিবা ।
- সইনাসি : হিমদি নৱগনি পাহাৱা ৱিলাইমানিন কিসা নাইলাই ফাইলাইয়ানী নৱগনি হাঅ বীবতীই খাই পাহাৱান ৱিলাই ।
- [বলনতিয়া সইনাসি খৱকনাই খাই পাহাৱা ৱিমানিন গুৱগই নাইলাইখা দলিতনি সিপাই সমত্ৰিৱক হিনকাই লামাতীই জ-ত জাগাঅ-ন পাহাৱান থিককাই ৱিলাই-ন তঙলাইঅ]
- পাহাৱা ৱিনাইৱক : বাবা সইনাসি নৱগ সইনাসি বৱনি উঙবাইখা ?
- সইনাসি : চীঙ সৱগ সাকানি সইনাসিসে নৱগ অৱ দলিত নি বুবাথ্ৰা বাই বলঙনি বুবাথ্ৰান জুধ নাঙলাই- নানি হিনই খীনাঅই অ জুধন নাইলাইনানি হিনই চীঙ ফাইলাইমানি নৱগ সিপাই সমত্ৰি ৱক নৱগনি হান নাৱীকনানি হিনকাই কাহাম খাই পাহাৱা ৱিবাইদি ।
- পাহাৱা ৱিনাইৱক : চীঙ জান থাংগই-ন পাহাৱা-ন ৱিলাইয়ই তঙগ ।

সইনাসি, বলনতিয়া তাই, পাহাৱা ৱিনাইৱক থাংবাইখা ।

হৱিজয়, কানতিৱায় তাই সিপাইৱক ফাইকা ।

- কানতিৰায় : হরিজয় নীঙ-ব বুবাথানি সিপাই আঙ-ব বুবাথানি সিপাই তিনি চাঙ ম লামাঅ পাহারা রিলাইনানি কীলাইলাই তঙখা। যাঙতাই-ন বলঙ বুবাথানি বররক ফাতই মান', চাঙন নাইচমনানি বাগই। তিনি চাঙ কীনাই অরনি কুতুলয়াঅই জুইত খায়ই অর-ন পাহারা রিলাই মা তঙলাইনাই।
- হরিজয় : আউ কুবুই কক-ন অর-ন চাঙ তিনি জুইত খাইলাইয়ই পাহারান মা রিলাইনাই নীঙ বাই আঙ বাই-ন খায়ই। পাহারা রিয়াঅই যাঙতাই কাইসাসাঁক লায়ই থাংকাই চাঙ বুবাথানি বাই হিনজাগমানি কুল তঙনিয়া। ম লামাতাই জে লায়ই ফাইনাইন বীথাকদি হিনই বীথাকয়া হিনকাই তাই কুসতাম কক হিনই কাঁরাই, চিনি য়াগনি সেঙ বাই-ন দীৰাঁকসাখাই তানই বেরাইঅই রিদি তাই কুসতাম কক হিনই কাঁরাই।
- কানতিৰাই : আবতাই-ন খাইনানি তা তাই কুসতাম কক হিনই কাঁরাই।

অজরাঅ বলঙ বুবাথানি ককতুনতি ফাইকা।

- হরিজয় : এই বীথাকদি নীঙ সাব, আরনি য়াপ্রি কাইসা সেঅই মানগীলাক। সেকাই-ন নীঙ তাবুক-ন পাইসুকখা, বীথাকদি আর-ন।
- ককতুনতি : আঙ নরগন হাময়া খাইনানি বাগই ফাইয়া।
- হরিজয় : নীঙ সাব, বর ফাই, নিনি মুঙ তাম?
- কক তুনতি : আঙ নরগনি দলিতনি বুবাথান বলঙনি বুবাথানি আন তিতুন রিমানি আঙ অ তিতুনন নরগনি বুবাথানি তুননানি হিনইসে ফাইঅ, আন বুই ককতুনতি হিনই নুঙগ আঙ বুই-ন বুই-ন কক- তুন তুননাই বরকবা, আববাই-ন আনি মুঙ ককতুনতি।
- কানতিৰাই : আনি মুঙ হিনকাই কানতিৰাই আঙ বুবাথানি সিপাই নন চাঙ অরনি ফিয়গই রিহরই মানয়া নীঙ

ককতুননি

- চিনি বুবাগ্রান ককতুন তুনই রিঅইনানি হিনকাই
নন চাঙ য়াগ' খাঅই মা তাঁলাঙগ বুবাগ্রানি থানি ।
- : দ, নরগ আনি ককন পুইতু থাংয়া হিনকাই আন
খাঅই-ন তাঁইদি আঙ খাজাক তঙতীতীই ফান
নরকনি বুবাগ্রান আন রিহরমানি ককতুনন তুনই
মা রিঅইয় হিনদি ফাইদি আন নরগ খাপাইদি ।
- [হরিজয় সিপাই বাই কানতিরাই সিপাই কক
তুনতিন য়াগ' খাঅই হিনকা হিমদি তাবুকলে চাঙ
নন চিনি বুবাগ্রানি থানি তাঁলাগই থাংচিনাই ।
আবতীই খাই কক তুনতিন বুবাগ্রানি থানি তুনই
রিঅইখা]

হরিজয়, কানতিরাই তাই, ককতুনতি থাংকা ।
বুবাগ্রা, বুবাগ্রাকুসু তাই, সেঙ বুবাগ্রা ফাইকা ।

বুবাগ্রা

- : আনি বুবাগ্রা কুসু বাই আনি সেঙ বুবাগ্রা নরগ
তঙসাক আঙ উনায়, নরগন আনি হান্তে ন
সামেলেঅই নারীকনাইরক, নরগ য়াখাই তাই
সামেলেঅই নারীক মাননাই কীরাই । জুধন
নাঙনানি-ন হিনকাই চিনি করাই চিনি মায়ুঙ চিনি
জুধ খাইমানি রথরকন থিক খায়ই সাজগই
তনিবাইদি থিকথাক খায়ই ।

বুবাগ্রা কুসু

- : খলুমকা বুবাগ্রা, আঙ জতন-ন থাঙগই গুরিঅই
নাইখা জত-ন থিক-ন তঙগ । তাম মায়ুঙ তাম
জুধনি রথ, সুইন সামনতরক-ব জত-ন থিক-ন
তঙবাইঅ, তাই কু-ন ফান চাঙ উনানানি কীরাই
বলঙ বুবাগ্রানি সুইন' ফাইকাই জুধ-ন খীলায়ই
বুথারই খিবাইনানিসে ।

সেঙ বুবাগ্রা

- : খলুমখা বুবাগ্রা, আনি সেঙ আনি সুইনরকনি
সেঙরক জত-ন পাথর' হুলই কুবুক খায়ই
তনিবাইখা জ-ত জুধ খাইমানি সেঙরকন । তাই

উানানানি কীৰীই খাইয়ই জুধ খাইনাইরক
ফাইকাই-ন গাব গাব খাই সুরই বুথারই খিব- নানি
সিমি খাই তনিবাইখা।

অজরাঅ হরিজয়, কানতি রাই তাই ককতুনতি ফাইকা।

- হরিজয় : খুলুমকা বুবাগ্রা ইক নাহারদি ককতুনতি হিনই বিনি মুঙ, বন চাঁঙ খাঅই তুবই ফাইকা নিনি থানি রিফাইনানি হিনই। ব চাঁঙ পাহারা তঙমানি তাই লাইয়ই ফাইকাই চাঁঙ বন রমই খাঅই খিবিরিখা, উ-ল বন সীঙগই নাইখা হিনকাইব চাঁঙন সাত বলঙ বুবাগ্রানি ককতুনন নন রিফাইনানি ফাইঅ হিনই চাঁঙন সাকাই নন তুনই রিফাইকাতা তাবুক। নীঙ বন তাবুক জেসাফা-ন খাইসিদি।
- বুবাগ্রা : নীঙ তীমানি বাগই চিনি দলিত হাঅ ফাই সাদি নিনি মুঙবা তাম?
- ককতুনতি : খুলুমকা বুবাগ্রা আঙ নিনি দলিত হাঅ ফাইমানি হিনকাই আহাইসে চিনি বলঙনি বুবাগ্রা নন ককতুন কাইসা রিহর' ইক হিনদি আন রিহর- মানি, ককতুনন পরেঅই নাইদি ব তাম হিনই সীইখা নন। আঙ আনি হাথেঅ-ব বুইন বুইন ককতুন তুননাই হিনই বুই আন ককতুনতি হিনই ফারই রিঅ। আব বাই-ন আনি মুঙ কক- তুনতি।
- বুবাগ্রা : হরিজয় নরগ আনি অ-রফাইনাই ককতুনতি ন য়াগ খাঅই তুবমানিন তাবুক-ন থাংগই খেঙগই রিদি।
- [হরিজয় বাই কানতিরাই থাংগই ককতুনতিনি য়াগ খাঅই তনিমানি দীখাইন খেঙগই রিখা]
- বুবাগ্রা কুসু : বলঙনি বুবাগ্রা নন ককতুন হরমানি তাম ককন সীইকা বুবাগ্রা চাঁঙন কিসা সাদি।

- বুবাগ্ৰা : বলঙনি বুবাগ্ৰা আন ককতুন হরমানি হিনকাইব বাই চীঙ জুধ খাইলাইনানি নাঙগানী হিনই আন ককতুন রিহর'। অ ককতুন রিহরথানিঅ ব তে-ব সাঅ জুধ খায়ই জে পাইনাই ব-ন দলিত হানি হাম্বেঅ বুবাগ্ৰা উঙগই আচুকনানি ফন, আবতাই হিনই ককতুন হরথানি সীয়ই রিহর'।
- ককতুনতি : আঙ থাংকা বুবাগ্ৰা হিনই খুলুমই নখরই থাংকা।
ককতুনতি থাংকা।
- সেঙ বুবাগ্ৰা : নরগ সিপাইরক তাবুক খাই তিনিনি সিমি জুধ খাইনানি বাগই তিয়ার উঙলাইসিদি। জুধ হিনকাই তিনি ফান উঙগই মান' খানা হিন-ব উঙগই মান' তিনিনি বিসিঙগ-ন হরকি হর সালকি সাল জতন-ন সাঅই জত' লামাঅ-ন কাসই তঙবাইদি বিয়াঙতাই খাই বরক হাপাইন নাইকলই তঙদি। জেসা দিগিতাই ফান হাপপাই খাই তাই কুসতা ককন ফান তা সালাইদি রিসে রিদি কেবন-ন তা নাইসিকলাইদি কেবন-ব তা যাকারদি।
- বুবাগ্ৰা কুসু : থাংদি সেঙ বুবাগ্ৰা তাবুক-ন জতন-ন তিয়ার খাইরিবাইদি করাইনি রথ মায়ুঙনি রথ তাই জুধ খাই মানি রথরকন-ব সাজকগই তিয়ার উঙগই তঙবাইদি ফাইকাই-ন কুসতাম কক হিনই কীরাই মুকুম চীরাবই রিনানি খাইদি।
- বুবাগ্ৰা : আনি হাম্বেনি জ-ত বীরাই চেরাইরকন-ব য়াগ' দাসেঙ তীয়ই তঙদি হিনই সাবাইদি।
- বুবাগ্ৰা কুসু : আউ আঙ তাবুক থাঙগই ম ককরকন সাদি হিনই আউই খায়ই রিবাইয়ানী।

হরিজয়, কানতিরাই, বুবাগ্রা, বুবাগ্রা কুসু তাই, সেঙ বুবাগ্রা থাংকা।
মনপতি বাই, কুইনাতি ফাইকা।

- কুইনাতি** : অ কাপাল! চিনি দলিতনি বুবাগ্রা বাই বলঙনি বুবাগ্রা চবা নাঙলাইনানি নায়ইসে তঙখা, অ চবা নাঙলাইমানি বিসিঙগ চীঙ তাম খায়ই তঙলাইনানি সাঅই মানলিয়া। তাবুক নীঙলে বুবাগ্রানি বিহিগবা জেথানি ফান থাংগই তঙগইয়ই মানানী আঙলে বুবাগ্রা কুসুনি বিহিগবা কুসতাম জাগাঅ ফান থাঙগই তঙগই-নানি জাগা কাঁরাই।
- মনপতি** : আঙ ব নীঙ হাই-ন থাংগই তঙগইনানি জাগা কাঁরাই, তাবুক চবা-ন নাঙলাইখাই সাব তাম উঙগই থাংন সাঅই মানয়া। সাব-বা পাইন সাব-বা চেনন সাচুগই মানয়া। বরকসে বাঁসীকখাই থাইলাই-নবা তঙনিয়া জেতাই মীতাই জাগারগ-ন রথা-রথি উঙগই কাঁলায়ই থীয়ই থাংবাইয়ানী, বরকনি থাই সিমি-ন বলঙ গীনাঙগই চাকসাঅই থাঙবাইয়ানী, চবা হিনমানি অরনি ককদে। আঙ তিনি নীঙ বাই মালাইখা তাই বুফুবুঅ মালাইনানি, কাঁথাঙ তঙখাইসে নীঙ বাই মালাইনানি থীয়ই থাংলাই- খাই তাই নীঙ বাই মালাইলাঙলিয়া। নীঙ কাঁথাঙ তঙখাই আন মুইতু খাইদি আঙ কাঁথাঙ তঙ খাই-ব নন মইতু খাইয়ানী।
- কুইনাতি** : চীঙত জেসা তেসা চিনি বাঁসা বাঁতাইরকসে তাম উঙন তাম সবন আবসে আঙ বিসি খায়ই ডানাসিঅ।
- মনপতি** : নিনি সিমিদে উঙন জতনি বাঁসা বাঁতাইরকনি-ন লানসান উঙগই উরুই পুরুই উঙগই থাংবাইয়ানীতা। থাইলাইমানি-ত বাঁসীক-ব থাইলাইন তাম হিনই সানানি, আব তাই লেখাজীঙখা কাঁরাইখা আবতাই উঙগই থাঙগানী।

- দলি-তনি বুবাগ্রা : বলঙ বুবাগ্রা-ন সাত। আঙ জখন নীঙ বাই জুধ-ন
রিলাই পাইলিয়া নীঙন আনি সিঙহাসন' আচুকদি।
আনি সিঙহাসন নন আচুকদি হিনই আঙ যাকারই
রিখা।
- বলঙ বুবাগ্রা : দলিতনি বুবাগ্রা নীঙ আন সাতইদে নিনি সিঙ-
হাসন' আঙ আচুকনানি নীঙ সায়াই ফানসে আঙ
নিনি সিঙহাসন' আচুকনাই অ সিঙহাসন আনিসে
অদিকার। অ সিঙহাসন' নিনি অদিকার কীরাইখা
আর। আনি সিপাই সমত্রিরক নরগ বুবাগ্রা বাই বুবাগ্রা
কুসুন তুবই উ বুফাঙ কতর' খাই তনিফাইগীরাই
খীনাঅ আঙ বরগন জেসা ফা-ন খাইয়ানী।
- বলঙ বুবাগ্রা কুসু : খুলুমকা বুবাগ্রা তাবুক চীঙ দলিত হাঙে বাই চিনি
বলঙ হাঙেন চালকনানি নাঙগানু আরঅ সাব
তঙনাই অরঅ সা ব তঙনাই অ ককন সালাইনানি
বাগই খীনানি বিসিঙগ-ন পানদা কইসা কবকদি
বুবাগ্রা। অ পানদাঅ অরনি দলিতনি জ-ত
প্রজারকন তাই সরদার বলনতিয়াররকন-ব
রিঙবাইদি। অ পানদাঅ নীঙ জত ককন সাতই
রিবাইদি তাম তাম খাইনানি নাঙ-ন তাম তাম
নিয়ম খাই তঙনানি নাঙন আবরকন জত-ন
খুলাসা খাই সাতই রিবাইদি জতন-ন।
- বলঙ বুবাগ্রা : নীঙ ককন থিককাই-ন সাকা বুবাগ্রা কুসু, নীঙ
সামানি হই-ন আঙ পানদা রিঙনাই নীঙ থিক
তঙদি বুবাগ্রা কুসু।

বলঙ বুবাগ্রা বাই বলঙ বুবাগ্রা কুসু থাংকা।
বারিয়া বাই, কানতিয়া ফাইকা।

- বারিয়া : দা কানতিয়া তাবুক-ন চিনি বুবাগ্রা কীতাল উঙগই
থাঙকা তাবুকনি ম বলঙ বুবাগ্রা বেলাই সিতীরা

- হিনই খীনাবেলে খাজনা-ব বিসি বিসি কাই তীলাঙ
হিন' বীরীই চেরাইরক-নব রমফেরে সুকপেরে
খাই হিন' প্রজারক তাম খাই তঙ তাম খাই চাঅই
তঙ কিসা ফান নাইসিগই নাইয়া ফন। তাবুক খাই
চিনি দলিত হাশ্তেনি বররক মালাইসুকবাইনাই
বলঙ বুবাগ্রানি থানি তাবুক।
- কানতিয়া : নীঙ সামানি কক হিনকাই সই-নতা চিনি দলিতনি
বুবাগ্রানি হাই দেতাই উঙসি। চিনি বুবাগ্রাবেলে
সাব মীচায়া মা নুঙয়া তঙনাই সিগই তঙগ। কাইসা
মীচায়া হিনকাই বন চুবা চুবুই খাইরিহরই চারিঅ,
সমানে-ন সাব তামং খাই তঙ খবর নাহারই তঙগ।
প্রজারক লুমখাই সাকাই হায়া চায়া কীলাইখাই-ব
বিথি বারাইনি বাগই-ব চুবাঅই রিঅ। আবতাই
বুবাগ্রানসে বরক হামজাগয়াগীজা তাবুক খাই
মালে মালাই-বাইয়ানী নায়ই তঙদি বারিয়া নীঙ।
- বারিয়া : চিনি দলিতনি বুবাগ্রা আসীক প্রজারকন কাহাম
খায়ই তঙমানিসে বিনি ফাইসিঙগ বিনি প্রজারক
অরদেক ফানসে কীরীই, জতনি সীলাই হাময়া
খাইচুকখা সুবরাই বাই বুদুরাই, বরগ আর আর
পানদা খাই খায়ই চিনি দলিতনি বুবাগ্রানি মুঙগই
হাময়া হিনই মাঙ সাঅই চিনি বুবাগ্রানি প্রজারকন
ফেররিঅই খিবিরিবাইখা। আববাই-ন চিনি বুবাগ্রা
পাইয়া উঙগই থাংচিতা। তাবুক বলঙনি বুবাগ্রা
তাম খাই চালক নাইয়ই তঙদি।
- কানতিয়া : আববা আহাই-ন নুগই তঙখাবেলে ব অর
ফাইমানিবা রাঙ পুইসা আজেনানি বাগইসে ফাইয়,
নন হামরিনানি চারিনানি বাগইদে ফাইবা ?
- বারিয়া : বলঙ বুবাগ্রান থিক খাই নাইসিকলাই তঙলাইদি
ব তাম খাই দলিত হাশ্তেন চালক, চালকমানি
হাময়া হিনকাই বন-ব কাইসাসীক ফাইয়ানী,
চেনরিনাই নাইসিগই তঙদি তা কানতিয়া।

কানতিয়া বাই বারিয়া থাক্কা ।
বলঙনি বুবাগ্রা পানদা কাইসা কবকখা আ পানদাঅ জত-ন ফাইকা ।

- বুবাগ্রা : আঙ দলিত হাশ্তেনি বুবাগ্রান মেচেনই তাবুক আঙ দলিত হাশ্তেনি বুবাগ্রা উঙখা, নরগ তাবুক আঙ জে সামানি আবতাই খাই-ন মা তঙনাই আঙ জে তঙদি হিনমানি আবতাই খাই-ন মা তঙনাই । আগিঅ দলিত বুবাগ্রানি ইচ্ছা তাবুক খাই আনি ইচ্ছা ।
- বুবাগ্রা কুসু : খুলুমকা বুবাগ্রা নীঙ ম দলিত বুবাগ্রান জুন্ডঅ মেচেনই নীঙ তাবুক দলিতনি বুবাগ্রা উঙখা, তাম তাম খাইনানি নীঙ চাঙন আজ্জা রিদি ।
- বুবাগ্রা : পুইলাঅ-ন নরগ অরনি প্রজারকনি থানি খাজনা বিসি খায়ই রমদি বীরাই কাহাম কাহাম নায়ই আনি ম আনন্দ মহল' রমই তুবই রিফাইদি মাসা ফান তা ফিয়কদি রমই তুবই সাব খায়ই চবই রিফাইয়ই আনি আনন্দ মহল কুপুলুঙ খায়ই, তা লেরদি দাকতি-ন অ কামন খাইদি ।
- বলঙ সেঙ বুবাগ্রা : খুলুমকা বুবাগ্রা আঙ খাই তাম কামন খাইনানি আজ্জা রিদি বুবাগ্রা আঙ তিনিনি বিসিঙগন খায়ই পাইরিঅই রিনাই ।
- বলঙ বুবাগ্রা : সেঙ বুবাগ্রা নিনি কাম হিনকাই ম দলিত হাশ্তেঅ জে সিপাই তঙমানি আবরকনি অসত্র তঙমানি তাই সেঙ তঙমানি আবরকন জতন থুমই নাহারবাইদি । বরকনি থানি কঙসা অসত্র ফান তা তনদি জত-ন থুমই রগই নাহারবাইদি । অরনি জত সিপাইরকনি য়াগন খালি খায়ই খিবই রিবাইদি । আবনি উল' হিনকাই আনি বলঙ হাশ্তেনি সিপাই রকন তুবই রিফাইদি ম দলিত হাশ্তেঅ অ কামন খাইনানি তা লেরদি সেঙ বুবাগ্রা ।

- বলঙ সেঙ বুবাগ্রা : আজ্ঞা বুবাগ্রা তাবুক-ন তাবুকনি বিসিঙগ-ন নীঙ দাগেমানি কামন আঙ খায়ই খিবকাতা।
- বলঙ বুবাগ্রা : আঙ পালিমা মীতাই-ন পালাইঅ নরগ-ব জত-ন পালিমা মীতাই-ন মা পালেনাই। আঙ তাবুক পালিমা মীতাইনি মানদপ তাঙনানি অর খাই খুঙচাঅ পালিমা মীতাইয় নরক কালি-ন থাংগই মা খুলুমনাই। জে থাঙগই খুলুময়া হিনকাই আঙ বন নাহারই আনি পালিমা মীতাইয় তুবই তানই খিবি রিনাই।
দলিত হাশ্বেতি প্রজারক চীঙ পালিমা মীতাই পালেনাই।
- বলঙ বুবাগ্রা : নরগ জত-ন আনি ককন খীনাবাইখাবীলা, আনি ককন জত-ন নরগ খীনারীকবাইদি।

বলঙ বুবাগ্রা পানদান পাইরিঅই রিখা।
জত-ন থাংবাইখা পানদানি বররক।

- বলঙ বুবাগ্রা : দলিতনি বুবাগ্রা বাই বুবাগ্রা কুসু তাবুক-ব বুফাঙগ খাজাগ তঙগ, সেঙ বুবাগ্রা নীঙ বরগন বলঙ কুথুগ' তীলাঙগই বুফাঙ কতর নাইয়ই তাই যগই মানয়া জাত খায়ই খাঅই কাবুই ফাইদি, বরগন তা বুদি বরগ খাজাকতীতাই-ন থীয়ই থাংতন।
- বলঙ বুবাগ্রা কুসু : আজ্ঞা বুবাগ্রা আঙ তাবুক-ন থাংকাতা বরগন তীলাঙগই।

বলঙ বুবাগ্রা বাই বলঙ বুবাগ্রা কুসু থাংকা।

[বলঙ বুবাগ্রা কুসু দলিতনি বুবাগ্রা বাই বুবাগ্রা কুসুন বলঙ কুথুগ তীলাঙগই বুফাঙ কতরমান নায়ই খাঅই কাবুখা কাহাম খায়ই তাই দীর্খাইন

খেঙগই য়গই মানয়া জাত চারি খামানি উল' উইথাম উইবীরাই খায়ই চেকখাই নাইয়ই কাবুই ফাইকা অ খামানি জাগাঅ-ন থীয়ই থাঙচিথন হিনই। অ জরাঅ খাই-ন দঙগর কামিঙ সমতিয়া বাই বাদারাই ফাইকা সিকার খাইনানি বাগই অ বলঙ কুথুগ' বুবাথা বাই বুবাথা কুসুন খাঅই রিফাইমানি জাগাঅ সিকার খাইতে খাইতে]

সমতিয়া বাই বাদারাই ফাইকা।

- বাদারাই : অ দা সমতিয়া নাহারই নাইগীরাল ম বলঙ কুথুগ' সাব খরকনাই বুফাঙ কতরমা অ খাঅই তনিজাগ ইক নাহারদি।
- সমতিয়া : অ কুবুইয়াখাই তাম সীলাই! সীবা-ব উঙখা অ বররকবা তা থাংদিখু সাম' সিককদে উঙখা দাকাইত উঙখা ম খাঅই তনিজাগনাইরকবা। কাইসাসীক সিকক খগজাগই দাকাইত খাইজাগই বুথারনানি হিনই রমই খাঅই তুবই বলঙগ খাঅই তনিফাইকীনা, তঙগাদিখ নাহারই তা কুতুলগাদিখ। নাহারলাই তঙগীরানা সীরাপসা কেব ফাইয়া হিনকাই চাঙ কীনাই-ন গানাঅ থাংলাই নাইলাইয়ানী তাবুক নাহারদি সীরাপসা সিরিঙ সিরিঙ খাই তঙগীরাদিখ।
- বাদারাই : হাঁহি তাবুকসাক কে-নব ফাইমানি নুহুরয়া চাঙ বাঁচাই নাহারমানি বালকখাবেলে দা সমতিয়া।
- সমতিয়া : হিমদি খাই তীরীক তীরীক খাই য়াগসি য়াগীরা নাহারই হিমদি কেবন ফাইমানি নুগখাই উইসা বাই-ন কগই খিবই রিদি।
- বাদারাই : খাজাগনাইরকনি সাম' থাংগই হিনইঅ, এই নরগ সাব অরঅ বুফাঙ কতরমাঅ খাজাগগই তঙ

- সীলাই নরগ সিককদে মাঙখঙ না দাকাইতদে
আকনদে নরগ অর খাজাগই তঙবা ?
- বুবাগ্ৰা : চীঙ সিককয়া মাঙখঙয়া দাকাইতয়া আকনয়া, চীঙ
ম দলিত হাঙ্ৰেনি বুবাগ্ৰাসে। খাঅই কীলাঙগ।
- বাদারাই : হাই নরগ চিনি বুবাগ্ৰাসে উঙগানী খাই।
- বুবাগ্ৰা : আউ আঙ নরকনি বুবাগ্ৰা-ন।
- বাদারাই : ব খাই সাবব উঙখা সীলাই।
- বুবাগ্ৰা কুসু : আঙ খাই বুবাগ্ৰা কুসু।
- সমতিয়া : নরগ অর বর সকপাই সীলাই নরগন সাব অর
খাঅই রিফাই সীলাই আসীক বলঙ কুথুগ' ?
- বুবাগ্ৰা : চীঙ বলঙনি বুবাগ্ৰা বাই জুন্ধ খায়ই পাইলিয়া
হিনকাই চীঙন বলঙনি সেঙ বুবাগ্ৰা চীঙ কীনাইন
খাঅই তুবই ম বলঙ কুথুগ' বুফাঙ কতর নায়ই
অর-ন থীয়ই পাইসুগই থাঙতন হিনই চীঙ
কীনাইন খাঅই কীলাঙগই থাংগ।
- বাদারাই : সমতিয়া ম ককন চিনি লাঙমা থাগই থাঙ-ব বুইন তা
সাদি, হিমদি চিনি বুবাগ্ৰাসঙন তীইদি খেঙগই চিনি
দঙগর কামিঙনি দাইকুঙগ খাই নক তাঙগই তনিউনা
বুইন খগই তেব সাকাই হিমদি তীয়দি বরগন।

বুবাগ্ৰা, বুবাগ্ৰা কুসু, বাদারাই তাই সমতিয়া থাংকা।
দলিত হাঙ্ৰেনি সেঙ বুবাগ্ৰা ফাইকা।

- সেঙবুবাগ্ৰা : জুন্ধ খাইমানি জাগাঅ পাইয়া উঙগই সাইচুঙ সাক
কাইসা বুইনি বিসিঙ বিসিঙ খারই বলঙগ হাবই
থাংতে থাংতে হাতীঙ কামিঙ হিনমানিঅ থাংগই
সগইখা। আর সকপাইয় হিনই সাঅইখা। অ
হাতীঙ কামিঙনি বররক বিনি অ ককন খীনাঅই
বিসাস থাংগই অ কামিঙগ-ন বন নারীকগই
তনিখা খাইরকজাগলায়ই।

সেঙ বুবাগ্রা থাংকা ।
মালতি বাই রঙগতি ফাইকা ।

- মালতি : বাই রঙগ মিয়াঅ চিনি হাতাঙ কামিঙগ বরনি-ব
বিখা বিরনাই চীলা খরকচা ফাইনাই কিসানি চীলা
কাহাময়া আঙ খাই অ বরকন নাইসিগই মাঙ সে
তঙনানি মুচুঙগ, বাই নীঙ বন কাহাম কাই
নুগসুকয়াখনা-না আঙলে মিয়া ফাইদরব'-ন জুইত
খায়ই নাইসিগই নাইখা ।
- রঙগনি : হামানী-ন মালতি আঙ হাকচাল' তঙতীতাই কিসা
নাহারই নুহুরমানি কাহাম হাই-ন নুহুর', উঃ আসাঁক
চীলা কাহাম বিখা বিরই তঙনানি মীচাঙয়া আব
বিখা বিরনাই উঙনিয়া জুদ্ব খাইলাইয় হিনই
খীনাঅ অ জুদ্ব খাইতানিদে মুঙসাসাঁক উঙগই
খারই ফাইনাইদে উঙখা ।
- মালতি : বন সাব সাঅই মান হিন' বাই ।
- রঙগনি : জুদ্ব খাইনাই ফান উঙথন বিখা বিরনাই ফান
উঙথন ত-ব চীলা কাহাম মালতি ।
- মালতি : আউ বাই আবলে আবতীই-ন চীলা কাহাম হিনকাই
কাহাম-ন উল' সালাইয়ানী বাই তাবুক ফাইনাইন
তাই উইসা নাইসিকলাই নাইলাই- গীরানাখু ।

মালতি বাই রঙগতি থাংকা ।

[বলঙ বুবাগ্রা পালিমা মীতাইনি নগ তাঙগই
নাইথতক খাই বিখাই-ন জত-ন আউয়াই খায়ই
বিখা সয়ুঙ পালিমা মীতাইন আঙ তুবই ফাইকা
হিনই সাঅই বিবাইখাই-ন দলিত হাস্তেনি বররক
জে কুথুমই ফাইলাইমানি তাই সাঅই মানলিয়া
থাদে থাইন থাদে থাঙন সাঅই মানয়া খায়ই]

বলঙ বুবাগ্রা কুসু বাই তাই বরক রমনাই মুইসিরি ফাইকা।

- বলঙ বুবাগ্রা কুসু : নরগন-ত আগিঅ বলঙনি হাশ্তেঅ তনিমানি তাবুক দলিত' নরগন তুবই ফাইকা অরঅ। নরগ আগিনি হাই-ন হাই অ বরক রমনাই কাম-ন মা খাইনাই তবে খুব সাবদান খায়ই কামন মা খাইনাই। চাঁঙ আগিঅ তঙমানি বলঙনি হাশ্তেথনি সোলাই দলিত হাশ্তেথনি বরক তাই কিসা চালাক তঙগ মানজাগই থাংকা কাই চিনি বুবাগ্রানি ফাইসিঙ কাইসা ফা-ন তঙনিয়া।
- মুইসিরি : নীঙ চাঁঙন সানানি নাঙয়া বুবাগ্রা কুসু, চাঁঙ গীনাঙ গীনাঙনি বীসান চাঁঙ রময়া, পাইথাকমানি কীরাইনি বীসানসে চাঁঙ রমই তুবনাই। গীনাঙনি বীসান রমই তুবুখাই বরগ বিসি খায়ই নাই-তুকনানি বাগই উফলা কাফীলা উঙনাই, পাইথাকমানি কীরাইনি বীসান রমই তুবুখাই নাইতুকনানি হিনই-ব আসীক উফলা কাফীলা উঙগই মাননিয়া তামঙগই হিনবা বরক কীরাইনি বাগই।
- বলঙ বুবাগ্রা কুসু : বা! নরগ মুইসিরিরক ককন থিক খাই-ন সাকা নরগ কীরাইনি বীসা-ন মাঙ রমই তুব বাইদি। আমাবুইসাক কাসগই তঙখা আমাবুইসাকগ খরকসা তাই পুরনিমাত খরকচা নাঙগ। নরগ আমাবুইসাকগ খরকসা পুরনিমাত খরকসা রমখাই-ন উঙগ তাই নাঙয়া আসীক-ন কক।
- মুইসিরিরক : চাঁঙব খীনানি সিমি-ন নখরকাতা।

বলঙ বুবাগ্রা কুসু তাই মুইসিরিরক থাংকা।

[বলঙ বুবাগ্রা ফাইমানি উল আমাবুইসাকগ
খরকসা তাল পুরনিমাফুরু খরকসা বরক কীমাঅই
তঙখা, অ কীমানাই বররক বিয়াঙ-ব কীমাঅই
থাং কে-ব সাঅই মানয়া, বিয়াঙ-ব তামঙ থাং
কীমাঅই থাংমানি বররক-ব জত-ন পাইথাকমানি
কীরাইনি বীসা মামাঙ]

বারিয়া বাই কানতিয়া ফাইকা ।

- বারিয়া : দা কানতিয়া তাম চিনি অর বলঙ বুবাগ্রা ফাইমানি
উলনি সিমি আমাবুইসাগ' খরকসা তাল পুরনিমাঅ
খরকসা খাঅই বরক কীমাঅই তঙলাইখাবেলে ।
- কানতিয়া : কুবুইয়া খাই তাম সীলাই উয়াঙ-ব কীমামানি
খীনাঅ আয়াঙ-ব কীমামানি খানাঅ, আব-বা
তামসীক আবতাই খাই কীমাঅই তঙখা সাঅইসে
মানলিয়াবেলে মীসাদে চাখা মুইসেলেদে মনগখা
কুসতাম ফান চাবইসে মানলিয়াবেলে ।
- বারিয়া : নাইদি দা কানতিয়া অ কীমাঅই থানাইরক-ব খালি
পাইথাকমানি কীরাইনি বীসা মাঙ কীমাঅই থাংগ ।
কীমাখাইবা গীনাঙনি বীসা কীমানানি নাঙবেলে
সীলাই । ম বরক কীমা- মানি ককন হিনবা আঙ
তাম হাই উঙজাগ' নীঙ খাই মন তাম উঙজাগ দা
কানতিয়া ডানসুগই নাই নাইলা নীঙ ।
- কানতিয়া : আঙ হিন-ব তাই তাম হিনই সাচিনানি । তবে বলঙ
বুবাগ্রা আঙ খাই আগি-ন বরক হাময়া হিনই
খীনাহর' । তাই-ব বালকগীরাথনতা বালকরীরীক
সাঅই মানরীরীক উঙনাইতা ।

বারিয়া বাই, কানতিয়া থাংকা ।

সুবুরাই বাই, বদুরাই ফাইকা ।

- বুদুরাই : দা সুবুরাই চাঁঙবা বলঙনি বুবাগ্রানি ফাইসিঙ তঙলাইমানিবা চায়াসে উঙখীনাবেলে, তাম কাহাম উঙগানী হিনমানি-বা হাময়াসে উঙগই তঙখাবেলে। তাবুক খাই খাজনারকসে বিসিকাই মা রিডানী হিনই বিসিকাই মা রিলাইখা। তাবুক খাই নগ' বীরীই সিকিলানসে নারীকলায়ই মানলিয়া জত-ন কুইনা খাঙগই তীলাঙ থাংবাইখা। বীরীই সিকিলারকন কাইসান ফান নারীগই মানলিয়া।
- সুবুরাই : দ তে-ব বিসি খায়ই বালগগীরাখনতা সাঅই মানানী।
- বুদুরাই : তাই তামন সাঅই মাননানি তঙসিবা উসুক বাই-ন সাঅই মানখাবেলে। ব ফাইপামানি সিমি-ন বরক-ব কীমামানি কুল কীরীইখা অ বর-রক বিয়াঙ-ব কীমাঅই থাং সাঅই মানয়া মীসাদে চাঅই খিব তইলিঙদে খেপচা সাঅই মানয়া কেব, তিনি অর কীমাখাই খীনা উর কীমাঅই তঙখা।
- সুবুরাই : বলঙনি বুবাগ্রা আবর্তীই-ন জদি খায়ই তঙমানি তঙখাইব বিয়াঙ যগই থানানি মানজাগনাই-ন উইসালে উইস।
- বুদুরাই : মাই মীচায়াসে নকবুরুম নকবুরুম উঙলাই তঙখা, তাবুক মাইতীক মীথালয়া মাঙসে জতনি নগ-ন আগিনি চিনি বুবাগ্রানি আমল' মীতীই উঙয়া বেলে তাবুক খাই তাই সাঅই মানলিয়া আউলা উঙলাই তঙখা জত-ন।
- সুবুরাই : দ নাইগীরাদিতা তে-ব তাবুক তাই তাম খাইনানিবা।

সুবুরাই বাই বুদুরাই থাংকা।
সলাই, বলাই মুইসিরিরক ফাইকা।

- বলাই : মুইসিরি তাই খরকসা মুইসিরি-ন সাঅ চাঁও উসাঁকাঙনি সিমি বরক নাইতুকলাইমানি সেব মানয়া বাই তিখিলাইসে মানলাইয়া উঙলাই তঙখাবেলে ম তাবুক তাম খাইনানি উঙখা। বরকন রমই তিখিলাই তুবই মানয়া হিনকাইত পালিমা মীতাইঅ-ব বরকন মা তাননিয়া বুবাধা বাই-ব হিনজাগানী চিনি বহগ'-ব মাই কীলাইনিয়া চিনি বিহিগ বীসা-ব মাই মীচায়া উঙগই কাবলাইয়ই তঙবাইয়ানী, ম তাম খাইনানি উঙখা তাবুক।
- সলাই : আঙ বুবাধা বাই-ব হিনজাগই মাননিয়া, অগ বুকচা-ব তঙগই মাননিয়া, বিহিগ বীসা-ন মাই মীচায়ান নাইসিগই তঙগই মাননিয়া, চাঁও জেসা খাইফান মাসান মাসেমা রমনাই নাই- তুকলায়ই তিনিনি বিসিঙ-ন।
- বলাই : আবতাই ফাতসাখাই রমই তুবনানি সেব কাইসা তঙতা, আবন খাই তাবুক থাংকাই তাবুক-ন তুবই ফায়ই মানতা রমই।
- সলাই : বর সীলাই বলাই আবতাই সেব, উঙখাইবা হিমদি তাবুক-ন রমই তুবলাই ফাইয়ানী সাদি বর আবতাই সেব তঙ।
- বলাই : ইকেলে চাকতি রানদিনি বীসাজীক মাদুমি, অ মাদুমিনি বুমা তাবুক নগ' কীরীই বুইনি হুগ' কামলা খাইনানি থাংগই তঙখীনা, তাবুক থাং কাই-ন ফাতসাখাই রমই তুবই ফাইনানি সিমিসে।
- সলাই : আউ কুবুই য়াখাই তাম সীলাই হিমদি তাবুক-ন বন রমই তুবই ফাইমানি হাম'তাই কিসা তঙখাই-ন বুমা ফায়ই সকপাইয়ানী, আহাই খাইন চাঁও রমই তুবই মাননিয়া, হিমদি তাবুক-ন দদি।

সলাই বাই বলাই মুইসিরিরক থাংকা।

হরিজয় বাই কানতিরায় ফাইকা।

- হরিজয় : চিনি অর বলঙনি বুবাগ্রা জে তঙসাক চিনি তাই সুক সানতি কীরাইখা, তিনি বরক কীমালাইয়ানী, খীনা মীচায়া মা নুঙলাইয়া উঙগই থাইলাইয়ানী তাই লুমই সাঅই খিঅ কাবাত উঙগইত থাইয়-ন, চীঙ বর থাংগই বানচেলাইনানি আবতাই জাগাসে নুহুরজাগলিয়া বেলে ।
- কানতিরায় : তাই বর থাংলাই মাননাইবা অর-ন মা তঙলাইনাইতা । অর তঙতীতাই-ন বুবাগ্রা চীঙন সাতক পিতক খীলাইমানি ককন মা সালাইনাইতা নীঙ বাই আঙ বাই-ন চিনি বুবাগ্রা, চিনি বুবাগ্রা কুসু, চিনি সেঙ বুবাগ্রাসঙত থীয়ই থাংবাইখা বরগ তঙখাই-ত বরক বাই সালায়ই ককন চাবলাই মানখামন । বরক-ব কীরাইখা তাবুক সাব বাই ককন চাবলাই তঙলাইসিনানি ।
- হরিজয় : বরগ তঙখাই সিমিদে ককন চাবলাইনানি, বরগ কীরাইখাইবা ককন চাবলাই মানয়াদে অয়নাই খাইজাগ তঙমানি ককনবা ?
- কানতিরায় : চীঙ বিসিঙ বিসিঙ মীতাই ককন সালাইদি তেব তেব খায়ই, মীতাই খাইদে তঙগই মান আসীক সাতকজাগই পিতকজাগই ।
- হরিজয় : কানতিরায় ফিয়া মীতাই কক সালাইমানি হা ফা-ন খীনায়া উঙনানি হানি-ব বুখুনজু তঙগ, নাইদি আসীক-ন নীঙ বাই কক ।

হরিজয় বাই কানতিরায় থাংকা ।

মাদুমি, সলাই, বলাই তাই মুইসিরিরক ফাইকা ।

- মাদুমি : অ দাদাসঙ নরগ তিনি বিয়াঙ সীলাই খরকনাই খরকনাই, তাম মা বাইদে কাম তঙ? মা খাই বুইনি হুগ' মুলা উঙনানি হিনই থাংগ ।
- সলাই : নীঙ সাইচুঙদা তিনি নিনি নগ' মাদুমি ?

- মাদুমি : আউ দাদা তিনি আঙু সাইচুঙ-ন নগ'।
- বলাই : নিনি মা খাই বুফুরু নগ' ফাইনানি কক সীলাই ?
- মাদুমি : মাখাই তাবুক দিবর' ফাইয়ানি কক-ন, মাইচু
তীলাঙগই থাংগ ব সাইরিক য়াখাই সকপাইনিয়া ।
তাম নরগ সাব বাই কাম নাঙগই ফাইবা ?
- সলাই : নীঙ বাই-ব কাম নাঙগ, নিনি মা বাই-ব নাঙগ ।
- মাদুমি : সাদিখাই আঙ বাই কাম নাঙগ হিনকাই ।
- বলাই : হিমদি খাই উ দাইকুঙগ ।
- মাদুমি : সানানি হিনকাই অর-ন সাদি, আঙ দাইকুঙগলে
থাংগই মানয়া । সলাই বাই বলাই আফুরুখাই মাদুমিন
খরকনাই খাই রমই বসতা বিসিঙগ খাই দাতই বসতা
বুখুক-ন খাচবই খিবকা তাই য়গই মানয়া জাত খায়ই,
উল খাই অ বসতান বলাই বাই সলাই বখরগ'
বুজুলাই বলঙ তাই খাই বুই বাই নুগজাগয়া জাত
খায়ই বলঙ তাই খাই থাংলাইখা তেব তেব খায়ই ।
উল' খাই মাদুমি বীখাঅ বুশি থাইচা কারেখা আঙ
সীতাই- নানি মুচুঙগ হিনই সাকাই সলাই বাই বলাই
বন বসতা বিসিঙনি কারেঅই সীতাইদি হিনই
রিহরখা বলঙ বিসিঙগ খায়ই মাদুমি আরনি-ন তেব
তেব খায়ই বলঙ কুথুক বিসিঙগ হাবই খারই য়গই
থাংকা । সলাই বাই বলাই খাই নাইসিঙ-ব
নাইসিঙ-মানি জাগাঅ থাংগই নায়ই-বা আর মাদুমি
কুসে কীরাইখা, বিয়াঙব কীমাঅই থাংকা সাঅই
মানলিয়া । সলাই বাই বলাই বলঙ গীনাঙগই
পাইসুগই নাইতুগই নাই-ব অ মাদুমিন মাসে
মানলিয়া বিয়াঙ-ব কীমাঅই থাংকা সাঅই মানলিয়া ।

সলাই বাই বলাই থাংকা ।
মাদুমিনি বুমা চাকতি রানদি ফাইকা ।

চাকতি

: নগ' ফায়ই বীসাজীক মাদুমিন নাইতুক ফাইকা ।
হাই আনি সাজীকমা মাদুমি বিয়াঙ থাংকা সীলাই
হিনই কুনাকুনি নকবীরা নকবুরু বুইনি নগ নাগ
জত জাগাঅ-ন নাইতুকবাইখা মানলিয়া ।

চাকতি কাবখা ।

সাজীকমা, সাজীকমা, সাজীকমা, সাজীকমা ।

আনি সাজীকবা নীঙলে বিয়াঙ-ব কীমাঅই থাংকা ।

সাজীকবা আনি বীখালে মীলাঙ চাখা ।

আনি সাজীকন য়াফাঙলে বুচুক নাইসিক তঙমানি

নীঙলে তামঙগই কীমানানি ।

বুফালে কীরীই সাইচুঙ পুসিঅই তুবমানি

তাবুক আঙ সাইচুঙ তাম খাইনানি ?

বুখুকলে কীরীইনি সাজীকনবা

নীঙলে সাবন তাম খাইবা ।

তাখুকলে কীরীইনি সাজীকনবা

নীঙলে সাবনি গিবানদার' হরন রিবা ।

মীসাদে চাখা চিবুকদে সুকখা সাঅইলে মানলিয়া

আনি কীপাল হাই বুইলে কীলাইয়া ।

মীসালে চাখীলাই বীর্থীই নুগখামন

বীখান বানদেখামন ।

চিবুকলে সুককীলাই কীলাই তঙখামন

বীখান বুজকখামন ।

মকল বাই নুগয়া বিয়াঙব থাংকা ।

সাজীকবা তাম-ব উঙখা ।

নীঙ বাই য়াখাইলে আঙলে মাই চায়া

নীঙ বাই য়াখাই-ব থুয়া ।

নীঙ বাই য়াখাইলে আঙলে কক সায়া ।

নীঙ বাই য়াখাইলে উঙয়া ।

সাজীকমা, সাজীকমা, সাজীকমা, সাজীকমা ।

চাকতি থাংকা।
মাদুমি ফাইকা।

মাদুমি : হিনকাই আঙ তাই নগ' কিফিলই থাংলিয়া বরক
বাই-ব নুগজাগলিয়া আঙ বলঙগ-ন তঙসিনাই।
আঙ তাবুক বুফাঙ কতরনি হাকর নাইতুগই অ
হাকর'-ন হাবই তঙসিনাই, আঙ তাবুক বরক বাই
নুগজাগখাই বুবাগ্রানি বুখুনজু কীলায়ই থাংগানী
আহাই খাই-ন আন রমই তীলাংগই পালিমা
মীতাইয় তীলাঙগই তানই খিবি রিউানী।
আববাই-ন তাই নগ'ব থাংলিয়া বরক বাই-ব
নুগজাগলিয়া আঙ ম বলঙগ-ন তঙসিনাই।
মাদুমি বুফাঙ কতরমা হাকরন নাইতুগই
বুফাঙনি হাকর কতরমান মানই অ হাকর'-ন হাবই
তঙখা।

মাদুমি থাংকা।
বলঙ বুবাগ্রা বাই বুবাগ্রা কুসু ফাইকা।

বলঙ বুবাগ্রা : বুবাগ্রা কুসু খীনা হিনকাই-ন আমাবুইসাক ফায়ই
তঙখা, বক নিনি বরক রমই তুবনাই বলাই বাই
সলাই মুইসিরিরক তাবুক-ব বরকন রমই তুবই
রিফাই মানয়াখ।

বুবাগ্রা কুসু : মুইসিরিরকন বরক বীরাই খরকচান রমখা হিনই
খীনাবীলা বক তাবুক-ব কুন খবর খাই মানয়াখ
তাম-ব উঙলাই তঙখা সিয়া-দ।

বলঙ বুবাগ্রা : বুবাগ্রা কুসু নীঙ তাবুক-ন বলাই বাই সলাই-ন
আনি অরঅ তুবই ফাইদি নুঙগই, বরক তাম খাইখা
সীঙগই নাইগীরানা।

বুবাগ্ৰা কুসু : আজ্ঞা বুবাগ্ৰা আঙ তাবুক-ন বরক-ন নিনি অরঅ
রিহর উানী আঙ থাংগীরানা নাখু তাবুক থাংগই
সিপাইরক দাগেতই রিখাই-ন সিপাইরক বরগন
রমই তুবই ফাইয়ানী।

সিপাইরক তাই বলাই সলাই ফাইকা।

সিপাইরক : খলুমকা বুবাগ্ৰা। ইক নীঙ নুঙমানি বরকন তুবই
রিফাইকা বলাই বাই সলাইন তাবুক নীঙ বরগন
জেসা ফা-ন খাইদি।

বলঙ বুবাগ্ৰা : সিপাইরক নরগ থাংদি তাবুক।

সিপাইরক থাংকা।

বলঙ বুবাগ্ৰা : খীনা-ন আমাবুইসাক উঙগই তঙখা নরগ বরক
রমই তুবই ফাইমানি বরঅ চবই তনিখা। অ চবই
তনিমানি বরকন তিনি হর-ন তুবই পালিমা মীতাই
তনিমানি নগ বিসিঙগ-ন কুনাসা কাই খাঅই
তনিফাইদি, খীনা আইচুগ খাই-ন বরকন বলি
রিনানি উঙগানী। বুই নুগয়াসানি থাংদি তাবুক-ন
দদি নাহারই ফাইদি অ রমজাগনাইরকন।

বলাই : বুবাগ্ৰা তানখাইবা কতকনি থাই নুগানী বুখাইবা
ফিকুঙ যামফীরা চানু চাঙ বরকন রমনানি খাই-ত
রমখা চাঙন সীতাইনানি হিনই সাকা হিনকাই-ন
চাঙ সীতাইখন হিনই ফিয়গই রিজাগখা, ফিয়গই
রিজাগখাই-ন বলঙ বিসিঙগ হাবই বিয়াঙ-ব খারই
থাঙকা সাঅই মানলিয়া, বিয়াঙব থাংকা নাইতুক-ব
নাইতুক-ব তাই কাৰেঅইসে মানলিয়া বুবাগ্ৰা।

সলাই : বুবাগ্ৰা চাঙত ম আমাবুইসাকনি বাগই বরক রমই
তুবই মানলিয়া ফা-ন পুরনিমাফুবু হিনকাই চাঙ
জেসা কাই ফা-ন নন বরক রমই রিফাইনাই বুবাগ্ৰা।

বলঙ বুবাগ্ৰা : এই সিপাইরক নরগ তাবুক-ন অর ফায়ই
সকপাইদি।

সিপাইরক ফাইকা।

বলঙ বুবাগ্ৰা : নরগ থাংদি ম বলাই বাই সলাইন খাই তীলাঙগই
আনি পালিমা মীতাইনি গানাঅ কাহামকাই খাই
তনিঅইদি যগই থাঙনা নাইদি। যগই থাংকাইলে
খীনা আনি পালিমা মীতাইয় নরগন তাননানি।
থাংদি তীলাঙ থাংদি খাই।

সিপাইরক তাই বলাই সলাই থাংকা।

বলঙ বুবাগ্ৰা : আঙবা আনি পালিমা মীতাইঅ বরক তানয়াঅই
তঙনানি ফন, আনি হামনানি চানানি বাগই আনি
পালিমা মীতাইঅ বরক তাননাই-ন তাননাই।

বলঙ বুবাগ্ৰা থাংকা।

অচাই বাই বলাই সলাই ফাইকা।

অচাই : নরগত খীনা আইখাই-ন আঙ বাই তানজাগ-
বাইনাই বুবাগ্ৰানি সিপাইসে নরগন তুবই রিফাইঅ
হিনকাই নরগ তাই যকলিয়া তান জাগয়াই, খীনা
আইখাই-ন তিয়ারসে উঙবাইদি তুকুঅই মুসুঅই
আঙ-ব তানখাই তানই খিবনানি নরগন।

বলাই : দা অচাই নন চাঁও যাকুঙ রমই খুলুম' নীঙ চাঁওন
তানয়াঅই কাতেরি রিহরই মাননিয়াদে? নন চাঁও
জুগে জুগে-ন মুঙ খায়ই থাংগানী।

সলাই : দা অচাই চাঁওন নীঙ জেসা খাই ফা-ন তাননানি
কাতেরিদে মান-ন নাইদি। চাঁওন তাননানি কাতেরি

- মানখাই নন চাঁও জে থাইয়াসাক মুঙন খায়ই থানী ।
 আরনি বিসিঙ নীও চাঁওন তানই খিবিকাখাই নন
 সাব তাই নিনি মুঙন খাইনানি ।
- অচাই : আঙ কাম থাইচা খায়ই মান' ফিয়া ।
 বলাই : তাম কাম সাদি দা অচাই ।
 অচাই : নরগ চিনি দলিত হাংস্বেঅ তঙগই মাননিয়া ফিয়া,
 নরগ খুব হাকচাল' খারই মা থাংগানী বুই বাই
 নুগজাগয়া জাত চারিঅই । নরগ গসেদি খারই
 থাংনানি হিনই ।
- সলাই : থাংনাই-ন চাঁও খুব হাকচাল' ।
 বলাই : থাংনাই চাঁও খারই ।
 অচাই : আঙ তাম খাইন সাঅইদে মান, বুবাগ্রা ফাইয়া-
 সানি সাইজীলা কসমন তানই ব ফাইকাই ফুণুগই
 রিডানী ম-ন সলাই বাই বলাইনি বীথাই হিনই ।
 থাংদি তাবুক-ন নরগ খারই থাংদি ।

অচাই বাই বলাই সলাই থাংকা ।
 বলাই বাই সলাই ফাইকা ।

[বলাই বাই সলাই অচাই বাই সলাই অচাই
 খাররিঅই রিহরখাই-ন নগ' ফায়ই বিহিগ বীসান'
 তীলাঙগই বলঙ কুথুগ খাই নায়ই কেব অ বলঙগ
 থাংয়া জাগান নায়ই খারই থাংকা । আর থাঙগই
 হানি হাকরন নাইতুগই হানি হাকর খায়ই হাবলায়ই
 তঙগইখা । পুইলাঅ হিনকাই বলঙনি ফল ফকলন
 নাইতুগই খাগই চালাইখা । উল' খাই বলাই বাই
 সলাই সেঙকারি খচাই নারীগই সইনাসিনি বুপ
 নাহারই সইনাসিসে হিনজাগই তঙখা । অ
 সইনাসিনি বুপ নাহারই-ন বিখা বিরই পুইলা পুইলা
 চালাই তঙখা বলঙনি নখরই বুইনি বুইনি নগ' ।

আবনি উল' হিনকাই অ বলঙগ-ন হুগ খায়ই
চালাই তঙখা। অ হুগ খাইমানি জাগাঅ-ন
গাইরিঙন তাঙলাই তঙলাইখা]

বলাই বাই সলাই থাংকা
দলিতনি বুবাগ্রাবাই, বুবাগ্রাকুসু ফাইকা।

- বুবাগ্রা : বুবাগ্রা কুসু ম দঙগর কামিঙনি বররকবা কিসানি
কাহামরকয়াবেলে চাঙ আসীক সাল কাঁবাঙমা
খারই ফায়ই তঙফাইমানিসে কে ব ফুতফাত
খাইনাই ফানসে কাঁরাই। চাঙ বরগন তাম চুবা
চুরুনাই ফাইদি চাঙ কাম থাইচা খাই- লাইয়ানী।
- বুবাগ্রা কুসু : তাম কামন খাইলাইনানি বুবাগ্রা ?
- বুবাগ্রা : চিনি দলিত হাঙ্গেন বলঙনি বুবাগ্রা ফায়ই তাম
তাম খাইকা নাইসিগই নাইদি খাজনা-ব বারেইঅই
খিবকা, নগ' বাঁরাই সিকিলা-ব তনিঅই মানলিয়া,
বরক-ব সমানই-ন কাঁমাঅই তঙগ, মাঁচায়া
মানাঙয়া-ব আসীক-ন বাঙখা মাই মাঁচায়া মাঙ
নকবাঁরীম নকবাঁরীম উ বাসমাঙ উঙলাই
তঙবাইখা। অ তাবুক চাঙ সালাইমানি ককন চাঙ
তাবুক তঙমানি দঙগর কামিঙনি সমতিয়া বাই
বাদারাইন সাঅই রিখাই-ন বরগন হুইজাগ
হুইজাগই পানদা চিকন চিকন খাই কবগই সাখাই
চিনি ফাইসিঙ বরক বারেঅই থানাই, আহাই
খাই-ন চাঙ বলঙ বুবাগ্রা বাই জুন্ধ খায়ই বন
মেচেনই মাননাই।
- বুবাগ্রা কুসু : নিনি অ কক থিক-ন তঙগ, নৌঙ বাই আঙ খাই
জেসা খাই ফা-ন বানচেলাইখা সেঙ বুবাগ্রা ফা-ন
চাঙ হাই কাই বানচেঅই থাংকাই চিনি তে-ব বিসি
সুবিদা উঙগই থাংকামন।

বুবাগ্রা

: চাঁও সালচা নীও আও তাই সমতিয়া বাদরাই খাই
চুরুপসাখাই বুই নুকয়া জাগাঅ খাই আচুক-
লাইনানি।

দলিত বুবাগ্রা বাই বুবাগ্রা কুসু থাংকা।
মাদুমি ফাইকা।

[মাদুমি সাল' হিনকাই বলঙনি থাইপুঙ,
থাইচুক, আতা, বেদনা, থাইলিক, আঙগুর, তর
কই, কক, জাম, লিচু তাই জে বলঙগ ফল
তঙমানিন খাগই ব তঙমা জাগাঅ বুঙগই তনি
ফাইঅ বুরুঙ খায়ই। সাইরিক সাল থাঙগই হর
উঙখাই মাদুমি হর' ন খারই বুইনি নগনি রি থুমই
তুব' রিজাই রিগিনাই রিসা থুমই তুব' তাই মাইতুক
মুইতুক থুমই তুব দা দামরা তু-ব মাইবুঙ হাতি
সম মসরক থুমই তুব', আবতাই খাই বিসা
বিসিকনাই চানানি বাগই মাইবুঙ হাতি সম মস'রক
থুমই তুব', আবতাই খাই বিসা বিসিকনাই চানানি
বাগই মাইবুঙরকন থুমই তুবই-ব তঙমানি হাকর'
সুপুঙগই তনি ফাইঅ। সলাই বাদুখুঙ তাই জুধ
খাইমানি সেঙরক-নন তুবই তিসাই তনিফাইঅ
বিনি তঙমানি হাকর বিসিঙ-ব বলঙ কুথুক
বিসিঙগ তঙ ফান চানানি নুঙনানি বিয়াল কীরাই
খায়ই তঙগই তঙগ]

মাদুমি থাংকা।
হাতাও কামিঙনি মালতি বাই, রঙগনি ফাইকা।

মালতি

: বাই রঙগ অ চিনি হাতাও কামিঙগ ফাইনাই বরক
কীরাই বিখা বিরনাই-বা রি কিচিক মিচিক চুমুই

কানই তঙজাতা। বন রি কাহাম চুম কাহাম
চুমরিঅই কানরিঅই তনিঅই মানখাইদে আহাই
কাই চীলা হামকামন তাই সাঅই মানগীলাখামন
চীলা হামমানি। ফুঙ আয়খাই-ন বিরনানি হিনই
থাংজাঅ সাইরিগ ফাইকাই-ন আহাই থক থুকয়া
খায়ই সাইচুঙ সঙগই চাজাঅ। বিনি নগ-ব বিয়াঙ
সিয়া-দ।

রঙগনি

: চিনি কামিঙগ পুইলা ফাইপুরু হিনকাই যাঙ
পুবগালানি-ন ফাই হিনবেলে, কামিঙ খাই বর
সাঁঙজগয়াত। আঙ সাঁঙগই নাইয়ানী উইসাসাঁক
নিনি কামিঙ বর দাদা হিনই। বুমা বাই বুফা-বা
তদে তঙ সাঅই মানয়াত, বুমা বাই বুফা তঙখাই
মাতীই বিখান বিরই চাতীরাঁঙ তঙনিয়া-দ হিন’।
তাখুক বুখুক-বা তদে তঙ সাঅই মানয়াত।

মালতি

: দ বাই রঙগ নীঙ থাইচা রীচাবই খীনারিদি খাই।

রঙগনি

: আঙ কুসতাম ফান রীচামুঙ মানয়াবেলে মালতি।

মালতি

: জে নীঙ মানমানি আবন-ন রীচাবই খীনারিদি
বাই।

রঙগনি রীচাব’।

অ খুম নীঙলে তামঙগই ফুতি, মদে নিনিলে রিতি

নীঙলে ফুতিঅই চাঁঙন ফুনকখা উদে উঙনবা গতি।

দলিত থাংগই চাডানী হাতি, কানীই খাই নীঙ বাই হুঙগানী সাতি

নীঙলে ফায়ই তঙখাইবা পাতি।

বলঙনি দুকলে দুকসা সঙদারি নিনি ফুতিমা তঙলে মারি

নীঙলে আন হরনানদে কক গরি।

খুমুলীঙ বলঙগ যঙখাজি সারি, নীঙলে নাইচমদে তঙখা বলঙ সিকারি

নন আঙ তুবইদে মান-ন কারে।

দাসা ককইলে দাসা দামারি, আঙলে উঙ তঙখা নন-ন খারি

তঙগইলে নাইয়ানী নীঙ বাই-ন আরি।

সাবলে নন খুম নাইথক বাররি, আনলে মায়বাবুসঙ পুসিঅই তরি
 মায়া বারিয়া নীঙলে রিখাকাই ননদে চীঙলে সারি।
 হানি বিসিঙ-ব দলিত পানথর, তাগখা ননলে নাইথক কাই কাইথর
 নারীগই তা তঙদি নীঙলে কীচার' বথর
 হাউনলে থাংকাই ফাইয়ানী বাদর, আঙলে বিসিকাই খাইয়ানী আদর
 ননলে তুবই আঙলে ফাইকা খাই তা উঙদি গচর মচর।
 নীঙলে আচাইখা হানি সাকাঅ, ননলে হামজাগমা তঙমানয়া খাঅ
 আনি খানি বিসিঙগ নিনি ককতমা সাঅ।

মালতি বাই রঙগতি থাংকা।
 বারিয়া বাই কানতিয়া ফাইকা।

- বারিয়া : দা কানতিয়া তাম নক বুঝুম নক বুঝুমসে উবাস
 উঙলাইখা হিনবেলে মাই মীচায়া মামাঙ উঙগই!
 তা-ম জে আঙ নুগমানি হিনকাই থা রীগই খাইপুঙ
 রীগই মুয়ান রীগই মাঙসে চালাই মাঙ মা
 তঙলাইসি বেলে। মুয়া-ব বলঙনি সামপাঅ
 মানলিয়া হিনবেলে খুব হাকচাল খাই বলঙ কুথুগ'
 থাংগই মুয়া ফাইলাইনানি নাঙ ফন সাম' হিনকাই
 মুয়ান তাই মানথকলিয়া ফন।
- কানতিয়া : সাম'-বা তাই বর মুয়াবা মানথকনানি-বা হাকচাল'
 থাংয়া হিনকাই, মিয়াঅ আনি নগ গানানি বররক
 মুয়া ফায়ই ফাইমানি নুগমানি-বা দিবর মজম'
 খেকবাইকাবেলে নগ' ফায়ই সকফাইবাইমানি।
- বারিয়া : সাঅই মালাঙলিয়া বলঙ বুবাগ্রা বা চীঙন তাম
 খাইন তাবুকসে মীসীক উল' তাম উঙন তাম হিনই
 সাচিনানি।
- কানতিয়া : উল' তাই তাম উঙনানি মীচায়া থাইনানিতা তাই
 তাম উঙনানিবা।

বারিয়া বাই কানতিয়া থাংকা ।
দলিতনি বুবাথ্ৰা, বুবাথ্ৰা কুসু তাই সমতিয়া বাদারাই ফাইকা ।

- সমতিয়া : বুবাথ্ৰা চাঙন তাম খাইনানি रिङ्गई तुवई फाई,
अर ताम चाङ्ग बाई कामदे तङ्ग आसीक ददर' ददर'
खायई चाङ्ग नुङ्गवा ?
- बुवाथ्त्रा : नरग बाई-ब चाङ्ग मालाईया कूसु बालकखावा
सीरापसा ककन सालाई तङ्गगानी हिनई नरगन
नुङ्गमानिसे । नरग नाहारई नाईदि चिनि दलित-
नि हास्तेअ बलङ्ग बुवाथ्त्रा फाईमानी उल' हिनकाई
बीसीक बरक ताबुक मीचाया मानीङ्गया उङ्गलाई
तङ्गबाईखा नाहारई नाईदि, नकबुरुम नकबुरुम माई
मीचालाईया उवास माङ्ग उङ्गलाई तङ्गबाईखा ।
आबरकन-न नरग बाई किसा सालाईयानी हिनई
नरगन किसा नुङ्गमानिता ।
- बादाराई : आबन ताम खাইमानी हामन किसा सासीलाई बुवाथ्त्रा
कूसु ।
- बुवाथ्त्रा कूसु : बरक थैहिनानि मुचुङ्गया, बरक थाङ्गनानि-न मुचुङ्ग ।
बरक मीचाया खाई तङ्गनानि मुचुङ्गया, बरक चाअई-न
अग पुङ्गई तङ्गनानि मुचुङ्ग जत बरक-न, आब-न
चाङ्ग किसा जत प्रजारकनि थानि किसा फुगई रिअई
मानखाई-न चाङ्ग ताईसा बलङ्ग बुवाथ्त्रा बाई जूध्
नाङ्गलाई मानता ।
- समतिয়া : ए आबवा कौलाईसे, अ ककन प्रजारकन किसा
फुगई रिखाई-न प्रजारकवा चिनि फाईसिङ्ग उरसा
उङ्गई फाईबाईखता । ताबुक सारागनाईसे साव
तङ्ग । बलङ्ग बुवाथ्त्रा म ककन थैनाकाई ताई उपाई
तङ्गगीलाक, फुङ्गसाई-न बुथारई कौलाङ्गई थां
पाईयानी ।

- বুবাগ্ৰা : আবতাইয়াখ তাবুক আতকাসা উঙগই চায়াখ
তীৰীক তীৰীক খাইসে কাম-ন মা খাইনাই
আহাইয়া খাই সিদ্দি উঙগীলাক।
- বুবাগ্ৰা কুসু : বুবাগ্ৰা সামানি হাই-ন কামন খাইনানি নাঙনাই।
- সমতিয়া : আউ আব-ন কক থিক।

বুবাগ্ৰা, বুবাগ্ৰা কুসু, সমতিয়া তাই বাদারই থাংকা।
হরিজয় বাই চিনতাপতি ফাইকা।

- চিনতাপতি : নীঙ মাইবুঙ মানবুলিয়াদা তিনি ফুঙনি সিমি সে
মাইতীক থাপাঅ মা বকসায়া, তাবুক সাই-রিগ-ব
নীঙ মাইবুঙ মানবুলিয়া হিনকাই তাবুক হর' তাই
তাম খাইচিনানি মাই মীচায়া-ন মা
তঙলাইসিনাইতা, তাই তাম খাইলাই- সিনাইবা
মাইন মীচালাইয়াই-ন মা থুলাই- সিনাইতা।
- হরিজয় : তা উানাদিখ তিনি আহাই-ন হরসা উবাস মা
তঙসিনাই খীনা আইখাই-ন নরগ মাসাকনাই
থাঙগই মুয়া ফায়ই তুবলাই ফাইদি। মুয়ান বুগই
চালাইসিডানী খীনা কাই, তাবুক তাই কুসতাম
খাইনানি কীরাই।

হরিজয় বাই চিনতাপতি থাংকা।
চিনতাপতি বাঁসাজীক জানকতি ফাইকা।

- চিনতাপতি : মাতিঙ ফাইদি চীঙ মাসাকনাই বলঙগ থাংগই মুয়া
ফাইলাই নাহারলাই ফাইগীনাখু মিয়ানিসে মাই
মীচায়াগীজা, হিমদি মাতিঙ দাকতি থাং কাই
থাংগই মুয়া ফায়ই তুবই বুগই চালাই ফাই
গীরানাখু।

জানকি

: হিমদি মা দাকতি-ন থাংগই মুয়া ন ফায়লাই তুবলাইমানি হাম' মাসাকনাই নখরলাই থাং কা মুয়ান ফাইনানি হিনই।

[চিনতাপতি বাই জানকতি মুয়া-ন ফাইয়ই তুবুনানি হিনই থাঙলাইখা বলঙ কুথুগ'। বলঙ কুথুগ' মুয়ান ফাইলাইতে ফাইলাইতে আতকাসা মীসান নুগই বরগ মাসাকনাই জানি লামা জা খারলাইয়ই থাংকা কেবাই কে মালাই- লাইলিয়া বরগ মাসাকনাই, বুমা-ব নাইতুক- খা বীসাজীকন, বীসাজীক-ব নাই তুকখা বুমা-ন, বুমা-ব হিনকা বীসাজীকন মীসা-ন চাখীনা, বীসাজীক-ব হিনকা বুমান মীসা চাখীনা। বুমা বাই বীসাজীক মালাইয়া উঙগই বুমা হিনকাই নগ' কিফিলই ফাইকা বীসাজীক জানকতি খাই নকনি লামা সাতই মানলিয়া বাই নগ' কিফিলই ফায়ই মানলিয়া বাই বলঙগ-ন তঙরীগই তঙখা লামা করঅই]

চিনতাপতি বাই হরিজয় ফাইকা।

চিনতাপতি

: নগ' থাংগই বীসাইন সাত, বলঙ থেনেঅ মুয়ান মানয়া উঙগই বলঙ কুথুগ' মুয়া ফাইনানি থাংলায়ই মুয়ান ফাইলাইসে তঙখা, অ মুয়া ফায়ই তঙলাইফুরু-ন বরনি-ব মীসা মাসা কতর- মা ফাইয়ই চীঙন ডাথারনানি নায়ই তঙখা কাই খারলাই মা থাংকা অ মীসান নুগই কিরিঅই। আফুরুকাই আনি সাজীকমাবা বিয়াঙ-ব কীমাতই থাংকা সাতই মানলিয়া মীসাদে তীলাঙগই থাংকা আব-ব সাতই মানলিয়া আঙ নাইতুগসিনি খাই নাইতুগই নাইবুখা কারেঅই মানলিয়া আনি সাজীকমান।

হরিজয়

: অ আনি সাজীকমা আনি নাইবাইয়া মা নন তাই
আঙ নুগলিয়া আনি সাজীকমান বলঙনি মীসা-ন
তীলাঙখীনা উঙয়াখাই নগ' সকপাই খামন, বদে
তাই নগ' সকফাইসি।

চিনতাপতি বীসাজীকনি বাগাঁই কাব'।

সাজীকমা, সাজীকমা, সাজীকমা, সাজীকমা,

অ আনিলে সাজীকমা নীঙ বর থাংকা।

নগ' ফাইমানি আঙলে সাইচুঙ মা ফাইকা, নীঙলে বরঅ তঙখা

তাবুক আঙ মীলাঙ চাখা।

নীঙ তাম উঙ তঙখা আঙলে নাইতুকখা

বরঅ তাম উঙখা?

অ চিনি দলিত হালে নন চাঙ তাম খাইলে, নন মা হিনই নীঙগই তঙমানলে

নন চাঙ কুসতাম-ব খাইয়া চাঙলে।

অগ' মাই সকয়া চাঙন কেব চারিয়া, চাঙলে কেন-ব খাইয়া

চাঙলে বুইন তা রকদি হিনয়া।

সাজীকমা, সাজীকমা, ...

বলঙগ থাংকা মুয়ান ফাইকা, মীসালে চাঙন নাইচমই তঙখা।

সাজীকন মীসালে তীলাঙগই থাংকা।

আঙ হাই অবাগি বুইলে কীরীইনা, মীতাইলে উঙগই বলে তঙয়ানা

বাইথাঙলে সাবন সানা।

চেরাইলে ফাঙসিনি নন নাইসিগই তঙমানি, চায়া-ন কারই চারি রিমানি

অ সাজীকমা নীঙলে বুইনিয়া আনি।

লব খীলাই লব সীকা খায়ই তঙমানি, আঙ কিসি থুঅই নন কীরান' মুথুমানি।

সাললে সাপুঙ সাজীকন বুথেবমানি।

নিনি গরনন নাইসিগই তঙমানি, মায়া বারিয়া নন রিমানি

তাবুক সাব-ন রিসিনানি।

বিরমা কতরলে আঙলে নাঙ তঙগ, নীঙলে থাং তঙখা ইমাঙনি বিসিঙগ

সাজীকমা হিনই আঙলে কানি-ন রিঙগ।

চিন্তাপতি থাংকা।
দলিতনি সেঙ বুবাগ্ৰা ফাইকা।

সেঙ বুবাগ্ৰা

: আন বুই বিখা বিরনাই হিনই সিনিঅ, আন দলিত
বুবাগ্ৰানি সেঙ বুবাগ্ৰা হিনই কে-ব সিনি- অই
মানয়া খ। আঙ মীতীই খাই তঙগই বিখা
বিরতীতীই-ন নাইচমনানি সাব বুবতীই খায়ই তঙ।
আনি আগিনি দলিতনি বুবাগ্ৰা বাই বুবাগ্ৰা কুসু
কিসানি বরক কাহাম গীজাদে আবরক জত-ন জুধ
খীলালাইফুরুঅ বুথারই খিব জাগবাইখা। তাবুক
আঙ বিসিঙ বিসিঙ সীঙগই নাইনানি সীকাঙনি
বুবাগ্ৰাদে হাম তাবুকনি বুবাগ্ৰা-দে হাম হিনই।
প্রজারক হামজাগয়া হিনখাই নীঙ আহাই-ন
কুতুলই মা থানী বিনি বলঙনি জাগাঅ।

দলিতনি সেঙ বুবাগ্ৰা থাংকা।
হরিজয় বাই কানতিরায় ফাইকা।

হরিজয়

: কানতিরায় নীঙ আনি আঙসাজীক বুমা বাই মুয়া
ফাইলাইনানি হিনই থাংগই কীমাই থাংমানি
খীনাকাদা ?

কানতিরায়

: আউ খীনাকা আব তামঙবা আবতীই উঙলায়ই
থাংলাইখা নীসাজীক অ বীরীইমা কিসানি বীরীই
কাহামদা আবসে বলঙগ মুয়া ফাইতানি কীমাই
থানানি হিনকাই তাই তাম সালাঙনানি ককন। মন
খাইনাই হিনকাই তাবুকনি বলঙ বুবাগ্ৰাসে। ব
ফায়ই-ন মীচায়া মা নীঙয়া বিসি উঙলাইসিঅ।
মীচাখাই মা নীঙখাই বলঙ-ব থানানি নাঙগীলা
খামন বীসা বীতীই-ব কীমানানি নাঙগীলা খামন।

হরিজয়

: নীঙ মতীই কক-ন সামানি হিনকাই থিক-ন ম

কানতিরায়

বলঙ বুবাগ্রান তাম খাই নরনানি আবন-ন কিসা
উনাই তঙগ।

: তা উনাদি বিসি, বুই জত-ন ম বলঙ বুবাগ্রান খাই
নাইসেলেজাগই তঙবাইখা সি, সি, হিনলায়ই,
তাবুক বিসিঙ বিসিঙ বন খগই ককন কিসা
সালাইনাইতা। তাবুক জত-ন বলঙ বুবাগ্রান খক
খগই সালাইখাই-ন বন রীখীলাই মাননাই।

হরিজয় বাই কানতিরায় থাক্কা।

জানকি ফাইকা।

[জানকি সাইচুঙ সাইচুঙ বলঙন নাইসিগ'
উা-ন নাইসিগ বুফাঙন নাইসিগ হাপুঙ হাতাইন
নাইসিগ' আয়াঙ থাং-ব বলঙ সায়র, উয়াঙ
নাহার-ব বলঙ সায়র, বিয়াঙ থানানি বিয়াঙ
তঙনানি তাই সাঅই মানয়া উঙগই তঙখা। মাই-ব
অগ খুইঅ বুমা বুফান-ব খাতাঙগ, মীসা মায়ুঙন-ব
কিরিঅ আবতাই উঙগই তঙখা বলঙগ সাইচুঙ
সাইচুঙ তাবুক তা-ম খাইনানি বুদ্ধি মানয়া উঙগই
সাইচুঙ নিরাল নিবানদ চাঅই, তকসা তকতাই
হুলক পুঙগই তঙমানি সিমি-ন খীনাঅ, আয়াঙ
আয়াঙ নাহারই খীনাকাই আবতাই খাই সাইচুঙ
অরনদি নাঙগই তঙখা বলঙ বিসিঙগ।]

জানকি কাপখা।

মানবা, মানবা, মানবা, মানবা, মানবা,
নুঙলে বিয়াঙ-ব তাবুকলে থাঙগইলে তঙগইখা
নগলে কাঁরাই বাই মাইন মীচায়া, বলঙগ ফাইকা ফাইনানি মুয়া
মীতাই উঙগীনা সিয়া।

নগলে থাঙমানি লামন নুগয়া, যাঙতাই খাই থাংকাই নগ-ব সকয়া
 আঙলে বাবু বাই মান পকয়া ।
 অকুল বলঙগ তঙখালে তাবুক, তাম-ব উঙন আঙলে খাচুকলে বুচুক
 মীতাইন নুগয়াখ হাপুঙ হাতাইলে কুচুক ।
 বুবতাই বলঙব উঙখা, অনবা মীতাই খাইকা
 অ দসা ন ফীনাঙগই রিখা ।
 তাঙ সাইচুঙ বলঙগ তাম খাই তঙনানি, মায় বাবু বাই তাম খাই মালাইনানি
 বর থাং হামলাঙনানি ।
 তাবুক খাই আঙলে বিয়াঙ থানানি, জাগা সিনিয়া আঙলে তঙনানি
 সাব-ন সাঅই আঙলে হামলাঙনানি ।
 মায় বাবুন তাম খাই পকনানি, আঙলে বরগন তাম খাই খিবনানি
 আনি বিরমাননি ককন সাবন সাঅইনানি ।
 যাসকু সীকাঙ তাবুক থানানি, জেথানি ফান উঙথন কীলাই থাইনানি
 যাঙতাই-ন থাংচিনানি ।
 যাঙতাই-ন থাংগই আঙলে থাইচিতন, ববে নদিন পকলাঙগই থাংথন
 কীথাঙ-ন তঙলিয়া আঙলে থীয়ই-ন থাংতন ।

জানকি আবতাই খাই কাবই বলঙন গুরক-
 তে গুরকতে আতকাসা ফায়ই নুগই রিফাইকা জাগা
 কীরীঙসাত তীকগলা, থাপাঅ মাই মুই সঙজাগ
 কুপুলুঙ লুতা-ব তঙগ গলাঅ-ব তাই কুপুলুঙ,
 জানকি সাতাম সাবীরাই মাই মীচায়া উঙগই
 তঙমানি বাই দদ-র দদ-র লুতা বাই গলানি তীয়-ন
 সিরই দদ-র দদ-র মাইন খুরই চানানি হিনই য়াগ
 বাই তিসাঅই খুডাদরব খাই-ন বুফাঙ হাকরনি
 মাদুমি ফীলাত সাকাই নখরই হিনকাঙ নীঙ সাব
 অরঅ ফায়ই আনি মাই সঙজাগন চাঅই তঙ ফাই,
 নন তাবুক-ন আনি সীলাই বাই কগই খিবই
 রিগীরানা, নীঙ সীকাল দে, উঙখা বুদদে উঙখা
 মীতাইদে উঙখা নন তাবুক-ন কগই খিবই
 রিগীরানা ।”

- জানকি : আঙ সীকাল-বয়া মীতাই-বয়া বৃদ বয়া পেৱেত বয়া, সাতাম সালবীৰাই মাইন মীচায়া উঙগই মাই অগখাইমানি কুল কীৰাইখা আঙ খবচা চাঅই খিবগীৱানাখু। আঙ মাইন চায়াই তঙগই মানলিয়া, আঙ মাই কিসা চাঅই খিববাইমানি উল' হিনকাই আন কগই বুথারই খিবদিতে-ব আঙ মাইন খপচা চাঅই খিবগীৱানাখী।
- মাদুমি : দ-আহাই কাই আসীক মাইন অগ খাইজাগ খাবা চাঅই-ন খিবগীৱাদিখ, মাইন চাবাইখাই আঙ উল' নন কগই খিবচিউনী, মাই চাবাইদি দাকতি আঙ নন কগখাই কগই কামন পায়ই খিবনানি।
- জানকি : হিনদি আঙ মাইন চাবাইখা তাবুকলে আন কগই খিবই ৱিসিদি আঙ-ব দাকদি খায়ই থাইনানি-ন মুচুঙগই তঙসিঅ, ককদি হিনদি আঙ খাকীলাবন ফেহেলই ৱিখা, হিনদি ককদি।
- মাদুমি : নীঙ বৱনি ফায়ই অৱ সকফাই অ ককন নীঙ আন সাবাইখাই আঙ নন ককনানি, সাদি নীঙ আন দদ-ৱ খায়ই, অ ককন নীঙ আন সাবাই- খাই-ন আঙ নন কগই খিবনানি।
- জানকি : আঙ সাউনী খীনাদি, আঙ দলিত হাঙ্গেনি বীৰাই, আনি মানি মুঙ হিনকাই চিনতাপতি বানি মুঙ খাই হৱিজয়। বলঙ বুবাথ্ৰা দলিতনি বুবাথ্ৰান জুশ্ব খায়ই চেনৱিঅই বলঙ বুবাথ্ৰা দলিত হাঙ্গেনি বুবাথ্ৰা উংমানি উল' হিনই চিনি দলিতনি বৱৱক জত-ন নক বুরুম নক বুরুম মাই মীচায়া উঙগই থাংবাইখা।
- মাদুমি : উল' খাই তাই তাম উঙখা সাদি জত ককন পাইসুগই।
- জানকি : উল' খাই চিনি নগ'-ব মাইবুঙ কীৰাই বাই মাই মীচায়া উঙলাই তঙখাই মা বাই চাঙ কীনীই মুয়া বুগই চালাইনানি হিনই বলঙগ মুয়ান ফাইলাইনানি

হিনই থাংকা হিনকাই মীসা কতরমা বাই মালাইয়ই
 অ মীসান নুগই মা বাই মাসাকনাই খারলাই
 থাংলাইখা, খারলাই থাংলাইয়ই মা-ব বিয়াঙ থাংকা
 আঙ সাঅই মানলিয়া, আঙ-ব কিরিঅই খারতে
 খারতে অকুল বলঙ কুথুক- নক ফাইসিঙ থানানি
 লামা সাঅই মানয়া উঙগই লামান নাইতুকতে
 নাইতুকতে তাবুক নিনি অর আতকাসা ফায়ই
 সকফায়ই নুকফাইকা মাই মুই-ন সঙজাগ কুমুনন,
 আঙ সানাই সাতাম মাইন মীচায়া উঙগই অগ
 খাইমানি কুলকাঁরাই উঙগই আঙ সহলিয়া উঙগই
 নিনি মাই সঙজাগ কুমুনন নুগই চাঅই মা খিবকা
 আন জেসা ফা-ন হিনচিখন হিনই।

মাদুমি

: অমা আহাই খাইবা নীঙবা কমখাই বিপদ'
 কীলাইয়ই তঙমালিয়াবেলে। আঙবা নন মীতাই
 উঙ তঙগ হিনই সিয়া বাই কগইসে খিবকামন
 বেলে! অমা আনি বীসাক কীলাই মানিসে কুল
 কাঁরাইখা, নন কগই খিবয়াবা হামকা।

[অ জরাত কুচুকতাই সাকীলাইনাই ফাইকা।]

কুচুকতাই সাকীলাইখা মাদুমি নীঙ জানকিন
 ককয়াবা হামকা, নীঙ বন কগই খিবকাই গিলামা
 হাময়া উঙখামন। মাদুমিসঙ নরগ তাবুক সিলাই
 খাই সিলাই বাদুখুঙ খাই বাদুখুঙ সেঙ খাই সেঙ
 জত অসতরন তীয়ই তেরেনিঙ রিলাইদি নরক
 সালচা বলঙ বুবাগ্রা বাই জুন্ধ নাঙলাইনানি তঙগ
 অ জুন্ধঅ নরগ জিতিনাই আঙ থাংকা নরগ হামই
 চাঅই তঙদি।

[মাদুমি বাই জানকি নখা ফাইসিঙ নাই
 সালাইখা কাহাম খায়ই নাইসা ফান কুসতাম ফা-ন
 নখা সাকা নুগসালিয়া। আফুরু সিমি-ন মাদুমি বাই
 জানকি কাঁথালয়ই থাংলাইখা।]

মাদুমি বাই জানকি থাংকা।

বলঙ বুবাগ্রা, বলঙ বুবাগ্রা কুসু তাই সেঙ বুবাগ্রা ফাইকা।

- বলঙ বুবাগ্রা : বুবাগ্রা কুসু আনি দলিত হাংস্থেনি বররকনি থানি খাজীনা বিসি খায়ই নাহারজাগবাইখাদা ?
- বলঙ বুবাগ্রা কুসু : নাহারজাগবাইখা তবে খাজীনা রিঅই মানয়া গিলা বররকনি থানি-ন তঙখ, বরগ কীরাই বাই রিঅই মানয়া উঙলাই তঙবাইঅ।
- বলঙ বুবাগ্রা : বরগনি হাঅ তঙগই আন খাজীনা রিঅই মানয়া আব বরনি কক? সেঙবুবাগ্রা সাব সাব খাজীনা রিঅই মানয়া লেখাঅই নারীকবাইদি, জে রিঅই মানয়া হিননাইন ফিকুঙগ চামবুক বাই সীপীরাগদি জে উঙসাক আহাই খাই-ন খাজীনা নখরই মা ফাইয়ানী। থানদি খীনানি সিমি সেঙ বুবাগ্রা জে য়াগ' কীলাইমানি আবন ন তুবদি, রাঙ খাই রাঙ রি খাই রি, মুসুক খাই মুসুক, তনক খাই তনক, বীরাই খাই বীরাই, চেরাই খাই চেরাই জে সীকাঙগ কীলাইমানি জত-ন তুবদি তা য়াকারদি তুবদি পাইসুগই।
- সেঙ বুবাগ্রা : আজ্ঞা বুবাগ্রা জে নীঙ আন সামানি আঙ আবতাই-ন খাইয়ানী, আঙ খীনা-ন সিপাই-রক-ন তীলাঙ কামিঙ কামিঙগ হাবানী খাজীনা রমনানি বাগই থাংগানী।
- বলঙ বুবাগ্রা কুসু : সেঙ বুবাগ্রা কীরাই বিগীরা পাইথাকন হিনকাই খরকসা খুবুকসুন খাই য়াকারই রিঅই কাবুই মান'।
- বলঙ বুবাগ্রা : বিগীরা পাইথাক হিনই বন য়াকারই রিনানি আবতাই ককদে তঙবা বুবাগ্রা কুসুতাম বিগীরা পাইথাক পাইথাকয়া জতনি থানি-ন তুবদি সেঙ বুবাগ্রা।

বলঙ বুবাগ্রা, বলঙ বুবাগ্রা কুসু তাই সেঙ বুবাগ্রা থাংকা ।
সেঙ বুবাগ্রা তাই সিপাইরক ফাইকা ।

সেঙ বুবাগ্রা

: সিপাইরকন সাকা, সিপাইরক নরগ জে খাজীনা
রিহরই মানয়া বররক খাই বিনি নগনি রি চুম
সকলাই তুবদি, মুসুক তনক-ব রমই তুবদি বিহিগ
বীসা ন-ব রমফেরে সুকফেরে খাইদি । বন-ব
পাইনজন বাই সীপীরাগই লেঙরি তনিবাইদি ।

[সিপাইরক সেঙ বুবাগ্রানি কক বাই-ন জে
খাজীনা রিহরই মানয়ারকন খাই পাইনজন বাই
বুঅই লাজ খাই বেরাই তনি অই রি খাই রি, রাঙ
খাই রাঙ, মুসুক খাই মুসুক, তনক খাই তনক তুবই
বিহিগ বীসা-ন রমফেরে সুকফেরে খায়ই কাবুই
ফাইকা জে উঙতাই অইতাচার খায়ই । আবতাই
কীরীই বররক খাইজাগই কাবলায়ই বিরমাব
নাঙলাইমানি তাই কীরীইখা জতনি কামিঙ
কামিঙগ-ন হাহাকার নাঙলায়ই তঙবাইখা আবন
বলঙ বুবাগ্রা খীনাঅই হামজাগই মীনাইখা হাহাহা
হিনই]

সেঙ বুবাগ্রা তাই সিপাইরক থাংকা ।
প্রজারক ফাইকা ।

প্রজারক কাবখা ।

তীমালে বুবাগ্রা নীঙবা উঙজাখা, চাঙনবা মীতাই খাইকা ।
চাঙলে বরঅ থানানি উঙখা ।
তাম দুসিবা চাঙলে খীলাইকা, যামফীরা চারি চাঙনবা বুখা
চাঙ তাম দুসিবা খাইকা ।
চিনিলে বুবাগ্রা নীঙলে, তামলে খাইকা নীঙবা চাঙনলে

চাঙনলে নুগই মীনাইখা ডালে ডালে ।
 অগলে মাই কীরাই খাজীনা রিঅ, নন চাঙ খুলুমজাঅ
 তামঙ বুনাবা নীঙলে ।
 চিনি হাঅ-ন চাঙলে তঙজাঅ, নন নুগখাই-ন চাঙলে খাজাঅ
 চিনিলে বুবাগ্ৰা হিনই ।
 বীখাঅ নন চাঙলে হামজাগ', চিনিলে মীতাই হিনই ননলে নুগ'
 চাঙন তীমাবা খায়ই রিঅই ।
 চাঙলে কীরাইবা দুখিত বরক, জেসীক ফা-ন সাদি সাবাইয়া ককরক
 চাঙলে তাম দুসিত উঙখা ।
 ফিকুঙন রিঅ সালনি সাতুঙন, খাকীলাব রিঅ বসমাতিন
 তামলে অপরাদ উঙখা ।
 সাল-ব তাঙদি হর-ব অগবুকচা থুদি, চাঙন তামঙ তঙনাইদি ।
 বুবাগ্ৰা উঙগই নাইদি
 মীতাইলে নুগয়াখ তঙমুঙ তঙয়াখ, তাই তাম উঙনানি তঙখ
 চাঙন বুথারই খিবনানিদে খিবদি ।

প্রজারক থাংকা ।
 মাদুমি বাই জানকি ফাইকা ।

- মাদুমি : আঙ-ব ম বলঙগ সাইচুঙ-ন তঙগ নীঙ-ব আহাই
 খাই তা থাঙচিদি আঙ বাই-ন নীঙ তঙসিদি, চাঙ
 খরকনাই খাই-ন তঙলাইসিউনানী আঙ নীঙ বাই
 কীনাই খাই, চাঙ তাই ডানানি কীরাইখা ।
- জানকি : নীঙ খাই ম বলঙগ তামঙ সাইচুঙ মা তঙখা সীলাই
 আসীক বলঙ কুথুগ' । আবন আন কিসা সাদি ।
- মাদুমি : আঙ দলিতনি বীরাইসে আনি মানি মুঙ হিনকাই
 চাকতি, আনি বা কীরাই আঙ চেরাই ফুরু-ন বা
 থায়ই থাঙকা আনি মা রানদি, চাঙ খুব কীরাই
 বরক ফাইচা মীচাখাই ফাইচা মীচায়া উঙগই তঙগ ।
 সালচা আনি মা বইনি হুগ' মুলা উঙনানি থাংগ

আঙ সাইচুঙ-ন নগ'। আঙ আনি আরনি বলাই বাই সলাইন মুইসিরি নখরই তঙগ হিনই সাঅই মানয়া, আফুরু খাই বলাই বাই সলাই আন নগ' সাইচুঙ মানই রমই বসতা বিসিঙ দাঅই বসতা বুখুকন খাঅই বুজুলায়ই তুবই ফাইকা বলঙ তাই খায়ই আফুরু কাই আঙ বরগন চালাক খায়ই সাখা আঙ সীতাইনানি মুচুঙগ। আন বসতা বিসিঙনি নখরিঅই সীতাই রিদি কিসা হিনই সাখা কাই, আন ফিয়গই সীতাই রিনানি হিনই ফিয়গই রিখাকাই আঙ সীতাই মাসি খায়ই বলঙ বিসিঙগ হাবই বলঙ বলঙগ খায়ই খারই থাংকাতা, বরগ আন তাই মানয়া জাত খায়ই, আফুরুনি সিমি-ন আঙ সাইচুঙ বলঙগ তঙগ। আঙ নগ' কিফিলই থাংকাই বরগ তাই উইসা আন রমই খিবানী হিনই, আববাই আঙ নগ' থাংলিয়া।

- জানকি : অ আবতাইদা নীঙ তা উনাসিদি আঙ নিনি লগি-ন তঙগই চাঁঙন সাব জানি সাকীলাই রিমানি হাই চাঁঙ অসতর' তেরেনিঙ রিলাইনানি খীনানি সিমি-ন।
- মাদুমি : নীঙ-ব বিপদনি বরক আঙ-ব বিপদনি বরক, চাঁঙ নীঙ বাই আঙ মারেসে খালাই খিবনানি তাই কুসতাম কক কীরীই।
- জানকি : দ উঙথনতা নীঙ বাই আঙ মারে-ন।
- মাদুমি : মারে নীঙ বাই আঙ তাই খীইয়াসাক কাগলাইলিয়া।
- জানকি : আউ মারে আঙ ব তাই নীঙ বাই কাগলাইলিয়া নখা তঙগ, তীয় তঙগ হা তঙগ, নকবার তঙগ হর তঙগ, মারে কুবুই কুবুই-ন নীঙ আনি মারে।
- মাদুমি : আঙ-ব তাই নীঙ বাই কাগলাইলিয়া, মারে তীয় তঙগ হর তঙগ, নখা তঙগ হা তঙগ নকবার

তঙগ, কুবুই কুবুই-ন নীঙ আনি মারে সই উঙখা,
নীঙ জেথানি থাইকাই আঙ ব আর-ন থাইনানি।

মাদুমি বাই জানকি থাংকা।
বাদারাই বাই সমতিয়া ফাইকা।

- বাদারাই : নীঙ খানাকাদা সমতিয়া উসীকাঙগ বলঙ বুবাগ্রানি কক বাই সেঙ বুবাগ্রা সিপাইরকন তাঁলাঙগই নক বুবুম নক বুবুম খাজীনা সানই খাজীনান জে রিহর মানয়ান হিনকাই জে সালই বু হিনমানি তাই সাঅই মানলাইলিয়া ফন, অ বুজাগনাইরক নখলা মাখগই মা তঙবাইখা ফন।
- সমতিয়া : সুদু আ-ব সিমি-নদেবা রিচুন মুসুক তনক জত-ন তাঁলাগই থাংবাইকা ফন খাজীনা রিহরই মানয়া হিনকাই আব সুদু-নদেবা বীরাই চেরাই- রকন-ব রমফেরেঅই কীলাঙগই থাংবাইয়। আবতাই অইতাচার চলেঅই তঙগ তাবুক বলঙ বুবাগ্রান অরনি কুতুলরিঅই রিহরই মানয়াসাক চাঁঙ তাই হামলাইনানি কীরাই বন জেসাকাই ফান কুতুলরিঅই মা রিহরনাই।
- বাদারাই : ম বলঙ বুবাগ্রানি ককন তেব তেব খায়ই সাচে সালাইদি সালাইয়াখাই উঙয়া, সালাইকাইসে চাঁঙ প্রজারক থানচা উঙনানি। চাঁঙ থানচা উঙগই থাই কি থাঙ বন রীখীলাইনানি নাঙনাই-ন।
- সমতিয়া : তাবুক থাংগই চিনি বুবাগ্রা বাই বুবাগ্রা কুসু বাই খায়ই ককন চাবলাইগীরানা তাবুক থাংগই।

বাদারাই বাই সমতিয়া থাংকা।
সুদিরাম বাই বাসীলা রাঙগিয়া ফাইকা।

- সুদীরাম : বাবু নীঙ তিনি সিকার খাইনানি থাংদি আঙ বলঙনি মুইহান চানানি মচুঙগই তঙখা মুইথকয়া বাৱেসুগই তঙখা ন-গ। থানদি তিনিনি বিসিঙ-গ-ন সিকার' দাকতি থাংকাই দাকতি ফায়ই মান' মীসাই ফা-ন মসকফা-ন তুবই ফাইদি জেসান ফান মানখাই-ন উঙগ।
- রাঙগিয়া : দ নাইগীৱানাতা তাম মুইনবা মানবুন। আব-ত মানবুনাই-ন মুঙসাইয়া মুঙসা, বিয়াঙ ফাইসিঙবা থাংমানি হামন তিনি।
- সুদীরাম : থানানি হিনকাই পুবগালা বীখাগ-ন থাংদি বাবু আয়াঙগ-ন বিসি মসক মীসাই তঙগ আয়াঙগ-ন থাংদি নীঙ।

সুদীরাম বাই রাঙগিয়া থাংকা।

রাঙগিয়া সিকার' ফাইকা।

- রাঙগিয়া : সিকার' ফায়ই মীসাই-ন নাইসিগই কগই রিমানি লগি লগি-ন অ রাঙগিয়া কগই রিমানি মীসাই নন হাতাঙ কামিঙনি উদিৱামনি বীসীলা-ব কগই রিখা অ মীসাই মাসা ন-ন রাঙগিয়া-ব কগই চাখীলা কঙসা হাবরিঅই রিখা জাঙগিয়া-ব চাখীলা কঙসা হাবরিঅই রিখা। মীসাই মাসান ন বরক খরকনাই কগই চাখীলা কঙনাই হাবরিঅই রিখা। জন কঙসা কাই চাখীলা হাবকা মীসাই মাসাঅ-ন চাখীলা কঙনাই হাবকা। অ মীসাই মাসান রাঙগিয়া বাই জাঙগিয়া খরকনাই কগই রিমানি বাই ককজাগনাই মীসাই থীয়ই থাঙকা। রাঙগিয়া অ মীসাই কীথাইন খচাঅই তুবনানি নাইমানি লগি লাগি-ন জাঙগিয়া ফায়ই হিনকা।

- জাৰ্জগিয়া : এই নীঙ সাব আনি মীসাই ককজাগন যাতে তেঙ খায়ই খচাই তীলাঙগই থানানি নাই?
- ৰাৰ্জগিয়া : এই নীঙ সাব? ম আনি মীসাই ককজাগসে আঙ তীলাঙগই থানানি নাইঅ, ম নীঙ মীসাইন ককমানদে আঙ তীলাঙগই থানানি নাইবা?
- জাৰ্জগিয়া : নিনি আব তাম হিনমানি কক, ম মীসাইবা আঙ-সে ককবীলা, ইক নাইসিগই নাইলা আঙ ককমানি আনি চাখীলান।
- ৰাৰ্জগিয়া : নীঙ-ব নাইসিকদি আঙ ককমানি চাখীলা-ন।
- জাৰ্জগিয়া : আহাই খাইবা ম মীসাই মাসান নীঙ-ব ককখা আঙ-ব ককখাবীলা সীলাই। ম মীসাইন তীয়ই চাঙবা ডালাইনানিসে নাঙয়াবেলে।
- ৰাৰ্জগিয়া : তাবুক তাম খাইনানি উঙখা সীলাই চাঙ?
- জাৰ্জগিয়া : নিনি কামিঙ খাই বর উঙখা সীলাই?
- ৰাৰ্জগিয়া : আনি কামিঙ খাই দঙগর কামিঙগ, বানি মুঙ হিনকাই সুদিরাম। আঙ সাইচুঙ-ন আনি তাই তাখুক বুখুক কীরাই নিনি সীলাই?
- জাৰ্জগিয়া : আনি কামিঙ খাই হাতীঙ কামিঙ হিনজাগ মানিঅ, আনি-ব নিনি হাই-ন তাই তাখুক বুখুক কীরাই আঙ সাইচুঙ সঙদারি-ন।
- ৰাৰ্জগিয়া : আনি বানি মুঙ ব নিনি বানি মুঙ হাই-ন, নিনি বানি মুঙ ব আনি বানি মুঙ হাই-ন, নীঙ বাই আঙব মুঙ বাই-ন। তাবুক আহাইকাই আঙ বাই নীঙ বাই য়ারসে খালাই খিবলাইমানি হামবীলা।
- জাৰ্জগিয়া : আহাই কাই তাবুকনি সিমি-ন নীঙ আনি য়ার। চাঙ তাই য়ার কাগলাইলিয়া নীঙ বাই আঙ।
- ৰাৰ্জগিয়া : নীঙ তিনিনি সিমি-ন আনি য়ার অগ, নখাঅ সাল তাল তঙগ, হাঅ হাপুঙ তঙগ, নকবার তঙগ, তাইবার তঙগ, নুঙ বাই আঙ তিনি য়ার খামানি সাখি।

- জাঙগিয়া : আউ য়ার নখাঅ সাল তাল তঙগ, হাঅ হাপুঙ তঙগ, হাতাই তঙগ, নকবার তঙগ তীয়বার তঙগ, আঙ-ব তিনি নীঙ বাই য়ার খামানি সাখি ।
- রাঙগিয়া : য়ার চীঙ কালি-ন মালাইলাইনাই জেথানি থানি ফান আঙ তাই নন নুগয়া খাই তঙগই মাননিয়া য়ার ।
- জাঙগিয়া : আঙ-ব আহাই-ন উঙনাইতা য়ার । আঙ তাবুক থাংকা-দ য়ার খুলমকা ।
- রাঙগিয়া : আউ আঙ-ব খুলুম'নন য়ার । ব বাই ব নাহারলায়ই কাগলাইখা ।

রাঙগিয়া বাই জাঙগিয়া থাংকা ।
মাদুমি বাই জানকি ফাইকা ।

- মাদুমি : মারে তিনি নীঙ বাই বাদুখুঙ কগলায়ই বাদুখুঙনি তেরেনিঙ রিলাইনানি সাব বিসি খায়ই বাদুখুঙ বাই কগই ফীনাঙলাই মান, বলঙগ থাঙগই বুফাঙ হাকরন নয়ই ককলাইয়ানী সা-ব বিসি খায়ই অ বুফাঙ হাকর' কগই চাখীলা হাব রিঅই মান মারে, আঙ বিসি খায়ই কগই চাখীলান হাকর' হাবরিঅই মানখাই আঙ কীপীলাই উঙনাই । আরনি বিসিঙ নীঙ কগই অ হাকর' চাখীলা বিসিখাই হাবরিঅই মানখাই নীঙ কীপীলাই উঙনাই মারে ।
- জানকি : অ আহাইদে মারে, আহাই খাই তিনি নীঙ বাই বাদুখুঙন কগই নাইলাইগীরানাতা সাব বিসি খায়ই কগই চাখীলান বুফাঙ বখর' বিসি খাই হাব রিঅই মান নাইলাইয়ানীতা মারে । হিমদি খাই মারে তাবুক-ন থাঙলাইয়ানী ককলাইমানি জাগাঅ ।
- মাদুমি : ইক মারে ম-ন চীঙ ককলাইনানি হিনমানি বুফাঙনি হাকর ।

- জানকি : নীঙ-ন সীকাঙ ককদি খাই মারে ।
- মাদুমি : নীঙ সীকাঙ ককদি মারে ।
- জানকি : আঙ ককখা খাই মারে ।
- মাদুমি : ককদি মারে নীঙন সীকাঙ ।
- জানকি : জন' কঙবীসীক খাই ককনানি মারে ?
- মাদুমি : জন' কঙবা খাই-ন ককদি মারে ।
- জানকি : কঙবা খাই ককমানি জত-ন নাঙবাইখা বুফাঙ হাক্স' ।
- মাদুমি : কঙবা ককমানি-ব জত-ন নাঙবাইখা ।
- [জানকি বাই মাদুমি জ-ন ফুঙবা খায়ই বাদুখুঙ ককলাইমানি চাখীলা-ন খরকনাই-ন বুফাঙ বখ-র হাবরিলায়ই মানই বাগসা-ন বাকসা খাই জিতিলাই তঙলাইখা । আবনি উল'-ব তাই উইসা জন' ফুঙবা খায়ই কক লাইমানি-ব বাগসা-ন বাগসা খায়ই জিতিলাই তঙলাইখা কে-ব কময়া কে-ব বিসিয়া খায়ই ।]
- জানকি : ফাইদি খাই মারে চীঙ বাদুখুঙন ককলাইমানি বাগসা-ন বাগসা উঙখাবা নগ' থাঙসিডানী ফাইদি । নগ' থাঙলাই দিবরনি মাইন চালাই-সিডানী মারে ।

জানকি বাই মাদুমি থাংকা ।

সুদিরাম বাই বাঁসীলা রাঙগিয়া ফাইকা ।

- সুদিরাম : বাবু নীঙ সিকার খাইনানি হিনই থাঙমানিবা তামঙগই মীসাই কসাবা মানবুই ফাইনানি নাঙবা ?
- রাঙগিয়া : আব হিনকাই মীতাইসে বা । আঙ বলঙগ থাংগই মীসাই মাসান ককখানি, তাই কাইসা বরক ফায়ই আঙ ককমানি মীসাইন কগই রিফাইকা সাই মানয়া উঙগই । অ মীসাইনি বাঁসা গ'ব ককমানি চাখীলা

বিনি কঙসা আনি কঙসা খায়ই কঙনাই হাবই
থাংকা. আববাই-ন অ মীসাই বাহানন ব বাই আঙ
বাই খায়ই বাগনাই খাই মা বাগলাইসিঅ। আবতাই
উঙগই-ন আঙ অ মীসাই বাহানন কসা মানবু-
নানি কীলাইয়।

- সুদিরাম : অ বরকনি নগ হিনকাই বরঅ ?
রাঙগিয়া : অ বরকনি নগ হিনকাই হাতীঙ কামিঙগ। বুফানি
মুঙ হিনকাই উদিরাম বিনি মুঙ খাই জাঙগিয়া আনি
মুঙতাই হাই-ন। আববাই-ন বিনি বুফানি মুঙ ব
নিনি হাই-ন। চাঙ কীনাইনি মুঙ ব সললাই হিনই
চাঙ অ বলঙগ-ন য়ার খালায়ই থিবলাইখা।
- সুদিরাম : হামকা বাবু নরক য়ার খালাইমানি আঙ নিনি অ
কক ন খীনাঅই চাজাগখা কাহাম খাই-ন। অ
বরকসান চিনি নগ' তুবই ফাইদি উইসাসীক।
- রাঙগিয়া : তুবানী বা আঙ বন জেসা খাই ফান।

সুদিরাম বাই রাঙগিয়া থাংকা।
মালতি বাই রঙগতি ফাইকা।

- মালতি : বাই রঙগ চিনি হাতীঙ কামিঙনি অ বিখা বিরই
ফাইনাই বরকবা তাম কতর কাহামনি বীসা হাই,
ফাইদি ব বাই চাঙ উইসাসীক কক সালাই নাইয়ানী
ব বরনি ফাইয়ই অর সকফাই।
- রঙগতি : নীঙলে ব বাই ককদে সারাগনবা? ব চীলা
সিকিলাদে উঙগই তঙখা কাইজাগনাই দে উঙগই
তঙখা, কীরাইনি বীসাদে উঙগই তঙখা গীনাঙ-
নি বীসাদে উঙগই তঙখা তাবুক তাম হিনই ককন
সানাবা।
- মালতি : ব জেসা ফানসে উঙগই তঙখন ককন সামানি
দুস উঙগই থাংয়া। ফাইদি বাই রঙগ ব বাই কক

রঙগতি

সানাই-ন সানাই চীঙ। ব বাই কক সানানি
উইসাসীকলে চীঙ সেব মানানীবীলা।

: সেব নায়ই সেব মানয়া তঙন? দ মালতি আঙ
নন উইসা রীচাবই খীনারিখা নীঙ তাবুক উইসা
আন রীচাবই খীনারিদি।

মালতি রীচাব’।

কিসা বীথাগই কক সাঅই থাংদি, সিনিয়া ফা-ন উঙথন
গানা নাইসিগই কইরিসা উঙবা, তাম বাবেব’ থাংকা।

সিনিয়া ফা-ন উঙথন।

কিসানীঙ থাঙগই উফিল নাহারই, হিমকাসা হিমই থাংবা
কক থাইসা সাঅই কিসা নাইসিগই, তামঙগই থাংয়া বা উঙখা

নন তাম হই নুগ

সিনিয়া ফা-ন উঙথন।

কিসা নাইসিগই কক সাঅই থাংদি ...

নীঙলে কক সায়া সামতীই লাইমানি, বীখা তঙথকয়া আঙলে উঙমানি
ককদে সা-ন আসাই তঙমানি ককনসে সালাঙয়াবেলে।

সিনিয়া ফা-ন কক-ন নীঙ সাদি, কিসা নাইসিগই নীঙলে তা লাইদি
কক-সায়া কুঙসি কুঙসি খাই লাইবা, ববালে উঙয়ানাবেলে।

কিসা বীথাগই কক সাঅই থাংদি ...

সামতীই লাইমানি তাম উঙলাঙখা, কিসা বীথাগনা মুচুঙদে তঙখা।
কইরিসা উঙগই উফিল নাহারই আনদে সীলাইলাঙখা।

সিনিয়া বরক তঙগ সাই মানয়া, গানা নুগখাই-ন কুতুলই মানয়া।
খাইচিগই থাংনানি বয়া, বীচাঅই থাংনানি বয়া।

অ আনদে নাইসেলে থাংকা।

বীথাক কক সাকাই তাম উঙখামন, সিনিয়া বায়াপ সিনি থাংকামন।
তামঙ সিনিয়া উঙলাঙ।

নীঙলে বরনি সাঅই মানখামন, উললে থাঙতকখামন
তামঙ কক সায়া থাংলাঙ।

কিসা বীথাগই কক সাঅই থাংদি ...

রঙগতি বাই মালতি থাক্কা ।
রাঙগিয়া বাই জাঙগিয়া ফাইকা ।

- রাঙগিয়া : য়ার ফাইদি চীঙ তাইসা বলঙগ সিকার' থাংলাইনানি, সিকার' থাংগই মুই মানখাই আহাই কাই তঙথগ', য়ার চীঙ তাবুক সিকার' থাংকাই মাসা কগইলে ফাইয়া বিসিয়া ফা-ন মাঙনাই মাগথাম আসীকয়াখাই মুইন তুবমাহাইসে মা তঙয়া ।
- জাঙগিয়া : আবলে কুবুই-ন য়ার আবসীক য়াখাই উ-ব উঙয়া য়ার, আবসীক মানবুয়াখাই তিনি নগসে কাফাইয়া । বিসিয়া ফান মাগথাম খাই মাননানি-ন নাঙগ য়ার ।
- রাঙগিয়া : দ হিমগীরানাবা য়ার বাসীক মানবু নাইলাইয়ানী হিমগীরানাবা চীঙ ।
- জাঙগিয়া : চীঙবা থাংখাই-ন তুবখাতা য়ার ।

রাঙগিয়া বাই জাঙগিয়া থাক্কা ।
মাদুমি বাই জানকি ফাইকা ।

- মাদুমি : উসীকাঙগ-ত চীঙ বাদুখীঙ ককলায়ই বাগসা-ন বাকসা উঙলাইখা মারে । তিনি চীঙ কানাই নীঙ বাই আঙ সেঙনি তেরেনিঙ রিলাইনানি ।
- জানকি : তিনি খাই আঙ নন মেচেননানিতা মারে, নন খাই আঙ তিনি মেচেনয়ই তসে তঙয়া মারে, নন তিনি মেচেননাই-ন মেচেননাই ।
- মাদুমি : আঙ-ব নন মেচেননাই মারে জেসাখাই ফা-ন, নীঙ তিনি নায়ই তঙদি নীঙখাই তিনি আনি থানি চেনখাতা মারে ।
- জানকি : ফাইদি খাই তাবুক-ন অর-ন রিলাই খিবলাই-সিডানী ।

- মাদুমি : দ খাই মারে ।
 [জানকি বাই মাদুমি ফুঙনি সিমি জে সেঙনি
 জুধ্ধ রিলাইমানি তাই সাঅই মানলাইলিয়া কেকেকে
 মেচেনই মানলাইয়া উঙলাই তঙলাইখা দিবর
 খেগই থাংব মেচেনলাই মানলাইয়া আবতাই
 উঙতে উঙতে আতকাসা দিবর খেগই থাঙ মানি-ন
 মাদুমি নুগই রিখা]
- মাদুমি : অঙখা মারেই-কনাহারদি সালনি দিবর খেগই তঙখা
 নাহারদি মারে ম সেঙনি জুধ্ধঅ নীঙ ব চেনলিয়া
 আঙ-ব চেনলিয়া চাঙ বাগসা-ন বাকসা উঙখা মারে ।
 আসা খাইঅ চাঙ তাবুক খাই বুইবাই জুধ্ধ খীলায়ই
 মানখা, চাঙ-ন জত বরক পাইয়া মারে ।
- জানকি : মারে নীঙ থাইচা রীচাবই খীনারিদি ।
 মাদুমি রীচাব’ ।

অ, মারে ননদে আঙলে সারে, জেসীকলে তঙগ আসীক-ন মায়া-ন বারে
 নীঙ বাইলে জিবন’ চাঙ কীনাই তঙখাই মানয়ালে চাঙন হারে ।
 জিবন’ থানচা চাঙলে তঙখাকাই কেবদে চাঙন দারে
 অ জুগিতি কীনাই মায়ান রিখাই তে-ব কীতাল খাই কারে ।
 মায়া কুসুঙসা রিঅইলে থানী, নীঙ বাইলে তঙলাঙগানী ।
 অ নীঙ বাইলে বায়াপি কতর খাইনী ।

অ, মারে নন দে আঙলে সারে ...

- জানকি :
 অ, মারে ননদে আঙলে সারে, জেসীকলে তঙগ আসীক-ন মায়া-ন বারে ।
 নীঙ বাই লে জিবন’ চাঙ কীনাই তঙখাই মানয়ালে চাঙন হারে ।
 তঙকীচাঙ তঙগই মাই খপচা চানী, দুঙগুর তীয় কীচাঙ খগই তুকু
 অ মারে নীঙ বাইলে মুঙসা খাইলাঙগানী ।
 খুমু যঙখাজি পুঙগইলে তঙগ, খানি বায়াপ-ন চঙগ
 কেবলে নুগয়া চাঙন বলঙনি রঙগ চঙগ ।
 অ, মারে ননদে আঙলে সারে ...

মাদুমি

:

অ, মারে ননদে আঙলে সারে ...
বলঙ মুইকীতীঙ থাপাঅ সঙগ, চুঙলে কীনীই খাই বলঙগ তঙগ
চাঙলে বলঙনি তামসা নুগ।
চাঙলে বর তঙ মাফা সাই মানয়া, নরগন চাঙলে মায়া সারেয়া
হাকচাল তঙতীতীই রিডানী নরগন দয়া।
অ, মারে ননদে আঙলে সারে ...

জানকি

:

হাকচাল তঙতীতীই নরগনি নগ' কায়া, নরগনি মানই তঙগ সায়া।
খাইয়াসাকলে নরগন চাঙলে মায়ান পকয়া।
ফায়ই সালচা নরগন খুলুমানী, আফুরু নরগ বাই থাঙচা খাই তঙগানী
তাম খাই তঙখা চাঙ বুইন ফুনুগানী।
অ, মারে ননদে আঙলে সারে ...

মাদুমি

:

অ মারে ননদে আঙলে সারে ...
তাখুক বুখুক বাই চাঙলে মালাইয়ানী, কীপাল ককতমা আফুরু সানী
অ চাঙলে তঙথগই তঙলাইয়ানী
তীইসা তীইখেরেঙ হলঙ, চাঙ তাবুক তঙগ বলঙ
সালচা চাঙ ফায়ই নুগজাগ ফাইয়ানী গলঙ।
অ মারে ননদে আঙলে সারে জেসীকলে তঙগ আসীক-ন মায়ান বাবে
নৌঙ বাইলে জিবন' চাঙ কীনীই তঙখাই মানয়ালে চাঙন হারে।

[জানকি বাই মাদুমি রীচাবলাইতে রীচাব-লাইতে
নগ ফাইসিঙগ ফায়ই তঙমানি জরা হিনকাই রাঙগিয়া
বাই জাঙগিয়া মীসাইন ককলাইনানি হিনই
রীকফেরেলায়ই তুবলায়ই ফাইয় জানকি বাই মাদুমিনি
গানাতীই খায়ই বরকন বরক হিনই সৌঙয়া হাই কাই।]

মাদুমি

: জলেজাগই হিনু এই নরগ সাব চিনি ম বলঙগ
মীসাইন সিকার খায়ই ককনাইরক। ম বলঙগ নরগ
মীসাইন কগই মানগীলাক ম বলঙনি মীসাইন চাঙ
রিঅই তনিমানিসে-নরগ কগই মানগীলাক।

- রাঙগিয়া : এই নরগ সাব চাঙ মীসাই সিকার খাইনাই-রকন মানা খাইনাইরক। নরগনি কক বাইদে চাঙ মীসাইন ককয়া তঙনানি, নরগ বীরাই খাই বীরাই, বীরাইনি তঙমুঙ-ন তঙদি অর আথেরে- পাথেরে তা উঙহরদি।
- জানকি : চাঙ বীরাই হিন-ব বীরাইনি ককন খীনাডি উঙয়া-খাই থেরা খুলাই থাঙগানী তাবুক-ন চাঙ নরগন সিনিরিঅই খিবানী।
- জাঙগিয়া : নরগদে চাঙন সিনিনানি, চাঙনদে নরগন সিনিনানি সাদি তাবুক-ন নরগন চাঙ চীলা হিনই সিনিরি খিবানী।
- মাদুমি : ফাইদি তাবুক-ন অরঅ চাঙ ব নরগন চাঙ বীরাই হিনই সিনিরি খিবানী।
- রাঙগিয়া : বীরাইতীতাই বিসি তা লাইদি সাঅইদে মান আনি মুঙ রাঙগিয়া বিনি মুঙ হিনকাই জাঙগিয়া আঙ খাই দঙগর কামিঙনি আনি বানি মুঙ হিনকাই সুদিরাম, বিনি কামিঙ খাই হাতীঙ কামিঙ বুফানি মুঙ হিনকাই উদিরাম চাঙ য়ারতাই ব বাই চাঙ কীর্নাই।
- জানকি : চাঙ-ব মারে মারাই-ন আনি মুঙ হিনকাই জানকি বিনি মুঙ হিনকাই মাদুমি চাঙ ম বলঙনি বুবাগ্রা চাঙ আববাই-ন কেন-ব মীসাই, মসক, উাগ তাইজ ত মানীইনন ককরিয়া বুইন' আবনি বাদে-ব তকসা তকতীইন-ব চাঙ ককরিয়া। চিনি অরনি মুইন কগই তীলাঙনানি হিনকাই চাঙ বাই জুধ খায়ই কীর্পীলাই উঙগই চাঙন মেচেনই মুইন কগই তীলাঙগই থানানি নাঙগানী উঙয়া খাই কিসা ফা-ন য়াতেতেঙ উঙগই মানিয়া।
- রাঙগিয়া : নরগ বীরাইতীতাইদে আবতাই ককন সাঅই তঙ, নরগ চুঙন পাইন চাঙ বেলে চীলা নরগ বেলে বীরাই।

- মাদুমি : চাঁও বীৰাইৰক হিনকাই চীলানি সীলাই গিলামা
জাগাঅ কাঁপীলাই চাঁও বীৰাইন নৰগনি চীলারক
থপচা ফা-ন পাইয়া রিলাইসে নাইদি।
- রাঙগিয়া : ফাইদি খাই তাবুক নৰগ মারে মারাই।
- মাদুমি : নৰগ-ব ফাইদি য়ারতাই।
- জাঙগিয়া : নীঙ আঙ বাই ফাইদি জানকি।
- জানকি : ফাইদি খাই। মারে বাই খাই রাঙগিয়া রিলাই- থন।

[রাঙগিয়া বাই খাই মাদুমি জুশ্ব নাঙলাইখা
জাঙগিয়া বাই হিনকাই জানকি জুশ্ব রিলাই খা,
সেঙনি জুশ্ব রিলাইমানি-বা অ সেঙগ হর সিমি-ন
চুঙগই তঙসিঅ জিলিকনি সাকাই জিলিক খাই।
রাঙগিয়া-ব মাদুমিন চেনরিনানি নাইয়, মাদুমি-ব
রাঙগিয়ান চেনরিনানি নাইয়। যাঙগ জাঙগিয়া-ব
জানকি-ন চেনরিনানি নাইয়, জানকি-ব জাঙগিয়ান
মেচেননানি নাইয়। আবতাই খাই জুশ্ব রিলাইতে
রিলাইতে উল' খাই মারে মারাইৰকনি থানি
য়রতাইৰক পাইলিয়া উঙগই খারলাই থাংকা বুইনি
হুগ' আলেম কাঁনাই কাঁচার নিলামানি হাদুক কলক
মাতাই খাই, মাদুমি বাই জানকি-ব অ য়রতাই ন
মানজাগখাই বুথারই থিবই রিনানি হিনই বৰগন
ৰীকফেৰেঅই থাংকা য়রতাইনি লগি লগি খায়ই
অ হুগ আলেমনি হুউইচেঙ কাঁনাই কাঁচারনি লামা
হাদুক কলকমাতাই। রাঙগিয়া বাই জাঙগিয়া
য়রতাই খাই অ হুগ আলেম হুউইচেঙন লাইদৰপ
উঙখা, মাদুমি বাই জানকি খাই অ হুগ আলেম
হুউাচেঙ লামানি কাঁনাই কাঁচার' থাংগই সগইদ্রপ
হিনকাই-ন চইতর তালনি জৰা-বা বুই অ হুগ
আলেম' হর রিঅই রিখাই অ মারে মারাইৰক তাই
খারই থানানি লামা কাঁৰাইখা বাই হুউই চেঙতাই
খায়ই খারই দুঙগুর তাই বিসিঙগ হাবই খারই

আর-ন হরসা তঙলাই তাইনি সাল' খাই আইচুগ'
 খাই অ হুগনি হাতাল তাঁই খায়ই ফায়ই বরকনি
 নগ' ফায়ই তঙ ফাইলাইখা কীচাঙ কীচাঙ খাই।
 আব বাই-ন তাবুক অ জাগান মারে হাদুক হিনই
 মুঙ ফারই রিঅ। অ হাদুকনি মুঙ-ন মারে হাদুক।]

মাদুমি বাই জানকি থাংকা।

দলিতনি সেঙ বুবাগ্রা, মালতি তাই রঙগতি ফাইকা।

- রঙগতি : দাদা নীঙ বিখা বিরনানি হিনই থাং ফা-ন চাঁঙ
 বাই কিসা বীথাগই ককন সালাঙদি দাদা চাঁঙ নীঙ
 বাই কিসা কাম তঙগ।
- সেঙ বুবাগ্রা : দ তাম কক তঙ সানানি হিনকাই সাদি আঙ বিখা
 বিরনানি নাঙগানী বিখা বিরই তুবখাইসে আঙ
 দিবর' সঙগই চাফাইনানি নাঙগানী।
- মালতি : দাদা নীঙত বিখা বিরনাই-ন চাঁঙ-ব সাঅই মান'
 বিখা বিরই চানাই হিনই নিনি কামিঙ বর নিনি
 মুঙবা তাম চাঁঙ আব নিনি থানি কিসা সাঅই
 মাননানি মুচুঙগ চাঁঙ।
- সেঙবুবাগ্রা : নরগ আবন সাঅই মানই তাম খাইনানি আঙ বিখা
 বিরই চানাই বরক আন বিখা বিরই চানাই-ন
 নুঙদি।
- রঙগতি : আবতাইয়া দাদা নীঙ চাঁঙন সেই সেই ককন সাকাই
 চাঁঙ নিনি মুঙসাসাঁক কামদে খায়ই রিঅই মান-ন
 নায়ই মানখামন চাঁঙ। নীঙ চাঁঙন সেই সেই বিসাস
 খায়ই সাকাইবা।
- সেঙ বুবাগ্রা : নরগন আঙ আনি ককন সানানি-ব লাচিঅ
 সানানি-ব কিরিঅ বুইনদে সাঅই সুঅই রি-ন।
- মালতি : চাঁঙ সায়া দাদা চাঁঙ সায়া নীঙ জে সামানি ককন
 বুইন থপচা ফা-ন সায়া চাঁঙ আবতাই সানাই

- বীরাইয়া বীখা খুলগই সাদি নিনি ককন, তা কিরিদি
চাঙন সাদি জত কক-ন।
- সেঙ বুবাগ্রা : আঙ দলিতনি সেঙ বুবাগ্রাসে, চিনি দলিত বুবাগ্রা
বলঙ বুবাগ্রা বাই জ্বন্দ্ব খাইলাইয়ই পাইয়া উঙগই
থাঙকাই আঙ দলিত বুবাগ্রানি সেঙ বুবাগ্রা
তঙমানিসে আঙ বইবাই সিনিজাগনানি কিরিঅই
বিখা বিরনাই হিনজাগনানি বাগই বিখা বিরই চাঅই
তঙগ। বুবাগ্রা বাই বুবাগ্রা কুসুসঙ খাই বুথারই
খিবজাগবাইখানা।
- রঙগতি : চাঙ তিনিনি সিমি-ন নিনি লগিঅ তঙনাই, চাঙব
নৌঙ হাই-ন বিখা বিরনাই বুবাগ্রা বাই বুবাগ্রা কুসু
নাইতুকনানি বাগই। তাই থাইসা কক দাদা নৌঙ
চাঙন সেঙ বাই জ্বন্দ্ব খাইমানি ফীরাঙদি চাঙ-ব
নিনি লগিঅ তঙগই জ্বন্দ্ব খাইনানি নৌঙ কানি-ন
জ্বন্দ্ব খাইমানি ফীরাঙদি।
- রঙগতি : চাঙ খীনানি সিমি-ন বিখা বিরলাইনাই।
- মালতি : খীনা ফুঙনি সিমি-ন নখরনাই আঙ বাই রঙগ।

সেঙ বুবাগ্রা, রঙগতি তাই, মালতি থাংকা।
বিখা বিরনানি রঙগনি বাই মালতি ফাইকা।

- মালতি : বাই আঙলে রিগীনাই কিচিক মিচিক কানই ফাইকা
বিখা বিরমানি বাই খাপেঅই তঙনানি বাগই
নৌঙ-ব আঙ হাই-ন কানই হিমদি বাই।
- রঙগতি : আঙ-ব আবতাই খাই-ন কানই ফাইকা তিনি
পুইলাবা বিয়াঙ ফাইসিঙ সীকাঙ থানাই।
- মালতি : দঙগর কামিঙগ হিমদি বাই আঙ উইসা ফা-ন
দঙগর কামিঙন নুগয়াখ তিনি নায়ই ফাইনানি
হিমদি দঙগর কামিঙন।

[রঙগতি বাই মালাতি তুইসুমু লেতীরা পেতীরা

- খায়ই ফুলই বীখীনাই চিপরক পরক খায়ই য়াগ’
 দামীরা খুঙচা খুঙচা তীয়ই লাঙগা জ-ন খুঙচা
 হরই নখরই থাঙলাইখা বিখা বিরনানি হিনই।
 য়াঙগ দঙগর কামিঙগ সমতিয়া বাদারাই তাই
 বুবাথ্রা বাই বুবাথ্রা কুসু বাদারাইনি নগ’ আচুকলাই
 ককন সালাই তঙমানি জরাত থাংগই সগইকা
 রঙগতি বাই মালতি বিখা বিরনানি হিনই]
- রঙগতি** : কামিঙগ হাবই সাকা চাঙ বিখা বিরনাইসে চাঙন
 কিসা বিখা রিহরবাইদি আমাসঙ বাবুসঙ চাঙ
 সাতাম সালবীরাই উঙগই থাংকা মাই-ন মীচানা
 উঙগহ চাঙ বিখা বিরনানি ফাইয়, অ মাই মীচায়া
 উঙগই-ন।
- মালতি** : অ মাই অগ খাইমানি চাঙন মাই সে কিসা চারি
 বাইগীরাদি চাঙ মাইন চায়াখাই তাই থাঙগই
 মানলিয়া।
- বুবাথ্রা** : সেরেক সেরেক খাই সাঅ ম বিখা বিরনাইরকবা
 চাঙন সাঅই দে মান-ন হিন’ মরকবা সাববা
 উঙবাইখা ?
- বাদারাই** : মরক বিখা বিরনাইরকসে বরগন তা কিরিদি নীঙ
 বুবাথ্রা উঙগই।
- সমতিয়া** : নীঙ-ব তা কিরিদি বুবাথ্রা কুসু উঙগই।
 [রঙগতি বাই মালতি বাদারাই বাই সমতিয়ানি
 ককন খীনাই বুজিঅই মানখা, মরগবা চিনি
 দলিতনি বুবাথ্রা বাই বুবাথ্রা কুসুসে উঙগানাবেলে
 হিনই বুজিলাই থাংলাইখা]
 রঙগতি সঙ লামাত হিমতীতাই সালাইয়ই
 ফাইলাইঅ।
- মালতি** : বাই রঙগ চাঙ থাংগই পুইলা মালাইমানি বরক
 খরকনাই আব বুবাথ্রা বাই বুবাথ্রা কুসুয়াদা।
- রঙগতি** : আব বরগয়া খাই তাই সাব সীলাই তাবুক কেবন-ব

কুসতাম ফান তা সালাইদিখ নিরাল খীলায়ই
তঙগীরাদিখ। তাবুক সেঙ বুবাথ্রা বাই কক
সালাইরাগলাই খিবগীরাানাখু উল' জেসা তেসা
উঙলাইয়ানা।

মালতি

: ফুত ফাত ফান তা খাইলাইদি বাই তাবুক।

রঙগতি বাই মালতি থাংকা।

রাঙগিয়া বাই জাঙগিয়া ফাইকা।

রাঙগিয়া

: বা, বা! অ বীরীইরকবা সেঙনি জুন্দ্ব খায়ই
মানলাইবেলে চাঁঙন তাই কিসা খাই-ন বুথারই
খিবি রিখামনতা য়ার, হুগ আলেম হুগজাগ
হুউাইচেঙনি লামা হাদুকতীই খাই খারই
ফাইলাইসে চাঁঙ য়গলাই থাঙলাইসিঅ য়ার,
উঙয়াখাই চাঁঙ বরগ বাই বুথারইসে
খিবজাগবাইখামন।

জাঙগিয়া

: অ বীরীই খরকনীই বরগ আসাঁক সেঙ বাই জুন্দ্ব
খাইলাইমানি-বা সীরীঙলাই তঙখা চাঁঙ পুইলাফুরু
বরগন আসাঁক মানই তঙগ হিনই সাঅইসে মানয়া
আবতীই হিনই। চাঁঙ বরগন কয়ইসে বরগনি বীখা
বুবতীই তমজাগলাইয়ই নাইলাই মানখামন য়ার।
ফাইদি য়ার চাঁঙ আর তাই উাইসা থাংগই
নাইলাইমানি হাম' তেব তেব খায়ই বরগ তাম খাই
তঙলাই নাইচমই নাইলাইয়ানা চাঁঙ তাখুকনীই
থাংলাইয়ই।

রাঙগিয়া

: হিমদি খাই য়ার ব সাল' থাংলাইনাই? থানানি
হিনকাই দাকতি-ন থাংলাইমানিসে হাম'।

জাঙগিয়া

: পুইলা থাংগই তাম কামন খাইলাইমানি চা-ন য়ার?

রাঙগিয়া

: থাংলাই নাইগীরানাখ য়ার, উল' আর থাংগই
বুদ্দিন কারেলাইয়ানা তাম খাইলাইমানি চা-ন।

- জাঙগিয়া : বীরাইরক খাই নাইথক নাইথকসে য়ার ।
- রাঙগিয়া : আঙ খাই বরক হাই বীরাই নাইথক কুনু জাগা-ব
নুগয়াখ । বরগন চাঙ য়াগ খায়ই মানখা কই তাই
কুবুনি বররকন-ব জুশ্ব খাইনানি ফাঁরাঙগই মানখা
হিনকই চাঙ বলঙ বুবাথানসে চেনরিঅই খিবই
মান' তাই কুসতাম ফান কক হিনই কীরাই, না
য়র ।
- জাঙগিয়া : নীঙ থিক কক-ন সাকা য়ার পুইলাঅ বীরাই
খরকনাইন চিনি য়াগ' খায়ই মা নাহারগীরনাই উল
বরগ বাই চাঙ বাই খায়ই মা উনসুকলাইয়ানীতা
থানচা খায়ই আচুকলায়ই আবতাই য়াদা য়ার ?
- রাঙগিয়া : আউ বরগ খরকনাইন-ন য়াগ' খায়ই মা
নাহারগীরনাই-ন য়ার ।

রাঙগিয়া বাই জাঙগিয়া থাংকা ।

মাদুমি বাই জানকি ফাইকা ।

- মাদুমি : মারে মিয়াঅ রাঙগিয়া বাই জাঙগিয়া চাঙ বাই
মানজাগখাই বরগ সাঅই মানখামন চিনি থানি
বুলে বুথারগীলাখামন খরকনাইন-ন খাঅই তনি
চিনি ককতাই খায়ই তনিঅই মানখামন চিনি জে
কইতীতাই খায়ই ।
- জানকি : আউ মারে আবতাই খায়ই-ন তনিঅই মানখা-
মন । তাই ককন তা সাসিদি মারে তাই উইসা-
সীকদে চাঙ বাই মানজাগফাই-ন সাঅই মানানী
আফুরু খাই চাঙ খাই তগলা উঙগই বরগন খাই
তকমা সীনামই তনিনাই ।
- মাদুমি : চীলা খাই কাহাম কাহাম নাইথকগীজাসে, তাই
উইসাসীকদে ফাই-ন নায়ই তঙদি মারে ।
- জানকি : তাবুক বরগন নুগখাই বুথারই খিবনাদে মারে ?

মাদুমি : বুথারয়া মারে তাবুক মানজাগখাই চিনি নগ'তুবই
চিনি কইতীতীই খাই তনিউনুতা মারে
মানজাগগ্রাখনলে ককন তা সালাইদি মারে।

মাদুমি বাই জানকি থাংকা।

সেঙ বুবাগ্রা, মানতি তাই রঙগতি ফাইকা।

রঙগতি : দাদা তানখীলাই কতকনি থাইন নুগানী বুখীলাই
ফিকুঙ য়ামফীরা চানু, দাদা নন সই সই ককন'ন
সাউনানী, দঙগর কামিঙনি বাদারাই বাই সমতিয়ানি
নগ'সে চিনি দলিতনি বুবাগ্রা বাই বুবাগ্রা কুসু খারই
তঙগ, চাঙ আর বিখা বিরনানি মুঙ রিঅই থাংগই
নুগই তঙগইখা, ফিয়া বরগ খাই চাঙন সিনিরীকয়া
চাঙন কুবুই চাচা-ন বিখা বিরনাই হিনই তঙলাইঅ।

মানতি : চাঙ আহাই খাই থাংগই দঙগর কামিঙগ কাঅইখা,
কুকুবুই চাচা-ন বিখা বিরনাই হাইখাই-ন কামিঙগ
কাঅই মাই মীচায়া হাই খাই মাই সানই চামাসি
খায়ই চিনি বুবাগ্রনি গানাঅ খায়ই মাই চাঅই
তঙলাইখা সালাইমানি ককন খীনা- লাইনানি
হিনই আফুবু খাই চাঙ সাঅই মানখাতা ম চিনি
বুবাগ্রা বাই বুবাগ্রা কুসুসেবীলা হিনই।

সেঙ বুবাগ্রা : য়াফা খরবই বা, বা, নরগন আঙ আনি খা খুলগই
হামবাই রিঅ নরগ হামই তঙদি চাঅই তঙদি
হলঙনি আয়ু তীয়বুকনি আয়ু মানই তঙদি। নরগন
খীনানি সিমি-ন সেঙ বাই তাম খায়ই জুন্দন খাই
ফীরীঙনানি, আঙ নরগ বাই জুন্দন খাইকাই চাঙ
জেসা কাই ফা-ন বলঙ বুবাগ্রান মেচেনই মাননাই।

রঙগতি : চাঙ সীরীঙনাই জুন্দন খাইনানি।

মানতি : চাঙ জুন্দন সীরীঙগই মেচেননাই-ন মেচেন নাই
বলঙ বুবাগ্রান। মেচেনই চাঙ তঙথতক চাথতকনি

	সালন তুবনাই-ন তুবনাই, তাই উইসা কিফিল রিঅই তুবনাই তঙকাঁচাঙ চা কাঁচাঙ সালন।
রঙগনি	: দাদা, খীনানি সিমি-ন চুঙন জুন্দ খাইনানি ফাঁরীঙদি।
সেঙ বুবাগ্রা	: খীনা নরগ দাকতি ফাইবাইদি, খীনা-ন সীরাঁঙ লাইনাই। খীনা সীরাঁঙখাই তাইনি সা-ল খাই বিখা বিরমানি হাই কাই থাংগই চাঙ বুবাগ্রা বাই বুবাগ্রা কুসু বাই মালাইনানি।
মালতি	: আউ চাঙ নন তীলাঙগই থাংনাই বরগনি থানি, তা উনাদি দাদা নীঙ।

সেঙ বুবাগ্রা, রঙগতি তাই মালতি থাংকা।
রাঙগিয়া বাই, জাঙগিয়া ফাইকা।

রাঙগিয়া	: বিয়াঙ ফাইসিঙগ থাঙলাইগীরানানি য়ার?
জাঙগিয়া	: উসীকাঙগ চাঙ বরগ বাই পুইলা মালাইমানি জাগাঅ-ন হিমগীরাদি য়ার, খুব সাবদান খায়ই তেব তেব খাই হিমদি বরগ সীকাঙ সাঅই মানখাইলে ফাইঅই চাঙন ফান বাদুখীঙ বাই কগই রিফাইয়ই মান', আববাই-ন বাঙখুঙ মুইসুরুম ফান চাঙ ফাইমানি সাঅই মানয়া জাত খায়ই হিমদি।
রাঙগিয়া	: ম-ন বেলে য়ার চাঙ উসীকাঙগ বরগ বাই মালাইমানি জাগা, ময়াদা ম-ন বেলে য়ার উয়াঙ ফাইসিঙগ তাই কিসা থাংলাই নাইয়ানী হিমদি।
জাঙগিয়া	: উ বলঙ বিসিঙগ হুকু হাই নুহুরমানি আব তাম নাইলাইগীরীনা য়ার হিমদি আয়াঙগ থাংগই নাইগীরানা।
রাঙগিয়া	: অ আব-ন অ বীরীইরক তঙমানি জাগা উঙগানী হিনই সেরেক সেরেক খাই সালাইঅ।
জাঙগিয়া	: ইক নাহারদি আব-ন উসীকাঙগ আঙ বাই জুন্দ রিলাইনাই বীরীই আবয়াদা য়ার আব-ন না?

রাঙগিয়া : আউ আব-ন য়ার। তাবুক তাম খাইনানি য়ার সাদি।
 জাঙগিয়া : ফাইদি য়ার চাঁঙ তাখুকনাই খাই রীচাবই
 নাইলাইয়ানী আফুবু বরগ তাম খাই তঙ নাইয়ানী।
 রাঙগিয়া : দ রীচাবলাইদি খাই য়ার।

জাঙগিয়া বাই রাঙগিয়া রীচাব খা।

রাঙগিয়া :
 অ নন সিনিয়া আঙ উইসা নুকখা, হামজাগই বীখান বুখা
 সাবলে উঙখা আসীক নাইথককা, হা বাই সুবিঅই তঙখা
 বীখা বিসিঙগ বাবে মা তঙখা, লগিসঙ খাইনানি
 নন-ন খা খায়ই তঙখা।
 নন নুগমানি অ সালনি সিমি বীখাঅ অরনদি নাঙখা।

জাঙগিয়া :
 অ নন সিনিয়া আঙ উইসা নুকখা, হামজাগই বীখান বুখা
 সাবলে উঙখা আসীক নাইথককা, হাবাই সুবিঅই তঙখা।
 বীখা বিসিঙগ বাবেমা তঙখা, লগিসঙ খাইনানি।
 নন-ন খা খায়ই তঙখা।
 নন নুগমানি অ সালনি সিমি-ন বীখাঅ অরনদি নাঙখা।

রাঙগিয়া :
 বুইন খীনারি হান খীনারি উাগমান কঙগরাই মানরি
 দে-স সুবীরাই গুরি নাইতুগই, তুবানী নন-ন খাররি।
 নন সিনিয়া সীঙথকয়া তকয়া সীঙগই নাইমানিদে হাম-ন
 তামবা হিন-ন বীখা বুজিয়া, সীঙগইদে লাচিমান চা-ন?
 সীবা-ব উঙখা নীঙলে তাম-ব উঙখা মুঙলে
 অ নন-বা নানকদে হিনমানি হাম-ন?

জাঙগিয়া :
 সীঙয়ানি সীঙখাই সীঙগই রিখা খাই জলেজাগইদে তঙন
 বীসীক তঙখাইবা চালইলে নীঙ তঙ, হাকচাল সামপাদে উঙ তঙ
 তঙখাইলে সামপা উঙগই তঙখা খাই,
 আঙলে নাই মামাঙ মা তঙ।

রাঙগিয়া

:

সিয়া সাই মানয়া হুজুর, সাকাই উঙনাদে মনজুর
কুবুই চাচা-ন নন হামজাগ', আঙলে নীঙ বাই
তঙগানী ককজুর।

জাঙগিয়া

:

চেরাই থাঙমানি বেসকু-বেজুর নন খীলাইঅ যাগজুর
জেথানি নুগখাই ককন সাউনী, আন খীলাইদি মনজুর।
অ নানক যই আন খীলাইদি মনজুর।

রাঙগিয়া

:

অ নন সিনিয়া আঙ উইসা নুকখা, হামজাগই বীখান' বুখা
সাবলে উঙখা আসীক নাইথককা, হাবাই সুবিঅই তঙখা
বীখা বিসিঙগ বাবে মা তঙখা, লগিসঙ খাইনানি
নন-ন খা খায়ই তঙখা।

নন নুগমানি অ সালনি সিমি-ন, বীখাঅ অরনদি নাঙখা।

জাঙগিয়া

:

অ নন আঙ সিনিয়া আঙ উইসা নুগখা, হামজাগই বীখান বুখা।
সাবলে উঙখা আসীক নাইথককা, হাবাই সুবিঅই তঙখা
বীখা বিসিঙগ বাবে মা তঙখা, লগিসঙ খাইনানি
নন-ন খা খায়ই তঙখা।

নন নুগমানি অ সালনি সিমি-ন বীখাঅ অরনদি নাঙখা।

মাদুমি বাই জানকি ফাইকা।

[মাদুমি বাই জানকি মারে মারাই রাঙগিয়া বাই
জাঙগিয়া য়ারতাইনি রীচামুঙন আতকাসা বলঙ
বিসিঙগ খীনাঅই সেরেক সেরেক খায়ই থাংগই
নাইলায়ই তঙগইখা হুইজাগলাইয়ই বরগ য়ারতাই
রীচাবলাইমানি খীনালায়ই।

মাদুমি বুমারেজীকন সাকা সেরেক সেরেক
খায়ই মারে ফাইদি চাঙ-ব বরগন রীচাবই খীনা
রিগীরানা বরগ সিমিদে রীচাবই চাঙন খীনারিঅই
মান চাঙ খাই রীচাবই খীনারি মানয়াদা?]

জানকি : রীচাবদি মারে বরক সিমিদে রীচাব খীনারি মান,
চীঙ খাই রীচাবই খীনারি মানয়াদে ?

মাদুমি রীচাব :
অ তকসা বলঙনি বীসা, সাম' তা পুঙদি হাকচাল থাং পুঙদি খুকচা
বুফাঙ সাকাঅ সাম' নীঙ পুঙখাই তাম উঙফাইঅ বীখা ।
অ তকসালে নীঙ তকসা বীবতীই তকমুঙনি বীসা
কানিলে সাম নীঙলে পুঙ ফান সাবলে নন আসা ?

জানকি রীচা-ব :
অ তকসা বলঙনি বীসা, সামলে তা পুঙদি, হাকচাল থাং পুঙদি খুকচা
বুফাঙ সাকাঅ সাম' নীঙ পুঙখাই, তাম উঙ ফাইঅ বীখা ।
অ তকসালে নীঙ তকসা বীবতীই তকমুঙনি বীসা
কানিলে সাম' নীঙলে পুঙ ফান সাবলে নন আসা ?

মাদুমি :
নিনিলে আসানাই বাঙগইলে তঙমা, আববাই বাহারই পুঙগ
আবলে বাই-ন নীঙ বাইলে উঙনিয়া হিনই চিনি বীখাঅ চঙগ ।
অ তকসা অরনি কুতুলই বিরসাঅই থাংদি
মুকথাঙন কারই ইমাঙগ তা নুগজাগসিদি ।

জানকি :
বীখাঅ মায়া নীঙলে তা রিদি, থানাকাই থাংদি দাকতি নীঙ থাংদি
নীঙ হাই মায়ান রিনাই ফাইয়ানী পুঙগই নাইসিক তঙদি ।
নুঙলে থানা হিনকাইবা খুকচা পুঙ থাংদি
মায়ান তা কাকলাঙসুকদি ।
নীঙলে থাংকীলাই মুইতু উঙ তঙনাই
আঙলে তাম খাই তঙনাই ।

মাদুমি :
নীঙলে পক ফান আঙলে পকগীলাক
মায়া বাদুরি বীখাঅ সীলাক ।
তাম খাই তঙনাই সাল কাতেনানি, নীঙলে পুঙমানি ডানসুক তঙমানি
থাইয়াসাক আঙলে খীনাই থানানি
নিনি পুঙমানি খীনাই আঙলে দুখুন কাতেনানি ।

অ তকসা বলঙনি বীসা সাম' তা পুঙদি হাকচাল থাং পুঙদি খুকচা
বুফাঙ সাকাঅ সাম' নীঙ পুঙখাই, তাম উঙ ফাইঅ বীখা ।

অ তকসালে নীঙ তকসা বীবতাই তকমুঙনি বীসা
কানিলে সাম' নীঙলে পুঙফান সাবলে নন আসা ?

জানকি

:

অ তকসা বলঙনি বীসা, সাম' তা পুঙদি হাকচাল থাং পুঙদি খুকচা
বুফাঙ সাকাঅ সাম' নীঙ পুঙখাই, তাম উঙ ফাই-ন বীখা ।

অ তকসালে নীঙ তকসা বীবতাই তকমুঙনি বীসা
কানিলে সাম' নীঙলে পুঙ ফান সাবলে নন আসা

[রাঙগিয়া বাই জাঙগিয়া সাম' ফায়ই মাদুমি
বাই জানকিসঙন হিনপাইখা নরক মারে মারাই-
রক চীঙ য়ারতাইন বুথারই খিবদি চীঙ য়ারতাই
নরগনি থানি চী ও নিজিন মানজাগ ফাইকা হিনদি
চিনি য়াগ নরগন সুরহই রিখা, চীঙন তাবুক-ন,
চিনি য়াগন খাঅই য়গই মানয়া জাত খাইয়ই থপচা
রিঅই বুথারই খিবদি নরগ মারে মারাই চীঙ নরগ
বাই বুথারজাগখাই-ন দই-ন উঙলাঙনানি]

মাদুমি

: চীঙ মারেমারাই নরগ য়ারতাইন বুথারনানি
হিনকাই উসীকাঙগ নরগ চীঙন পাইয়া উঙগই
তঙফু-ন নরগন চীঙ বুথারই খিবই
মানখামনবেলে, চীঙ নরগন য়াকারই রিহরই নরগ
য়গই থাংগই মান', উঙয়াখাই নরগ য়গই থাংগই
মানয়া, চিনি থানি আর-ন বুথারই খিবই রিখামন ।

জানকি

: নরগ য়ারতাই-ন চীঙ মারেমারাই বুথারয়াঅই
য়াকারই রিহরমানি সেনরক তাবুক চীঙন উলতা
মীসীই কেনজুডা খিচাঅই তঙগ । চীঙ নরগন
বুথারনানি হিনকাই তাবুক-ব বুথারই খিবই মান',
চীঙ নরগন বুসে বুথারয়াতা । বুথার-নানিখাই
আফুবু-ন বুথারই খিবিঅই মানখামন ।

- রাঙনিয়া : নরগ মারেমারাই চাঁও য়ারতাইন বুথারলিয়া-বা চাঁও নরক বাই-ন ম বলঙগ তঙরীগই তঙসিনাই, নরগ-ব মারে মারাই চাঁওব য়ারতাই তঙরীক-ব কুসতাম খতি কীরাই।
- জাঙগিয়া : চাঁও নরগ বাই তঙরীগই তঙ-ব কুসতাম খতি হিনই কীরাই মারে-ব কাগলাইনানি নাঙয়া য়ার-ব কাগলাইনানি নাঙয়া।
- মাদুমি : নরগ য়ারতাই তঙনানি-ন হিনকাই চিনি কক তাঁই খায়ই মা তঙনাই, আহাই য়াখাই নরগ চাঁও বাই তঙগই মাননিয়া।
- জানকি : চাঁও জে সামানি নরগ য়ারতাই আবতাই-ন মা খাইনাই উঙয়াখাই চাঁও বাই নরক তঙগই মাননিয়া, চাঁও মারেমারাইনি ককন নরগ খীনায়া হিনকাইব। তাবুক-ন নরগ থাংগই মান' অরনি নখরই।
- রাঙগিয়া : নরগ মারেমারাইনি ককন চাঁও য়ারতাই খীনানাই নরগ জেসা ফা-ন সাদি চাঁও আব-ন খীনানাই জেসাফা-ন হিনদি।
- জাঙগিয়া : খীনানাই খীনানাই য়ারনি সীলাই আঙন বিসি খীনানাই নরগ মারেমারাইনি ককন।
রাঙগিয়া মাদুমিন তীলাঙ থাংগই মাদুমি-ন রীচাব'।
- রাঙগিয়া রীচাব' :
নরগন চাঁওলে মানথক, নরক-ন চিনি নাইথক
নরক বাই তিনি পুইলা মালায়ই বীসীকসে চাঁওলে তঙথক।
মায়া মুকুমু কমল থানিয়া, নরগন নুগয়াই চাঁওলে তঙগই মানিয়া
রাঙচাকসঙ থীয়ই থাঙগই-ব সগইলে গেলেনিয়া।
- মাদুমি :
অ নরগন চুঙলে মানথক, নরগন চিনি নাইথক
নরক বাই তিনি পুইলা মালায়ই বীসীকলে চাঁওলে তঙথক
মায়া মুকুমু কমল থানিয়া, নরগন নুগয়াই চাঁওলে তঙগই মাননিয়া
রাঙচাকসঙ থীয়ই থাঙগই-ব সগইলে গেলেনিয়া।

জাৰ্জগিয়া :
নৱগন চুঙলে মানথক, নৱগন চিনি নাইথক
নৱক বাই তিনি পুইলা মালায়ই বাঁসীকলে তিনি তঙথক।
মায়া মুকুমু কমল থানিয়া, নৱগন নুগয়াই চাঙলে তঙগই মাননিয়া
রাঙচাকসঙ থীয়ই থাঙগই-ব সগইলে গেলেনিয়া।

জানকি :
নৱগন চুঙলে মানথক, নৱগন চিনি নাইথক
নৱক বাই তিনি পুইলা মালায়ই বাঁসীকলে তিনি তঙথক।
মায়া মুকুমু কমল থানিয়া নৱগন নুগয়াই চাঙলে তঙগই মাননিয়া
রাঙচাকসঙ থীয়ই থাঙগই-ব সগইলে গেলেনিয়া।

ৰাজ্জগিয়া :
তঙথক মায়ানি চাঙলে বঅইলে তঙয়া হাঙগা
কানি-ন নৱগন লগিঅ তীয়ই হৱরিঅই তনানী লাঙগা।
চাকনি বিসিঙব চাককিতিঙ কিতিঙ, হুগনি আৱিন মিথিঙ
অ মুঙনলে ফাৱই চাঙলে নুঙনাই নৱকন ফুতিঙ।

মাদুমি :
চাঙলে নৱগন মানখাব মৌতাই-ব তাগখা
বাঁখানি আডাস চাঙলে অৱ-ন পাইখা।
থাইয়াসা তঙগই-ন থানাই নৱগ বাই খানি আডাস বাইনাই
থানচা আচুগই নৱগ বাই ককন সানাই।

জাৰ্জগিয়া :
থাইকীলাই পাইসুকসিনাই, সাবলে সীকাঙ থানাই
চাঙলে সীকাঙ থীয়ই থাংলাঙব, ইমাঙগ ফায়ই নৱগ বাই ককন সানাই।
নৱগ-ন চিনিলে পাইথাক, তাইলে কাঁৱাইখা ৱিখা চাঙনলে মৌথাক
জানসঙন অৱঅ তঙগ খীনাঅই ফাইলে চাঙ অৱ বাঁথাক।

জানকি :
নৱগন ৱঙগ নৱগন সত-ৱবঙগ।
আবতাইলে উঙগই-ন নৱগ চাঙ খাইয় সঙগ।
ফাগুন উদীলা তেবসে ফাইতন চিনি বাঁখাঅ চঙগ
নাঙ বাইলে তিনি ককন সামানি আনি বাঁখাঅ তঙগ।

- জাঙগিয়া : নীঙ মীতাই রীচামুঙব' বর সীরাঙসীলাই নিনি মীতাই রীচামুঙন নিনি থানি খীনাঅ তাই বুইনি থানি ফান ম রীচাবমুঙরকন আঙ খীনায়াখ তাবুক নিনি থানি-ন আঙ খীনাঅ ।
- জানকি : আঙ বলঙগ তঙফান আঙ বলঙনি বরকয়া- বেলে আঙবা দলিতনি বরকসে, আঙ মুঙসা গথনা উঙগই সে আঙ আনি মারে বাই বলঙগ ফায়ই মালাইফাইঅ ।
- রাঙগিয়া : মরকবা রীচামুঙ, ন মানবাইঅ-ন তিতে ব তিনি আঙ বাই বাকসা-ন রীচাবই তঙগ ।
- মাদুমি : তামঙগই রীচাবই মানয়া উঙনানি-বা সেঙনি জুন্দসে খায়ই মানইবা । রীচামুঙনবা তামঙগই মানয়া উঙনানিবা সীরাঙমানি তঙবীলা ।
- রাঙগিয়া : চীঙ তাবুক য়ার বাই নগ' থাংগীরানাখু মাসঙ চীঙন কীমাজাগই তঙখীনা উল' চীঙ তাই উইসা ফাইপুরু নরগন তীলাঙগই থাংচিনাই চীঙ থাংকা তাবুক ।

রাঙগিয়া, জাঙগিয়া, মাদুমি তাই জানকি থাংকা ।
সেঙ বুবাগ্রা, মালতি তাই রঙগনি ফাইকা ।

- সেঙ বুবাগ্রা : নরগ উসীকাঙনি হাই খাইদা ফাইকা ।
- রঙগতি : ইক্লে উসীকাঙনি হাই খাই-ন ফাইকা ইক নাইসিকদি চীঙ রি কিচিক মিচিক-ন কানই ফাইমানি বিখা বিরনাইরক হাইখাই-ন ফাইকাতা ।
- মালতি : নাহারদি চীঙ লাঙগান হরনাই তুবলাইমানি-ব কিচিক মিচিক বিখা বিরয়াই-ন বিরথতক খায়ই চিনি বুমাখাঙন-ব নাইসিকদি তুইসুমু ফুলজাগ লেতেরা পেতীরা খাইজাগ । নীঙ-ব চিনি হাই-ন খাইদি বিখা বিরনাইন সলরিঅই ।

সেঙ বুবাগ্রা

: আঙ ব নরগ হাই খাই-ন থাংগানী তুইসুমু ফুলই লোতীরা পেতীরা খায়ই নরগনি উকলক উকলক খরাবে খরাবে খায়ই হিমই থানী। আঙ ব লাঙগা খুঙচান হরই খেয়াঙ খেয়াঙ খায়ই থানী নরকনি লগি লগি খায়ই।

[আবতীই খাই বরগ খরকতাম দঙগর কামিঙনি ফাইসিঙগ থাংলাইখা বিখা বিরনাই- রক হাই খাই দঙগর কামিঙনি বাদারাইনি নগন নাইতুকলায়ই বন বন সৌঙগই থাংগ, যাঙগদে বাদারাইসঙনি নগ উঙখা হিনই। আবতীই খাই সৌঙগই থাংতে থাংতে থাংগই সগইকা বাদারাইনি নগ']

সেঙ বুবাগ্রা

: খরাবে খরাবে খায়ই ততা কক সামানি হাই খাই ককন সাঅই সৌঙগ মদে দা বাদারাইনি নগ উঙখা হিন'?

বাদারাই ফাইকা।

বাদারাই

: নরগ সা ব উঙবাইখা হিনু?

সেঙ বুবাগ্রা

: চীঙ বিখা বিরনাইরকসে চীঙন বিখা কিসা কিসা রিহরবাই জানি খা তঙতীই খায়ই বিকা রিহরয়াসানি চীঙন তীয়রক কিসা খানিদি, কুয়াই খানাইসা-ব চারিতাই হরদি, আবনি বাদে-ব দুমা বাইসা নুঙগই মা থাংনাই চীঙ। আবতীই চীঙন খাইয়াখাই চীঙন বিখা রিহর-ব চীঙ তীলাঙয়া।

রঙগতি

: দাদা চীঙন বিখা হরয়াসানি উ দাইকুঙনি ফাইসিঙগ কিসা হিমগীরাদি চীঙ নীঙ বাই কাম কিসা তঙগ।

বাদারাই

: দ থাংগানী নরগ বাই-ন দাইকুঙগ, থাংয়াসানি দুমারক নুঙগই খিবগীরাদি, তীয়রক নুঙগীরাদি কুউইরক চাগীরাদি কীচাঙ কীচাঙ খাই-ন থানী।

- মালতি : তায়রক উল' ফাই অই নুঙফাইয়ানী কুয়াইরক-ব
উল' চাফাইয়ানী তাবুক হিমগীরাদি চিনি লগিঅ।
[আবতাই বরক খরকতাম বাদারাইন তীলাঙ
থাঙকা জাগা হাকচাল খায়ই জাগা হাকচাল'
তীলাঙগই আতকাসা বাদারাইন সীঙকা]
- সেঙবুবাগ্রা : নীঙ চীঙন তাবুক তেবসাকাই সাদি চিনি দলিতনি
বুবাগ্রা বাই বুবাগ্রা কুসু বর তঙ সাদি, চীঙন সই
সই ককন সাদি।
- বাদারাই : উ আবলে আঙ সাঅই মানজায়া বরগ বর তঙ।
আঙ বরগন সি-ব সিনিয়া আঙ সাঅই-ব মানয়া।
- সেঙ বুবাগ্রা : আবতাইয়া নন চীঙ কুসতাম ফা-ন খাইয়া বর
তঙ বরগ কিসা চীঙন সাঅই সিমিসে রিদি চীঙ
বরগ বাই মালাইনানি, বরগ বাই-ব কাম তঙগ।
- বাদারাই : আঙ নরগন সাখাবীলা আঙ সাঅই মানয়া হিনই।
রঙগতি : দাদা চীঙন বিসাস খাইদি চীঙ কেবয়া নিনি
বরক-ন, নীঙ চীঙন বরগ বর তঙ সাঅই রি-ব
চীঙ কেন-ব সায়া।
- বাদারাই : আঙ সাঅই মানয়া হিনই সাকাবেলে নরগ তাম
আন পেচেলায়ই সীঙনানি নাঙবা? আঙ সাঅই
মানয়া হিনই সাকাবেলে নরগন।
- মালতি : দাদা আবতাইয়া নীঙ সাঅই মাননাই বরক-বা
সাঅই রিদি হিনই সাঅতা নন।
- বাদারাই : আঙ সাঅই মানয়া হিনই সাকাবেলে নরগন
তামঙগই আন অসই সীঙগই তঙলাইবা?
- বুবাগ্রা কুসু : নীঙ কুবুইদে সাঅই মানয়া?
বাদারাই : আঙ কুবুই-ন সাঅই মানয়া।
রঙগনি : আফুরু খাই লাঙগা বিসিঙগ দাঅই তুবই ফাইমানি
সেঙন তিখীলাই তুবই ফায়ই হিনকা দা বাদারাই
নীঙ মনদে নুগখা সেঙন ফুনগই সীঙগ।
- বুবাগ্রা কুসু : ব লাঙগাঅ দাঅই তুবমানি তিখীলাই ফুনুককা।

- মালতি : ব সেঙন তিখিলাই ফুনুককা ।
- বাদারাই : আফুরু কাই কিরিজাগই সাকা, বুবাগ্রা বাই বুবাগ্রা কুসু আনি আর-ন বরগন হুয়ই তনিঅ আঙ কেব-ন সায়া খায়ই ।
- বুবাগ্রা কুসু : আঙ বিখা বিরনাইয়া, তাবুক আনি লগিনি বীরাই খরকনাই-ব বিখা বিরনাইয়া, চাঙ আগিনি সিমি-ন বুবাগ্রা বাই বুবাগ্রা কুসুন নাইতুকলাই তঙগ, আঙ সাব নৌঙ আন সিদে সিনি? আঙ দলিতনি চিনি বুবাগ্রানি সেঙ বুবাগ্রাসে ইক সিনিদি নৌঙ আন আঙন' সেঙ বুবাগ্রা । চাঙন বরগ বাই মালাই রিদি দা বাদারাই তাবুকবদে নৌঙ চাঙন কিরিঅই তঙখ ?
- বাদারাই : তাবুক খাই আঙ তাই নরগন কিরিলিয়া পুইলা পুইলা খাই নরগন কিরিঅই তঙমানি-ন নরগন সিনিয়া উঙগই ।
- রঙগতি : ফাইদি খাই নৌঙ বাই আঙ হেনসিব রিলাইয়ানী ।
- সমতিয়া ফাইকা ।
- সমতিয়া : বা নরগ অ কামিঙ দাইকুঙগ তাম ককন সালাই তঙলাই নগ' খাই সালাই মানয়াদে? তাম ককবা সালাইকা কিরিমিসিঙসা ।
- বাদারাই : কুসতাম-ন কিরিনানি কক হিনই কীরাই ম জত-ন চিনি খানি বরক মাঙসে আঙ চিনি অর ফাইনাই । বইরাতি খরকচা বাই হেনসিব রিঅই খিবকা নৌঙব তাই কাইসা বইরাতিবাই হেনসিব খাইদি ।
- সমতিয়া : ব তাই কাইসা বইরাতি মালতি বাই হেনসিব রিলাইখা ।
- বাদারাই : চাঙ তিনি বুবাগ্রা বাই বুবাগ্রা কুসুসঙ বাই মালায়-য়াখু খীনা সনিঅ মালাইয়ানী কাঁচাঙ কাঁচাঙ খাই ।
- বুবাগ্রা কুসু : আউ কুবুই কক-ন তাবুক চাঙ উ-ল ফায়ই মালাইসিডানী ।

সেঙ বুবাথ্ৰা, রঙগতি, মালতি, বাদারাই তাই সমতিয়া থাংকা।
বাদারাই, সমতিয়া তাই রাঙগিয়া ফাইকা।

- রাঙগিয়া : দা বাদারাই তাবুক চাঁঙ জত-ন থানচা উঙলাই মা তঙনাই চিনি দলিতনি হান চালকনাই বলঙ বুবাথ্ৰান চাঁঙ রীখীলাই রিহরই মানয়া হিনকাই চাঁঙ অর তঙগই মাননিয়া চাঁঙ তাবুক কামিঙ কামিঙগ সেঙনি জুধ খাই মানিন মা সীরাঙলাইনাই বলঙ বুবাথ্ৰান খকলাই খকলাই।
- বাদারাই : আবতাই জুধ খাইনানি ফীরাঙনাই চাঁঙ সাবন মাননানি, ফীরাঙনাই কীরাঙ নাঙগ, সাব ন মান-নবা আবতাই ফীরাঙনাই?
- রাঙগিয়া : আবতাই ফীরাঙনানি কীরাঙ বরক তঙগ আঙ রিফাইয়ই মান'।
- সমতিয়া : জুধ খাইনানি বাগই সীরাঙনানি হিননাই বরক গিলামা-ন তঙগ, তঙখাই তুবই রিফাইদি।
- রাঙগিয়া : বলঙনি বুবাথ্ৰানি থানি জেসাখাই ফা-ন সেগই নাহারনানি-ন নাঙনাই বলঙ বুবাথ্ৰানি থানি চিনি দলিত হান সেগই মানখা হিনকাই বিনি বলঙনি হাশ্বে-ব চিনি য়াগ' কীলায়ই থানাই সেগই মান খাই-ন উঙগ।
- বাদারাই : রাঙগিয়া নীঙ জেসা খাই ফা-ন তুবই রিফাইনানি নাঙনাই। আঙ-ব য়াঙগ জুধ সীরাঙনাই বররকন থিক খায়ই তনসকগানী থিক থাক খায়ই।
- সমতিয়া : সীরাঙখাই বিসি নাঙনিয়া ফুঙসাই-ন সীরাঙগই থিবই মাননানী।

বাদারাই, সমতিয়া তাই রাঙগিয়া থাংকা।
সমতিয়া, বুবাথ্ৰা তাই বুবাথ্ৰা কুসু ফাইকা।

- সমতিয়া : বুবাগ্রা চাঁও তাবুক চিনি দলিত হান নারীকনানি বাগই জুধ খাইনানি সীরাঙলাইনানি ককন থিক উঙলাইখা জুধন ফীরাঙলাইন তুবুনানি তুবই ফাইনানি কক উঙলাইখা, তুবুনাই উঙখা চিনি কামিঙনি-ন রাঙগিয়া হিনজাগনাই বরক খরকসা।
- বুবাগ্রা : কাহাম ককন অর বলঙনি বুবাগ্রা ফাইমানি উ-ল' চিনি দলিত হা তামঙখা নাইদি নকবুরুম, নকবুরুম মাই-ন মীচায়া উঙলাই তঙবাইখা বলঙনি থা রীগই বলঙনি মুয়া রীগই চাঅই মা তঙবাইখা মাই মীচায়াসে বীসীক থাইলাই তঙ আব কু-ন লেখাজুঙখা কীরীই উঙলাই তঙখা।
- বুবাগ্রা কুসু : অ রাঙগিয়া হিনজাগনাইন চাঁও বাই কিসা মালাই রিদি। ব বাই চাঁও কিসা ককন সালাইনানি।
- সমতিয়া : বুবাগ্রা কুসু নীও সামানি কক কুবুই-ন তঙগ, আঙ অ রাঙগিয়া হিনজাগনাই বরক-ন কুবুই খাই-ন নন তুবই ফুনুক ফাইয়ানী।

বাদারাই বাই সেঙ বুবাগ্রা ফাইকা।

- বাদারাই : ইক নাইসিকদি নিনি সেঙ বুবাগ্রান নিনি সেঙ বুবাগ্রা তাবুক-ব তঙখ। ব থাইয়াখ তাবুক বন' নাইসিগই নাইগীরালা ম নিনি সেঙ বুবাগ্রাদে বুবাগ্রায়া নাইসিগই নাইদি কাহাম খাই।
- সেঙ বুবাগ্রা : আঙ তাবুক-ব কীথাঙ-ন তঙখ নিনিবা য়াকুঙ আনিবা কীপাল, আঙ থাইয়াখ বুবাগ্রা। বুবাগ্রা কুসুন-ব খুলুম' আঙ। আঙ নরগন নাইনানি মুচুঙমানি তাই কুল কীরীইখা বাই তিনি নরগন নাইনানি ফাইঅ। আঙ তিনি নরগন নুগই সরগ' সাকাঅ কাঅই আচুগই তঙমানি হাই মা তঙখা।

- বুবাগ্রা : নীঙ হামই তঙদি চাঅই তঙদি সেঙ বুবাগ্রা, তাবুক খাই সালাইদি চিনি দলিত হান চীঙ তাই উইসি চিনি য়াগ' কিফিলই নাহারনানি হিনকাই তাম খায়ই কিফিলই নাহারই মাননাই।
- বুবাগ্রা কুসু : খলুমকা বুবাগ্রাচীঙ চিনি হান তাই উইসি কিফিলই নাহারনানি হিনকাই চীঙ জত-ন থানচা উঙলাইনানি নাঙনাই।
- বাদারাই : খলুমকা বুবাগ্রা, পুইলা সীকাঙ জুম্ব খাইমানি কাইদান সীরাঙনানি নাঙনাই। অ কাইদান সীরাঙগই মানই খিবসুকনানি নাঙনাই আবতাই খাই জত-ন মানসুগই খাংবাইখাই জত-ন তাই উানানি কীরাই। আফুরু খাই জত-ন গুরু গুরু খাই বরগন চীঙ চেনরি রিহরই মাননাই, চীঙ থিককাই জত-ন চুরু বাকসা খায়ই দকদাক খাই সীরাঙগই নখরলাইখাকাই।
- বুবাগ্রা : আবতাই-ন খাইলাইদি নরগ।
- সেঙ বুবাগ্রা : আবতাই খাইনাই বুবাগ্রা।
- বুবাগ্রাকুসু : খীনানি সিমি-ন তিয়ার উঙদি।
- সমতিয়া : তিনি আসীক-ন কক তাবুক কুতুললাইসিউনী।

সমতিয়া, বুবাগ্রা, বুবাগ্রা কুসু, সেঙ বুবাগ্রা তাই বাদারাই থাংকা।
রাঙগিয়া বাই জাঙগিয়া ফাইকা।

- রাঙগিয়া : য়ার চিনি দলিতনি হান সেগই আচুগই তঙনাই বলঙ বুবাগ্রানি থানি চীঙ চিনি দলিত হান সেগই নাহারই মানয়া হিনকাইলে চীঙ তাই বিয়াল বিপদ কাগয়া মাঙ উঙগই তঙসিনাই।
- জাঙগিয়া : আউ য়ার আবখাই আবতাই-ন উঙগই তঙসিনাই বিয়াল বিপদ উঙগই চীঙ-ব আবতাই খাইলে তঙয়া জেসা খাইফা-ন বলঙ বুবাগ্রান অরনি রীখীলাইনানি নাঙনাই।

- রাঙগিয়া : য়ার চাঁঙ তাবুক জতনি সীলাই বিসি খায়ই জুন্দ্ব খাইনানি সীরাঙনানি নাঙনাই তা-ম কাইসা খায়ই বরগন জুন্দ্বন হারে রিনানি নাঙনাই। চাঁঙ-ব তে-ব বিসি খায়ই জুন্দ্ব খাইনানি সীরাঙনানি নাঙনাই য়ার আহাইয়াখাই চাঁঙ বরগন পাইগীলাক।
- জাঙগিয়া : য়ার ফাইদি চিনি আবরকন তাই বলঙগই খাই তনিলিয়া বরগন নখরিতাই তুবই ফাইমানিসে হাম'। বরগন তুবই চিনি কাম' ফীনাঙমানিসে হাম'। বরগন বলঙগ তনিঅই চিনি কু-ন ফাইদা কাঁরীই।
- রাঙগিয়া : বরগন চাঁঙ নাহারই-ন ফাইমানি হাম' য়ার। বরগন নাহারই চিনি কাম' ফীনাঙমানি হাম'।

রাঙগিয়া বাই জাঙগিয়া থাংকা।
জানকি বাই মাদুমি ফাইকা।

- জানকি : মারে চাঁঙ মীতাই খাই তঙমানি সীলাই দলিত-অ নখরই জুন্দ্ব খাইনানি জতন-ন ফীরাঙগই রিলাইমানি হামানী, চাঁঙ ম বলঙগ তঙগই চুকয়া।
- মাদুমি : নীঙ থিক ককন-ন সাকা মারে চাঁঙ বলঙ বিসিঙগ তঙগই বলঙ বুবাগ্রাসঙন য়াগুল সুঅই মাননিয়া, বিনি সীলাই চাঁঙ দলিত নখরই জুন্দ্ব খাইনানি সীরাঙলায়ই চাঁঙ পাল খায়ই জুন্দ্ব খাইনানি বাগই নখরলাই থাংগই জুন্দ্ব খায়ই তঙমানি হাম'।
- জানকি : চিনি অ য়ারতাইরক ফাইগীরাথন বরগন অ ককন সাঅই চাঁঙ বরক বাই বাগসা খাই থাংগই দলিতনি জত বরকন থুমই নাহারই জুন্দ্বন খাইনানি ফীরাঙগই তঙগইমানি হাম' বলঙ বুবাগ্রান খগই।

রাঙগিয়া বাই জাঙগিয়া ফাইকা।

- মাদুমি : ইকেলে য়ারতাইরক ফাইকা চীঙ নরগন-ন নাইসিঙগই তঙলাইঅ, চীঙ মারে বাই কীনাই কক কিসা সালাইয়ানী নরক বাই হিনই।
- রাঙগিয়া : তাম ককন সালাইনানি চীঙ বাই সাদি।
- জানকি : নরক বাই ককন সামুঙ-বদে পাইমুঙ তঙ, নরগ বাইবা জে থাইয়াসাক ককন সালাই থানাই নরগ-ব য়ারতাই চীঙ-ব মরেমারাই।
- জাঙগিয়া : চীঙ নরগ বাই অর ককন বিসি সায়া চিনি নগ'নরগন তীলাঙগই আর খাই নরগ বাই ককন বিসি খাই সালাইনাই তামঙগই হিনবা, তীয় থাংতানি আ থাং আ থাংতানি তীয় থাং, তাই চীলা থাংতানি বীরীই থাং, বীরীই থাংতানি চীলা থাং, চীঙ নরগ মারেমারাইন তীলাঙগই থানানি ফাইঅ। নরগন চীঙ তাই বলঙ বিসিঙগ তনিলিয়া চিনি দলিতনি জাগাঅ তীলাঙগই থাংচিনাই চীঙ। আর থাংগই জুধ খাইনানি বাগই জুধ খাইনানি সীরীঙলাই চীঙ।
- মাদুমি : আববা কক কাহামনি ককসে চীঙ নরগন সাই হিনই চঙকাবা নরগ বাই চীঙ থাঙয়াখাই তাই সাব বাই থাংনাইবা, হিমদি তাবুক-ন তাইদি চীঙন। দাকতি থাংকাই থাংগই জুধ খাইনানি সীরীঙলাই তঙমানি কাহাম উঙনাই। চিনি ম লেরইসে থাংকা, তে-ব দাকতিসে উঙনানি তঙমানি, দাকতি জুধ খাইনানি সীরীঙলাই সীরীঙগই বলঙ বুবাগ্রান রীখীলাই রিহরমানি হাম' চীঙন তীলাঙনানি খাই তিনি-ন তাইদি।
- রাঙগিয়া : বরগ মারেমারাইন তিনি-ন তীলাঙগই থাংচিনাই য়ার।
- জাঙগিয়া : তীলাঙয়াখাই তাই তাম খায়ই অর তনসি- নানিবা য়ার বলঙগ দুখু মানরিঅই, তিনি-ন তীলাঙগই থাঙচিমানি চাসিঅ।

- মাদুমি : উ তিনিসে চাঁঙ বলঙন য়াকারনানি কীলাই- সিঅ আসীক সালনি চাঁঙ অর তঙগই তঙলাই- মানি ।
- জানকি : আঙ আসীক সাল কীবাঙমা ম বলঙগ নীঙ বাই তঙলাইমানি মারে চাঁঙ থানচা খাই আঙলে খীনা খাই ম বলঙন খাইচিঙ খাইচিঙ উঙগই মুইতু উঙগই তঙনাই মারে ।
- রাঙগিয়া : হিমদি তাবুক নরগনি নগ বলঙগলিয়া নরগনি নগ তাবুক দলিতসে অঙখা হিমবাইসিদি নরগ বলঙন খাইচিঙ চিঙ উঙগই ফাইদা কীরীইখা । তাবুক খাই নরগনি নগ দলিত জাগাঅসে ।

রাঙগিয়া, জাঙগিয়া, জানকি মাদুমি থাংকা ।

[বলঙ বুবাগ্রান খগই দলিতনি বুবাগ্রা পানদা কাইসা কবকখা ।

অ পানাঅ জত-ন ফয়ই মালাইলাইখা ।]

- দলিতনি বুবাগ্রা : আঙ বলঙ বুবাগ্রান খগই নরগ-বাই কক থাইচা থাইচু সালানিনানি হিনই পানদা কাইসা কবক- খা, ম আঙ পানদা কবকমানিন নরক কেন-ব সাঅই মাননিয়া । তামঙগই আঙ নরগন পানদা কবক হিনবা চাঁঙ জত-ন চিনি দলিতনি বলঙ বুবাগ্রান রীখীলাই রিহর মানয়া হিনকাই চাঁঙ তাই সুখি সানতি খয়ই মা তঙনানি কীরীই, নরগ তাম হিনবাই ।
- দলিতনি বুবাগ্রা কুসু : চিনি বুবাগ্রা চাঁঙন কক থাইসা সাঅই খীনারিমানি অ কক সই সইদে উঙনা ?
- কামিঙনি বরক : আব সই সই-ন চাঁঙ জত-ন থিক-ন তঙগ, চাঁঙ তাবুক জুদ্বন খাইনানি বাগই জুদ্ব খাইনানি সীরীঙলাইনানি ।
- দলিতনি বুবাগ্রা : নরগ আনি প্রজারক উঙগই থিক ককন-ন সাকা তবে ম ককন বলঙ বুবাগ্রা খীনাঅই থাংগানী,

- সাবদান হানি-ব খুনজু তঙবা । নরগন সাব জুন্দ্বন ফাঁরীঙনাই বরকন থিক খাইদি । ফাঁরীঙ- খাই থিক খাই ফাঁরীঙনানি নাঙগানী আবতাই ফাঁরীঙনাই বরক অর কাইসাসাঁকদে তঙ যাগ তিসাদি ।
- মাদুমি : আঙ জুন্দ্বন খাইনানি ফাঁরীঙগই মান' বুবাথ্ৰা ।
- জানকি : আঙ ব ফাঁরীঙগই মান' বুবাথ্ৰা, আঙ ব বাই মারে মারাই । আনি মুঙ খাই জানকি, বিনি মুঙ খাই মাদুমি ।
- বুবাথ্ৰা : হামবাই নরগন আঙ, আনি দলিত হাঅ নরগ হাই বীরাই জুন্দ্বন ফাঁরীঙগই মান' হিনই আঙ বিসাস খীলায়ই মানয়া ।
- [প্রজারক জত-ন সাবাস সাবাস হিনই য়াফা খরববাইখা]
- বুবাথ্ৰা পানদা কবকমান মীথাগই রিখা ।

বুবাথ্ৰা সঙ থাঙকা ।

সমতিয়া, বাদারাই, মালতি তাই রঙগতি ফাইকা ।

- সমতিয়া : নরগ চিনি দলিতনি বুবাথ্ৰা মিয়াঅ পানদা কাইসা কবগগই অ পানদাঅ ব সাকা চীঙ তাবুক জত-ন জুন্দ্বন খায়ই বলঙ বুবাথ্ৰান চিনি ম হানি বন রীখীলাইয়ই রিহরনানি নাঙনাই জুন্দ্বন খায়ই । আব বাই-ন চীঙ তাবুক জুন্দ্ব-ন খাইনানি বাগই জুন্দ্বন খাইনানি সীরাঙনানি নাঙনাই জত-ন ।
- বাদারাই : আঙ লে জুন্দ্বন খাইনানি সীরাঙনাই জুন্দ্বন খায়ই বলঙ বুবাথ্ৰা ন রীখীলাই রিহরনানি নাঙনাই-ন উঙয়াখাই চীঙ বানচোনি লামা কীরাই-ব জদি তঙগই তঙখা হিনকাই চীঙ জত-ন থাইবাইনাই নরগ তাম হিন ?

- মালতি : আঙ-ব সীৰীঙনাই নরগনি লগি।
 রঙগনি : আঙ খাইবা সীৰীঙনাইদেবা আঙ-ব সীৰীঙনাই
 নরগনি লগি।
 সমতিয়া : চীঙ সিমি-ন সীৰীঙনাই চিনি লগিঅ তেব বরক
 তঙনাই।

সমতিয়া, বাদারাই, মালতি তাই রঙগতি থাংকা।
 দলিতনি সেঙ বুবাগ্রা, সমতিয়া তাই বাদারাই ফাইকা।

- সেঙ বুবাগ্রা : সমতিয়া বাদারাই ফাইদি খীনাদি সিমি জুধ
 খাইনানি সীৰীঙনানি বাগই বরক ন থুমলাই- নানি
 নাঙগানাবেলে। বরকন তুবই ফাইনানি হিনকাই
 কামিঙ কামিঙগ থাংগই থুমই তুবই ফাইনানি
 নাঙনাই তাবুক-ব জত বরক মীতাই ককন সাচুগই
 মানয়াখ।
 সমতিয়া : আঙ তিনি-ন থাংগই জত ন-ন জানকগই
 রিঅই-বাইয়ানী, খীনাঅ জুধ খাইনানি বাগই
 জুধন সীৰীঙলাইনানি নাঙগানী হিনই।
 বাদারাই : আঙ খাই চিনি দঙগর কামিঙ ফাইসিঙ থাংগই
 সাইয়ানী খীনানি ককন, নীঙ খাই থাংদি সমতিয়া
 হাতীঙ কামিঙনি বীখাগ। চীঙ তাবুক-ন জ-ন লামা
 তীঙসা খায়ই থাংলাইয়ানী জানি লামা জা খায়ই।
 সেঙ বুবাগ্রা : থাংদি তাবুক-ন থাংবাইদি খীনা আয়খাই-ন জত-ন
 ফাইবাইনানি নাঙগানী জুধন খাইনানি
 সীৰীঙনানি বাগই।
 সমতিয়া : হিমদি সমতিয়া চীঙ থাংখাই থাংগই ফাইলাইয়ানী
 তাবুক-ন, খীনানি খবরন রিঅই।
 বাদারাই : চীঙ থাংকা সেঙ বুবাগ্রা।

সেঙ বুবাগ্রা, সমতিয়া বাই বাদারাই থাংকা।
 রাঙগিয়া বাই জাঙগিয়া ফাইকা।

- রাঙগিয়া : য়ার খীনা আইখাই-ন জুধন খাইনানি সীরাঙ-লাইনানি কক। চাঙ জত-ন জুধ খাইনানি- কাহাম কাই সীরাঙলাইখা হিনকাই বলঙ বুবাথান চাঙদে পাইয়া তঙ?
- জাঙগিয়া : কক তা সাদি য়ার জুধন ফীরাঙনাইসে কাহাম খাই ফীরাঙনানি নাঙগানী য়ার। জুধন খাইনানি হিনকাই কাহামখাই সীরাঙনানি-ব নাঙনাই জত-ন।
- রাঙগিয়া : জুধ খাইনানি ফীরাঙনাইরকবা বরক মারে মারাইরকসে ফীরাঙনাই বরগ কাহাম খাই-ন মা ফীরাঙনাইতা।
- জাঙগিয়া : হিমদি য়ার চাঙ থাংগই বরগ মারেমারাইন চাঙ জুধ খাই জেসা খাই ফা-ন বলঙ বুবাথানি সীলাই চাঙ পাইনানি নাঙনাই, হিমদি য়ার তাবুক বরগ বাই চাঙ সীরাপচা আচুকলাই খিব- লাইয়ানী।

রাঙগিয়া বাই জাঙগিয়া থাংকা।
রাঙগিয়া, জাঙগিয়া, মাদুমি তাই জানকি ফাইকা।

- রাঙগিয়া : নরগ মারেমারাই-ত খীনা জুধন খাইনানি ফীরাঙনানি নাঙনাই, চাঙ তাবুক নরগন সাত জুধ খাইনানি সীরাঙনাইরকন জুধ খাইয়ই কীপীলাই উঙনানি বাগই নরগ কাহাম খাই ফীরাঙনানি নাঙনাই।
- জাঙগিয়া : বীরাই-ব সীরাঙগই রাঙনানি নাঙনাই, চীলা-ব সীরাঙগই রাঙনানি নাঙনাই চীলা বাই বীরাই জুধ খাইনানি বাগসা-ন বাগসা রাঙয়া হিনকাইলে জুধন জয় খাইয়ই মানগীলাক। নরগ চীলান-ব আসীক-ন ফীরাঙনানি নাঙনাই বীরাইন-ব আসীক-ন ফীরাঙনানি নাঙনাই।

- মাদুমি : চাঁও তাম ফাঁরীও জুন্দ খাইনানি নরগ নাই- সিগই তঙলাইদি, চাঁও পুইলা বীরীইরকন ফাঁরীওগানী, আবনি উল চীলারকন ফাঁরীও- গানী।
- জানকি : চাঁও জেসা খাই ফা-ন বলঙ বুবাথান মেচেন- নাই-ন মেচেননাই। নরগ নাইসিগই তঙলাই- নাবা।
- মাদুমি : নরগ-ব চাঁওন জুন্দ খাইনানি ফাঁরীওথানি কিসা চুবাচুবুদি। নরগ পুইলা সীকাও চীলারক ন ফাঁরীওগীরাদি নরগ ফাঁরীওবাইমানি উল' চাঁও চীলারকন ফাঁরীওগানী।
- রাঙগিয়া : নরগ মারেমারাই খীনানি হর আইয়াসানি তাই উাইসা খায়ই থিক খাই সীরীওলাই খিবলাইগীরাদি।
- জাঙগিয়া : তাম খাই খারনানি নাঙ তাম খাই সীকাও থানানি নাঙ, তাম খাই উল' উনসুবুনানি নাঙ আবরকনি কাইদারকন-ব কাহাম খাই ফাঁরীও- গই রিদি। জুন্দ খায়ই তঙফুবু জে সীকাও আগগই ফাইনাইন বন তাম খাই বুথারনানি নাঙ আবরনব কাহাম খাই ফাঁরীওগই রিহরনানি নাঙনাই কাহাম খায়ই ফাঁরীওসুগই।

রাঙগিয়া, জাঙগিয়া, মাদুমি তাই জানকি থাংকা।

দলিতনি বুবাথান বাই বুবাথান কুসু ফাইকা।

- বুবাথান : বুবাথান কুসু নীও খীনাঅ জুন্দ খাইনানি জুন্দ সীরীওলাইফুবুঅ নীও থাঙগই নাইয়ই তঙগইদি রি কিচিক মিচিক কানই চুমুই নন কে-ব বুবাথান কুসু হিনই সিনিয়া উঙনানি বাগই আবতাই খায়ই থাংদি নীও খীনা।

- বুবাগ্ৰা কুসু : আজ্ঞা বুবাগ্ৰা নীঙ আন সামানি হাই খাই-ন আঙ
থাংগই তঙগইয়ানী সাব বীবতাই খাই জুন্দ্বন
খাইনানি সীৰীঙলায়ই তঙগইয়ানী। ফীৰীঙ-
নাইরক-ব বীবতাই খাই ফীৰীঙ আব ব নাইয়ই
তঙগইয়ানী।
- বুবাগ্ৰা : বুবাগ্ৰা কুসু চীঙ-ব বুইন সিমি-ন নায়ই তঙগই
উঙনিয়া চীঙ-ব আগিনি সীলাই জুন্দ্ব খাইনানি ন
তে-ব বিসি খায়ই সীৰীঙনানি নাঙনাই, উঙয়াখাই
আগিনি হাই-ন চীঙ বলঙ বুবাগ্ৰানি থানি চেনই
থাংউনানি নাঙনাই।
- বুবাগ্ৰা কুসু : আজ্ঞা বুবাগ্ৰা তাবুক চীঙ জদি বলঙ বুবাগ্ৰান
মেচেনই মানখাই সুদু চিনি দলিত হান সিমি চীঙ
মানয়া, জিতিঅই মানখাই বিনি বলঙনি হান-ব
চীঙ মাননাই।

বাদারাইবাই সমতিয়া ফাইকা।

- বাদারাই : বুবাগ্ৰা, খীনা-ত ফুঙ আইখাই-ন জুন্দ্ব খাইনানি
বাগই জুন্দ্ব সীৰীঙলাইনাই, অ জুন্দ্ব খাইনানি
সীৰীঙমানি জাগাঅ নরক থাংগই মীৰীগই মা
তঙগইনাই। তামঙগই হিনবা নরগ তঙমানি-ন
জুদা উঙগই তঙগ।
- সমতিয়া : জুন্দ্ব হিনমানি অরনি ককয়া, বারি কিরিমিসানি
কক। চীঙ মখিপিঅ জেসা খাই ফা-ন বলঙ
বুবাগ্ৰান চেনরিনানি নাঙনাই-ন নাঙনাই। তাবুক
চীঙ বন চেনরিঅই মানয়াখাই চীঙন-ব কাইসান
ফা-ন নারীকনিয়া, জত ন-ন বুথারই খিবি
রিবাইয়ানী।
- বুবাগ্ৰা : ব চিনি দলিত হাঅ ফাইমানি উল' বাসীক বরক
দুরগতি উঙখা সাঅইদে মানখা নরক? বীৰীই

চেরাই রমফেরে সুকফেরে খাইজাগ মাঙ তঙবাইখা
তাবুক-ব, মাই মীচায়া উঙগই থাইপুঙ, মুয়া,
বলঙনি থা রীগই চাঅই মা তঙবাইখা। মাই
মীচায়াসে বাসীক থীয়ই তঙ লেখাজুঙখা কীরাই।

বুবাগ্রা, বুবাগ্রা কুসু, বাদারাই তাই সমতিয়া থাংকা।
মাদুমি বাই জানকি ফাইকা।

- মাদুমি : মারে নীঙ-ব মাই মীচায়া উঙগই বলঙগ মুয়ান
ফায়ই নগ' তীলাঙগই মাই ন মীচায়া-বা মুয়া ন
বুগই চাঅইনানি হিনই বলঙগ ফাইমানি-বা মীসা
বাই মালায়ই নিনি মা বাই কাগলায়ই থাংমানি ন
মইতু খায়ই জুধ খাইনানি ন কাহাম খাই ফীরীঙ
রিনানি নাঙগানী মারে।
- জানকি : মারে আঙ অ ককরকন জত-ন মুইতু তঙগ।
আবনি বাগই-ন চীঙ জুধন কাহাম খাই-ন
ফীরীঙনানি নাঙনাই মারে। চীঙ জুধ খাইনানি
ন কাহামখাই ফীরীঙ রিয়াখাই বলঙ বুবাগ্রা পায়ই
থানাই চীঙ খাই চেনই থাংচিনাই, আহাই খাই চীঙ
তাই ম হাঅ মা তঙগীলাক, চীঙন ফায়ই বুথারই
খিবই রিফাইনাই।
- মাদুমি : মারে আন বলঙ বুবাগ্রানি মুইসিরি পালিমা
মীতাইয় তাননানি হিনই রমই তুবমানিন আঙ তাই
পগই থাংসি-ন মারে? আনি মা-ব রানদি চেরাই
ফাঙসিনিসে আনি বা কীরাই চীঙ জেসা খাই ফা-ন
বলঙ বুবাগ্রান মা মেচেননাই মারে।
- জানকি : আসীকলে বরক ফাইবাইখীনা মারে হিমদি
থাংলাইমানি হামলাইসিঅ, তিনি অর থুপচা খীনা
উর থুপচা খায়ই ফীরীঙলাইয়ানী। কুসতাম তা
উনাদি মারে চীঙ-ন পাইনাই, চীঙ কাহাম খাই
ফীরীঙগই রিমানি বাইসে কক।

রাঙগিয়া বাই জাঙগিয়া ফাইকা।

- রাঙগিয়া : হিমবাইদি তাবুক জুন্ধ সীরাঙনাইরক ফাই বাইখা।
পুইলা কিসা কিসা খাই ফাঁরাঙগীরাদি উল' কাহাম
খাই ফাঁরাঙদি।
- জাঙগিয়া : চাঁঙ য়ারতাই দল কাইসা তীলাঙগানী, নরগ মারে
মারাই দল কাইসা তীলাঙগই থাংদি।
- মাদুমি : চাঁঙ পুব গালা ফাইসিঙগ থাংগই ফাঁরাঙগানী মারে
বাই। নরগ পসিম গালা ফাইসিঙগ থাংগই
ফাঁরাঙদি নরগ য়ার তাই।

রাঙগিয়া, জাঙগিয়া, মাদুমি তাই জানকি থাংকা।

জুন্ধন খাইনানি সীরাঙনানি বাগই দলিত হানি প্রজারক ফাইকা।

[প্রজারকনি বিসিঙগ বাগসাবা দা রাঁউ তুবখা,
বাকসাবা লাখা তুবখা, বাকসাবা বাদুখুঙ চাখীলা
তুবখা, বাকসাবা সেঙ তুবখা। আবতীই খাই
তুবলায়ই ফাইবাইখা জে কামিঙনি খবর
রিজাগনাই রক ফায়ই জত-ন জুন্ধ খাইনানি
সীরাঙনানি বাগই রেদি উঙলাই তঙবাইখা বলঙ
বিসিঙনি হারেপ কতরমা সাব জাগাঅ খায়ই
সিরিঙ সিরিঙ খাইলাইয়ই। আরঅ বরক মাসা
তঙগ হিনই সাঅই মানয়া জাত খায়ই আসাঁক
বরক গিলামাঅ কক খাইচা ফা-ন সানাই কঁরাই।

মাদুমি বাই জানকি ফাইকা।

- জানকি : নরগ জত-ন ফায়ই অ জাগাঅ বাঁচাঅই হল
উঙবাইদি, তাবুক নরগ হল উঙবাইখাই জুন্ধন
তাম খাই খাইনানি নাঙ আঙ তাবুক পুইলা নরগন

ফাঁরীঙগানী। পুইলা বলঙ বুবাগ্রানি দল ফাইপুবু
হিনকাই নরগ খারই তঙদি, খারই তঙগই নরগন
বরক নুকয়া হিনকাই আফুবু নরগ কগই বুথারদি
বরগন জে উঙসাক খায়ই। তাবুক নরগ বাদুখুঙ
বাই ককনানি য়াগন সহ খাইবাইদি। আঙ বাদুখুঙ
বাই ককনানি ফাঁরীঙকা মারে নীঙ তাবুক সেঙ
বাই জুদ্বন খাইমানিন ফাঁরীঙদি।

মাদুমি

: ফাইবাইদি সেঙ বাই জুদ্বন খাইনানি সাঁরীঙ-
নাইরক।

মাদুমি সেঙবাই জুদ্বন-ন খাইনানি ফাঁরীঙকা,
ফাঁরীঙতে ফাঁরীঙতে জুদ্বন খাইনানি মানবাইখা।
রাঙগিয়া বাই জাঙগিয়া য়ারতাই-ব জত কামিঙ
কামিঙগ থাংগই ফাঁরীঙগই জ-ত কামিঙনি
বররক-ব জুদ্বন খাইনানি কাহাম খাই সাঁরীঙগই
মানবাইখা। তাবুক ব সাল' জুদ্বন খাইনানি ন
সিমিসে নাইসিঙলাই তঙলাইসিঅ।

মাদুমি বাই জানকি থাংকা।

বুবাগ্রা বাই বুবাগ্রা কুসু ফাইকা।

বুবাগ্রা

: বুবাগ্রা কুসু চিনি প্রজারক জুদ্বন খাইনানি হিনই
সাঁরীঙলাইমানি জুদ্বন খাইনানি কাইদা ন
মানলাইসুককা ফন জত-ন, তাবুক ব সাল' জুদ্বন
খাইলাইনানি আব ন সিমি-নসে নাইসিঙলাই
তঙলাইসিঅ।

বুবাগ্রা কুসু

: আজ্ঞা বুবাগ্রা, তাবুক নীঙ ব সাল' জুদ্বন খাইনানি
তারিখ খায়ই ককতুনতিন নাহারই ককতুন রিহরদি
আহাই খাই-ন উঙগই থাংবেলে বিসি তা লের
রিদি জুদ্বন খাই কাই খায়ই পায়ই থাংলাইমানি
হাম'।

- বুবাগ্ৰা : আহাই খাই ব সাল' জুশ্ব খাইমানি হাম-ন নৌঙ
সাদি খাই ববাগ্ৰা কুসু, নৌঙ জে সাল' সাঅই রিঅ
অ সাল'-ন জুশ্ব মা খীলাইলাইসিনাই।
- বুবাগ্ৰা কুসু : ম তালনি মঙগলবারনি সাল' খাইকাই চাউনীতা
বুবাগ্ৰা, ম তালনি মঙগলবারনি সাল'-ন জুশ্ব ন
খাইদি, আহাই খাই-ন চিনি জয় উঙনাই বুবাগ্ৰা,
নৌঙ তাবুক ককতুনতি ন নাহারই ককতুন রিহরদি
বলঙ বুবাগ্ৰান, রিহরদি জুশ্বন খাইনানি তারিখন,
আহাই খাই-ন উঙগই থাংগানী।

বুবাগ্ৰা বাই বুবাগ্ৰা কুসু থাংকা।
ককতুনতি, বুবাগ্ৰা তাই বুবাগ্ৰা কুসু ফাইকা।

- ককতুনতি : বুবাগ্ৰা আন তাম খাইনানি দদ-র খায়ই নুঙ- হর ?
- বুবাগ্ৰা : ম তালনি সৌকাঙনি মঙগলবারনি সাল' বলঙ
বুবাগ্ৰা বাই জুশ্ব খাইনানি বাগই নৌঙ বন তিতুন
কাইসা তুনই রিঅইদি। অ সাল' ব বাই চৌঙ জুশ্বন
খাইনানি নখরলাই ফাইনাই, আরনি বিসিঙ ব-
জদি জুশ্ব ন খাইয়া হিনকাই বিনি গদি ন য়াকাই
রিখন, উঙয়াখাইবা জুশ্ব ন খায়ই তাই উাইসা
গদিঅ আচুকখন।
- কক তুনতি : আজ্ঞা বুবাগ্ৰা, হরদি আনি য়াগ' তিতুন ন আঙ
তিনি-ন থাংগই তুনই রিঅই ফাইয়ানী।
- বুবাগ্ৰা কুসু : নৌঙ তিনি-ন তিতুন ন তুনই তিনি-ন ফায়ই চৌঙন
সাপাইদি, চৌঙ-ব তিনিনি বিসিঙগ-ন জতন-ন
সাঅই থিক খায়ই সাজকরি তনিবাইনানি। সেঙনি
জুশ্ব খাইনাই ন হিনকাই সেঙনি জুশ্বন খাইনানি
বাগই সাজকরি তনিনানি, বাদুখুঙ বাই জুশ্বন
খাইনাইরকন হিনকাই বাদুখুঙন সাজকরি
তনিনানি। দা-রীউা তীয়ই জুশ্বন খাইনাইরকনত

সাজকনাই-ন সাজকনাই। থাংদি ককতুনতি দদর
থাংগই নীঙ চাঙ বাই তিনি তাই উইসা মালাই
ফাইদি।

কক তুনতি
বুবাগ্রা

: আউ তাবুক-ন থাংকাতা আঙ।
: ককতুনতি নীঙ বাই আসাঁক-ন কক।

ককতুনতি, বুবাগ্রা তাই বুবাগ্রা কুসু থাংকা।
[মঙগলবারনি সাল ফায়ই সকফাইখা।

আগিনি দলিতনি বুবাগ্রা বিরগু বাই বলঙ
বুবাগ্রা বরজু জুশ্ব রিলাইনানি রেদি উঙলাইখা।

য়াঙনি মায়ুঙ বাই আয়াঙনি মায়ুঙ ফাইলাইয়ই
বীচালাই তঙলাই ফাইলাইকা, য়াঙনি করাই বাই
আয়াঙনি করাই-ব ফাইলাই বীচালাই তঙলাই
ফাইলাইকা। য়াঙনি রথ বাই আয়াঙনি রথরকন-ব
তাইলাই বীচালাই তঙলাইখা।

দা বাই রীউা তীয়ই জুশ্ব খাইলাইনাই রক-ব
য়াঙ বাই আয়াঙ বাই বীচালাই নাহারলায়ই
তঙলাইখা। বাদুখুঙ বাই বাদুখুঙ তাইয়ই জুশ্ব
খাইনাইরক-ব বাদুখুঙ য়াগ' তীয়ই নাহারলাই
তঙলাইখা, তাবুকলে রিলাইদি হিনকাই-ন
রিলাইনানি বাগই রেদি উঙলাই তঙলাইখা জরা
ফায়লাইগীরাখন হিনই। জখন জরা-ব ফাইকা
হুচিয়ার তামখা তাবুকলে রিলাইদি হিনই, আবতাই
জুশ্বনি হুচিয়ার তামমানি বাই বাকসা বাই-ন জুশ্ব
রিলাইখা, দা-রীউা বাই দা-রীউা, বাদুখীঙ বাই
বাদুখুঙ, সেঙ বাই সেঙ, রথ বাই রথ, মায়ুঙ বাই
মায়ুঙ, করাই বাই করাই খায়ই রিলাইখা জুশ্বন,
আবতাই রিলাইমানি বাগসা বাই-ন বরক রথারথি
কীলায়ই থাইকা। জুশ্ব সালচানি কারই সালনাই,

সালনাইনি কারই সালতাম, আবতাই খাই
 তালসানি কারই তালনাই, তালনাইনি কারই
 তালথাম জুদধরিলাই মানি উল' খাই জুদধ
 পাইলাইখা। অ জুদধঅ বলঙ বুবাগ্রা বরজু বুবাগ্রা
 কুসু সেঙ বুবাগ্রা তাই গিলামা বলঙ বুবাগ্রা
 ফাইসিঙনি নাঙনাই সকনাই থীয়ই থাঙবায়ই বলঙ
 বুবাগ্রাসঙ চেনই থাংকা। যাঙগ দলিতনি-ব বুবাগ্রা,
 বুবাগ্রা কুসুসঙ জত-ন থীয়ই থাঙ বাইখা তাই
 বরকনি বাদে-ব নাঙনাই সকনাই বররক-ব
 থাইবাইখা। অ জুদধন খাইমানি জাগাঅ হিনকাই
 বরক কাঁথাই বাই কাঁথাই নাঙলাইয়ই সিয়াল
 সিকুরুগনি খরাঙ সিমি-ন উঙলাই তঙলাইসিঅ।
 কেকেকেক কাকাকাক চালাই তাম বলঙ তাম
 হালঙ বরক কাঁথাই মাঙ উঙগই হেহেগ হাহাগ
 মীনামই সিমি-ন তঙসিঅ বরকনি বাহাই মাঙ
 উঙগই থাংবাইখা।

সেঙ বুবাগ্রাসঙ জিতিঅই থাংমানি উল' পানদা
 কাঁসিা রিঙখা।

অ পানদাঅ জ-ত বররকন ফাইবাইখা।]

সেঙ বুবাগ্রা

: চাঙ জুদধন খায়ই বলঙ বুবাগ্রা বরজুন হারে রিঅই
 চাঙ জিতিখা, চাঙ জিতিমানি উঙখা চাঙন জুদধ
 খাইনানি ফাঁরীঙনাই উঙখা মাদুমি বাই জানকি,
 বরগ উঙখা মারেমারাই তাই বরকনি বাঁসাইসঙ,
 বরগ উঙখা রাঙগিয়া বাই জাঙগিয়া বরগ-ব
 য়ারতাই। মাদুমি বাই জানকি যাঙগ ফায়ই নুগজাগ
 ফাইদি।

[জানকি বাই মাদুমি ফায়ই নুগজাগ ফাইকা
 বরগ মারে মারাই।

প্রজারক জত-ন যাফা তামই হামবাই
 যাফারকা।]

সেঙ বুবাগ্রা : রাঙগিয়া বাই জাঙগিয়া নরগ যাঙ নুগজাগ ফাইদি
য়ারতাই।

রাঙগিয়া বাই জাঙগিয়া নুগজাগ ফাইকা।

প্রজারক য়াফা খরবই হামবাই জানকখা।

সেঙ বুবাগ্রা : জানকি হিনমানি যাঙগ ফাইদি।

জানকি : তাম সেঙ বুবাগ্রা।

সেঙ বুবাগ্রা : ইক মাদুমি-ন নীসাজীক নিনি [মদুমি ফায়ই বুমান
খুলুম ফাইকা]

চিনতাপতি বাই হরিজয়ন যাঙগ ফাইগীরাদি
হিনই সেঙ বুবাগ্রা নুঙখা।

চিনতাপতি বাই হরিজয় ফায়ই হিনকা তাম
সেঙ বুবাগ্রা।

সেঙ বুবাগ্রা : ইক নরগনি নীসাজীক জানকি।

[জানকি ফায়ই বুমা বাই বুফা-ন খুলুম ফাইকা।

প্রজারক য়াকা খরবই হামবাই রিখা।]

সেঙ বুবাগ্রা : চীঙ বলঙ বুবাগ্রানি থানি চিনি দলিত হান জুধ্ব
খায়ই সেগই তুবই ফাইকা ম দলিত হানি বরকন
চালকনানি বাগই বুবাগ্রা খরকচা নাঙগ তাম
হিনবাই নরক প্রজারক সাদি।

খরকচা নাঙগ হিনই প্রজারক জত-ন সাবাইকা।


সেঙ বুবাগ্রা : আহাই খাই আঙ খরকচানি মুঙন সাকীলাই রিডানী
নরগ হামজাখাইবা য়াফা খরবই হামবাই জানকদি।
আঙ মাদুমি ন চিনি বুবাগ্রা খাইনানি বাগই সাত
তাই বুবাগ্রা কুসু উঙনানি বাগই খাই সাত জানকি
ন, আবনি বাদে সেঙ বুবাগ্রা খাইদি রাঙগিয়া ন।
নরক চাদে চাজাগ বাই সাদি।

প্রজারক	: চাজাগ' চাজাগ' হিনই য়াফা খরবই হামবাই জানকখা।
রাঙগিয়া	: আঙ সেঙ বুবাগ্রা নাহারয়া, সেঙ বুবাগ্রা নীঙ-ন উঙদি আঙ মীচাঙয়া, নীঙন মীচাঙগ নীঙন নাহারদি।
সেঙ বুবাগ্রা	: আঙ সেঙ বুবাগ্রানি পদ কীরীই ফান প্রজারকনি কামন খাইনাই। তাবুক চিনি থানি তে-ব বিসি খায়ই কাম বাঙখা, আগি বলঙ বুবাগ্রানি থানি হাঙ্গে কাইসা, তঙমানি তাবুক চিনি য়াগ-ন কীলাইখা, আব-ব চীঙন নাইনানি নাঙনাই।
প্রজারক	: মাদুমি বুবাগ্রানি জয়, মাদুমি বুবাগ্রানি জয় হিনবাইখা।
সেঙ বুবাগ্রা	: মাদুমি বুবাগ্রানি জয়, মাদুমি আনি পদ আঙ তিনিনি সিমি-ন য়াকারই রিখা, জত ন-ন খুলুমবাইখা।
প্রজারক	: চীঙ জিতিখা, চীঙ জিতিখা, চিনি হান চীঙ মানখা।

চীঙ জিতিখা, চীঙ জিতিখা, চিনি হান চীঙ মানখা।

মাদুমি বুবাগ্রা চাই বিসা বিসিকনাই বাই-ন নকবুরুম নক বুরুম-ন মাই গুলা কানিয়া কুপুলুঙ উঙগই তাই নক বুরুম বুরুম ডাসেক ডারেঙ উঙগই তঙবাইখা তাই সানানি ককন কীরীই জাত খায়ই, আসীক-ন মারেমারাই কেরাঙ- কথমা পাইখা, জত ন-ন খুলুমবাইখা।

আউ তককে দুখু থাং সুকু ফাই।



TRIBAL RESEARCH AND
CULTURAL INSTITUTE



ISBN 978-93-86707-39-0

Price : Rs. 100/-